

2ካዎታ ማጽፋ ጊደ ቆፋ

ካዎታ ማጽፋ ናምኣንሉ ከፊሌዚ ኮይሮ ከፊሌዚ ኤቂዳሶፔ ዶሚዲ ኢሰራኤሌ ካዎ ናምኣታ ጊሻሰ ዮቴስ፤ ማጽፋዚ ናምኤ ዋና ዋና ከፊሌታን ሻኬታናስ ዳንዳዬስ።

1. ከርስቶሲ ዬሌታናፔ ካሴ ኡዱፋን ጾታንላ ላይላስ ባጋፊ ዶሚዲ ሳማሪያይ ኩንዳና ዋዴ ጋካናሲኔ ከርስቶሳ ዬሌታፔ ካሴ 721 ላይላፊ ቢዲ ፑዴሃ ባጋ ካዎቴላይ ኩንዳና ጋካናስ ዲዛ ናምኤ ካዎታ ታሪኬ (1-17)።
2. ኢሰራኤሌ ካዎቴላ ኩንዳላፊ ዶሚዲ ከርስቶሲ ዬሌታናፔ ካሴ 586 ላይላን ካዎ ናቡካዳናጸሬይ ዬሩሳላሜ ኦይኪዲ ላላና ጋካናስ ዲዛ የሁዳ ካዎቴላ ታሪኬ (18-25)። ጎደሊያሳይ ባቢሎኔ ካዎቴላፊ ጋርሳራ የሁዳ ዴሬ ሃሪዛዴ ጊዲዳይሳኔ የሁዳ ካዎ ኢዮኣኪኔይ ባቢሎኔን ቃሾ ከላፊ ቢርሼቲዳይሳ ፒልጊ ዮቲሼ ታሪኬዛ ኩዬስ። ሃይሲ ሃ ሞርዚ ኡባይካ ኢሰራኤሌ ጋካናስ ዳንዳይዳይ የሁዳ ካዎይ፤ ኢሰራኤሌ ካዎይኔ ዴሬዚ ጸሳስ ኣማኔቶንታ ኣጊዳ ጊሻሳ። ኢሰራኤሌ ኣሳ ታሪኬይ ላሜታና ማላ ጋሶ ጊዲዳ ኣይፊ ዮኦቲ ዬሩሳላሜ ኩንዳሴኔ የሁዳ ኣሳፔ ዳሪዛ ባጋታ ጎዴቴል። ካዎታ ማጽፋን ናምኣንሉ ከፊሌዛን ኤላሳፔ ካሊዲ ኬሂ ኤሬቲዳ ናቤይ ኤልሳኤ።

ሃ ማጽፋይ ኦይኪዲ ኩሜላ ቆፋ

ሻኬቲዳ ካዎቴላታ 1:1—17:41

ናቤ ኤላሳ 1:1—8:15

የሁዳ ካዎታኔ ኢሰራኤሌ ካዎታ 8:16—17:4

ሳማሪያ ኩንዳል 17:5-41

የሁዳ ካዎቴል 18:1—25:30

ሂዘቂያሳፔ ቢዲ ኢዮሲያሳ ጋካናስ 18:1—21:26

ኢዮሲያሳ ኣይሶ 22:1—23:30

የሁዳስ ዉርሴላ ካዎታ 23:31—24:20

ዬሩሳላሜ ኩንዳል 25:1-30

ናቤ ኤላሳኔ ካዎ ኣካዚያሳ

¹ ኣካቤይ ሃይቂዳፔ ጉዬ ሞኣቤ ዴሬይ ኢሰራኤሌ ዴሬ ቦላ ዴንዲዴስ።

2 ሄ ዋዴ አካዚያሲ ሳማሪያን ዲዛ ባ ኢልፒኔ ፖቄ ቦላፌ ማሰኮቴራ ዲጌ ኩንዲዲ ሳኬቴደስ፤ ሄሳ ገሻሰ ኢዚ፡ «ኣኔ ኢንቴ ቢዲ ታ ሳኮዛ ገሻሰ ታ ፓጸናኮ ኣቃሮኔ ኤቃ ጸሳ ባኣሊ-ዜቡላ ታስ ኦይቺቴ» ገዲ ኣስ ከቲደስ።

3 ጎዳ ከታንቻይ ቱሲቤ ዴሬ ኣስ ናቤ ኤላሳስ፡ «ኔኒ ዴንዳዳ ሳማሪያ ካዎይ ከቲዳ ኣሳታራ ጋይታናስ ኬዛ ባዳ ሄ ኣሳታስ፡ «ኢንቴ ኣቃሮኔ ኤቃ ጸሳ ባኣሊ-ዜቡላ ኦይቻናስ ቢዛይ ኢሰራኤልን ጸሲ ባይንዳ ገሻሰ?» ጋዳ ኢስታ ኦይቻ።

4 ሄሳ ገሻሰ ጎዳይ፡ «ኔ ኢቺዳ ሂጻፔ ዴንዳዳ፤ ቱማፔ ኔ ሃይቃና» ጌስ» ገደስ፤ ሄሳፌ ጉዬ ኤላሲ ቢደስ።

5 ከቲቲ ቢዳ ኣሳቲ ካዎዛኮ ጉዬ ሲሚ ዪን ኢዚ ኢስታስ፡ «ኣይስ ሲሚ ዪደቲ?» ጌ ኦይቺደስ።

6 ኢስቲካ ኢዛስ፡ «ኢሳዴይ ኑናራ ጋይታናስ ዪዲ ጎዳይ፡ «ኢንቴ ኢንቴና ከቲ ዬዲዳይሳኮ ሲሚ ቢዲ ኣቃሮኔ ኤቃ ጸሳ ባኣሊ-ዜቡላ ኦይቻናስ ኔኒ ኣስ ከቲዳይ ኢሰራኤልን ጸሲ ባይንዳ ገሻሰ? ሄሳ ገሻሰ ኔ ኢቺዳ ሂጻፔ ዴንዳዳ፤ ቱማፔ ኔ ሃይቃና» ገደስ» ገዳ።

7 ካዎዚካ ኢስታስ፡ «ኢንቴናራ ጋይታና ዪዲ ኢንቴስ ሄሳሶ ገዳይ ኢዚ ኣይ ማላ ኣሴ?» ገዲ ኦይቺደስ።

8 ኢስቲካ ኢዛስ፡ «ኑስ ዮቲዳይሲ ኢስኬራ ዲዛ ማይኦ ማይኢደስ *፤ ጸሳን ዳፎ ዳንጨደስ» ገዳ። ካዎዚ ኢስታስ፡ «ታ ኢዛ ኤራዲስ፤ ሄሲ ቲሲቤ ዴሬ ኣስ ኤላሳ» ገደስ።

9 ሄሳፌ ጉዬ ካዎዚ ሃሞሳ ሃላቃዛ ኢቻሽ ታሙ ዋታዳራታራ ኤላሳኮ ዬዲደስ። ሃሞሳ ሃላቃዚ ኤላሲ ዲዛ ዙሞቡላ ሁኤ ኬዚዲ፡ «ሃይሶ ጸሳ ኣሶ! ካዎይ ኔና ሃ ዲጌ ዋቋ ጌስ» ገደስ።

10 ኤላሲካ ዛሪዲ ሃሞሳ ሃላቃዛስ፡ «ታኒ ጸሳ ኣስ ገዲኮ ሳሎፔ ታማይ ዋቋዲ ኔና ኔናራ ዲዛ 50 ኣሳ ሞ!» ገደስ። ሄሳፌ ጉዬ ታማይ ሳሎፔ ዋቋዲ ሃሞሳ ሃላቃዛኔ ኢዛራ ዲዛ ኣሳ ኡባ ዲፒ ሂስቲደስ።

11 ካዎዚ ቃሴ ሃራ ሃሞሳ ሃላቃኔ ኢቻሽ ታሙ ዋታዳራታ ከቲደስ፤ ሃሞሳ ሃላቃዚካ፡ «ሃይሶ ጸሳ ኣሶ! ካዎይ ኔና ኤሶን ሃ ዋቋ ጌስ» ገደስ።

12 ኤላሲካ ዛሪዲ፡ «ታኒ ጸሳ ኣስ ገዲኮ ታማይ ሳሎፔ ዋቋዲ ኔና ኔናራ ዲዛ 50 ኣሳ ሞ!» ገደስ፤ ሄሳፌ ጉዬ ታማይ ሳሎፔ ዋቋዲ ኢዛኔ ኢዛራ ዲዛ ኣሳ ዲፒ ሂስቲደስ።

* 1:8 ኢስኬራ ዲዛ ማይኦ ማይኢደስ ገዛይሲ ኣዴዚ ኢስካማ ጉሳ ገዳና ዳንዳዬስ። 1:8 ማቶ 3:4፤ ማር 1:6 1:12 ሉቃ 9:34

13 ሄሳ ጊሻስ ካዎዚ ሄሻንሶ ሃምሳ ሃላቃዛኔ ኢዛራ 50 ኣስ ዩዲዴስ፤ ሃ ሄሻንሶ ሃምሳ ሃላቃዚ ቢዲ ኤላሳ ሲንላን ጉልባቲዲ፡ «ኣቤት ጸሳ ኣሶ! ታ ሼምፖይኔ ሃይታ ኔ ኣይሌ ኢቻሽ ታማታ ሼምፖይ ኔ ሲንላን ቦንቹቶ።

14 ሃይሳፌ ካሴ ሳሎፔ ዎዲዳ ታማይ ናምኡ ሃምሳ ሃላቃታኔ ኢስታራ ዲዛ ኣሳታ ኡባ ሚዴስ፤ ሃኢ ጊዲኮ ታ ሼምፒያ ኔ ሲንላን ቦንቹቱ» ጊዴስ።

15 ጎዳ ኪታንቻዚ ኤላሳ፡ «ኔኒ ኢዛራ ዱጌ ዎዲ፤ ኢዛሰካ ባቦፋ!» ጊዴስ። ሄሳ ጊሻስ ኤላሲ ኢዛራ ኢሲፌ ካዎዛኮ ዱጌ ዎዲዴስ።

16 ኢዚ ካዎዛስ፡ «ጎዳይ፡ ሳኒ ኣቃርኔ ኤቃ ጸሳ ባኣሊ-ዜቡላ ኔ ጊሻስ ኦይቻናስ ኣሳታ ኪታ ዩዲዳይ ኢሰራኤልን ጸሲ ባይንዳ ጊሻሴ? ኔኒ ሄሳ ኦሒዳ ጊሻስ ሃኢ ኔ ኢቹዳ ሂጻፔ ሙሉካ ዴንዳካ፤ ቱሙ ኔ ሃይቃና» ጊዴስ» ጊዲ ዮቲዴስ።

17 ሄሳ ጊሻስ ኤላሲ ኢዛሰ ዮቲዳ ጎዳ ቃላ ማላ ኣካዚያሲ ሃይቂዴስ። ኣካዚያሳስ ኣቱማ ናይ ባይንዳ ጊሻስ ኢዮሳፌጾ ና ኢራሜይ ዩሁዳ ዴሬ ቦላ ካዎቲዳ ናምኣንሶ ላይላን ኢዛ ኢሻ ኢዮራሜይ ኢዛሰሆን ካዎቲዴስ።

18 ኣካዚያሲ ባ ዎዴን ኦሒዳ ኦሶቲኔ ኢዚ ፖሊዳ ኦሶቲ ኡባይካ ኢሰራኤል ካዎታ ታሪኬ ማጻፋን ጸፊቲ ዴስ ጊዴኔ?

2

ኤላሲ ሳሎ ዴንዲ ቡስ

1 ጎዳይ ኤላሳ ጎቲ ጫርኮራ ፑዴ ሳሎ ኤፋና ዎዴይ ጋኪን ኤላሲኔ ኤልሳኢ ጌልጌላፔ ዴንዲዲ ኢሲፌ ቢሼ ዴቲስ።

2 ኤላሲ ኤልሳኤስ፡ «ጎዳይ ታና ቤቲሌ ከቲዳ ጊሻስ ኔኒ ሃን ሃይሳን ታካሻ» ጊዴስ። ኤልሳኢ ኢዛሰ ዛሪዲ፡ «ዴኦ ጎዳይ ቤዪን ኔ ኣሾ ታ ኔፔ ሻኬቲኬ» ጊ ጫቂዴስ፤ ሂሰቲን ኢሲፌ ዱጌ ቤቲሌ ዎዲዳ።

3 ቤቲሌን ዲዛ ናቤታ ማባራይ ኤልሳኤኮ ቢዲ፡ «ጎዳይ ኔ ጎዳ ኤላሳ ሃቶ ኔፔ ሻኪ ኤካናይሳ ኔ ኤራዲ?» ጊዳ። ኤልሳኢካ፡ «ኤ ኤራዲስ፤ ኢንቲ ኣኔ ጮኡ ጌቲ» ጊዴስ።

4 ቃሴካ ኤላሲ ኤልሳኤስ፡ «ሃይሶ ኤልሳኤ! ጎዳይ ታና ኢያርኮ ከቲዳ ጊሻስ ኔ ሃን ሃይሳን ታካሻ» ጊዴስ። ኢዚካ ኢዛሰ ዛሪዲ፡ «ዴኦ ጸሳይ ቤዪን፡ ኔ ኣሾ ታ ኔፔ ሻኬቲኬ» ጊ ጫቂዴስ፤ ሄሳ ጊሻስ ኢዛራ ኢሲፌ ኢያርኮ ዎዲዳ።

5 ኢያርኮን ዲዛ ናቤታ ማባራይ ኤልሳኤኮ ሸቂዲ፡ «ጎዳይ ኔ ጎዳ ኤላሳ ሃች ኔፔ ሻኪ ኤካናይሳ ኔ ኤራዲ?» ጌዳ። ኢዚካ ኢስታስ፡ «ኤ ኤራዲስ፤ እኔ ኢንቲ ጮኡ ጌቲ» ጌዳስ።

6 ሄሳፌ ጉዬ ኤላሲ፡ «ጎዳይ ታና ዮርዳኖሴ ከቲዳ ገሻሰ ኔኒ ሃን ሃይሳን ታካሻ» ጌዳስ፤ ኢዚካ ኢዛስ ዛሪዲ፡ «ዴኦ ጎዳይ ቤዪን፤ ኔ አሾ ታ ኔፔ ሻኬቲኬ» ጌዳስ። ሄሳ ገሻሰ ናምኣቲካ ኢሲፌ ቢዳ።

7 ናቤታ ማባራ ጋርሳፌ ኢቻሽ ታማይ ቢዲ ኤላሲ ኤልሳኢ ኤቂ ዲዛሶ ገናራ ዮርዳኖሴ ፒንሳን ሃኪ ኤቂዳ።

8 ኤላሲ ባ ካባ ቃሪ ኤኪዲኔ ጸጺዲ ኢዛራ ሃላ ሾጪዳስ፤ ሄሳፌ ጉዬ ሃላይ ሃዲርሲኔ ኡሻች ሻኬቲ ዎዲዳስ። ናምኣይካ ቦሉማ ቢታራ ፒኒዳ።

9 ኢስቲ ፒኒ ኬዚዳፔ ጉዬ ኤላሲ ኤልሳኤ፡ «ታ ኔሰ ኣይ ኦላና ማላ ኔ ኮይዛኮ ታ ኔፔ ሻኬቶንታ ዲሺን እኔ ታሰ ዮታ» ጌዳስ። ኤልሳኢካ፡ «ኔ ኣያናይ ታ ቦላ ናምኡ ዳኮ ጌዳና ማላ ታ ኔና ዎሳይሰ» ጌዳስ።

10 ኤላሲካ፡ «ዴጾ ሚሽ ኦይቻዳሳ፤ ጌዲኮካ ታኒ ኔፔ ሻኬታ ቢዛ ዎዴ ኔ ታና ቤኢኮ ኔ ጌዳ ማላ ኔሰ ሃናና፤ ኔ ቤኦንታ ኣጌኮ ሄሲ ኔሰ ሃኔና» ጌዳስ።

11 ኢስቲ ሃሳይሾ ሎዳራ ቢሺን ታማ ፓራ-ጋሬቲኔ ታማ ፓራቲ ኢስቲ ቆፖንታ ዲሺን ኢስታ ጌዳን ጌሊዲ ናምኣታካ ሻኪ ዬጌዳ፤ ኤላሲ ጎቲ ጫርኮን ፑዴ ሳሎ ቢዳስ።

12 ኤልሳኢ ሄሳ ቤኢዲ፡ «ታ አዋዉ! ታ አዋዉ! ኢስራኤሌ ፓራ-ጋሬታኔ ቶጋንቻታ!» ጌዲ ዋሲዳስ፤ ሄሳፌ ጉዬ ናምኣንሶ ኤላሳ ቤዪቤና፤ ሄሳፌ ሲሚዲ ባ ማይኦ ናምኡ ኬሲ ዳኪዳስ።

13 ኤላሳፔ ዎዲዳ ካባዛ ኤኪዲኔ ጉዬ ሲሚ ቢዲ ዮርዳኖሴ ሻፋ ኣቻን ኤቂዳስ።

14 ኤላሳፔ ዎዲዳ ካባን ሃላ ሾጪሾ፡ «ጎዳይ ኤላሳ ጸሳይ ኣዋን ዲዜ?» ጌዳስ፤ ኢዚ ሃላ ሾጪን ሃዲርሲኔ ኡሻች ሻኬቲ ዎዲን ፒኒዳስ።

15 ኢያርኮፌ ቢዲ ሄሳ ቤይዳ ባጋ ናቤቲ፡ «ኤላሳ ኣያናይ ኤልሳኤ ቦላ ሾምፒዳስ» ጌዳ፤ ኢዛራ ጋይታናሰ ቢዲ ኢዛ ሲንሳን ዘቂ ጌዲ ባንታ ኩሼ ዴንሉዳ።

16 ሄሳፌ ጉዬ፡ «ሄኮ ኔ ኣይሌታሰ ኦሰ 50 ሚኖ ኣሳቲ ዴቴሰ፤ ኦኔ ኤሪዛይ ጎዳ ኣያናይ ኔ ጎዳዛ ዴንሉ ኤፊዲ ኢሲ ዙማ ቦላ

ዋሊዳኮ ወይኮ ኢሲ ዙሌ ሶሆን ጌልሊ ዋሊዳኮ ቢዲ ኮዬቶ» ጌዴ።

17 ሃኔና ጉሲ ኢዛ ዩላቻና ጋካናሰ ኢዛ ኡንኤሊዳ፤ ሃሳ ገሻሰ፤ «አኔ ዩዲቲ» ጌዴሰ፤ ኢሰቲካ 50 አሰ ዩዲን ሄ አሳቲ ሄቩ ጋላሰ ኩሚል ኮዬዲ ዴሚቤቲና።

18 ኢሰቲ ኢያርኮን ዲዛ ኤልሳኤኮ ሲሚን ኢዚ ኢሰታሰ፤ «ታ ኢንቴና ቦፒቲ ጋቤኪና?» ጌዴሰ።

ሃላዛ ፓጾ

19 ሄ ካታማይን ዲዛ አሳይ ኤልሳኤ፤ «ሄኮ ኔኒ ኑ ጎዳይ ቤኢዛ ማላ ሃና ካታማያ ዲሳሰ ኢንጂ፤ ጌዶ አቲን ሃሊ ኢታ ጌዲዳ ገሻሰ ቢታያ አይፌ ኢሙኩ» ጌዴ።

20 ኢዚካ ኢሰታሰ፤ «አኔ ኢንቴ ኦራላ ኦቶን ማጸኔ ጉጂዲ ሃ ታሰ ኤኪ ዩቲ» ጌዴሰ፤ ኢዚ ጌዳ ማላ ኤኪ ዩዳ።

21 ሄሳፌ ጉዬ ኢዚ ፑልቶ ሃሊ ዲዛሶ ቢዲ ፑልቶዛን ማጸኔ ዩጌዲ፤ «ጎዳይ፤ ታኒ ሃይሳ ሃላ ፓላዲሰ፤ ሃይሳፌ ጉዬ ኢዚ ሃይቆሰ ጋሶ ጌዴና፤ ቢታያካ አይፌ ኢሞንታ ማላ ዲጌና፤ ጌሰ» ጌዴሰ።

22 ኤልሳኤ ጌዳ ማላካ ሃላዚ ሃኙ ጋካናሰ ፓጺ አቲዴሰ።

ኤልሳኤ ቦላ ቂጂዳ ናቴላታ

23 ኤልሳኤ ሄፔ ዴንዲ ቤቴሌ ኬዚዴሰ፤ ኢዚ ቡሮ ቢሼ ኦጌን ዲሺን ካታማፔ ኬዚዳ ናቴላቲ፤ «ሃይሶ ቦኣ አዴዞ! ኬዛ ኪቻ!» ጌሼ ኢዛ ቂጂዳ።

24 ኤልሳኤካ ጉዬ ሲሚ ኢሰታ ጸሊዲ ጎዳ ሱንላን ኢሰታ ቃንጌዴሰ፤ ሃሳፌ ጉዬ ናሞኤ ማጫ ዛርዶቲ ዋራፔ ኬዚዲ ናቴላ ናይታፔ ኦይዲ ታማኔ ናሞኣታ ሚንሐሬሊ ዩጌዳ።

25 ኢዚ ፑዴ ቃርሜሎሴ ዙማ ቦላ ኬዚዴሰ፤ ሄፔ ሳማሪያ ሲሚዴሰ።

3

ሞኣቤ ማካላቴል

1 የሁዳ ካዎ ኢየሳፊጾይ ካዎቲዳ ታማኔ ኦሰፑንላ ላይላን አካቤ ና ኢየራሜይ ኢሰራኤሌ ቦላ ሳማሪያን ካዎቲዳ 12 ላይላ ሃሪዴሰ።

2 ኢዚ ጎዳ ሲንላን ኢጾቲዳ ዳሮ ኢታ ሚሽ ኦሊዴሰ፤ ሄ ኢታ ኦሶዚካ ካሴ ኢዛ አያኔ ኢዛ አዋይ ኦሊዳ ኢታ ኦሶዛ ማላ ጌዴና፤ ኢዛ አዋይ ኦሲሲዳ ባኣሌ ሃዉልቲዛ ዲጌዴሰ።

3 ጊደ ኣቲን ናባጼ ና ኢዮርባኣሜይ ኢሰራኤል ኣሳ ኮሲሲዳ ናጋራን ኢዚ ኦይኬቲዳስ፤ ኢዛፔካ ሻኬቲቤና።

4 ሄ ዎዴ ሞኣቤ ካዎ ሜሻይ ሃራስ፤ ኢዚ 100,000 ላቃታኔ 100,000 ቆርሾታ ኢሰኬ ኢሰራኤል ካዎስ ገራስ።

5 ኣካቤይ ሃይቂዳፔ ጉዬ ሞኣቤ ካዎይ ኢሰራኤል ካዎ ቦላ ማካሊዳስ።

6 ሄሳ ገሻስ ሄ ዎዴ ካዎ ኢዮራሜይ ሳማሪያፔ ዴንዲ ቢዲ ኢሰራኤል ኣሳ ኡባ ኢሲ ቦላ ሺሺዳስ።

7 ዩሁዳ ካዎ ኢዮሳፊጾስ፡ «ሞኣቤ ካዎይ ታ ቦላ ማካሊዳ ገሻስ ኔ ታናራ ኢዛ ኦላናስ ባኔ?» ገ ኢዛኮ ኣስ ኪታ ዬዲዳስ። ኢዚካ ዛሪዲ፡ «ኤ ታ ኔናራ ኦላናስ ባና፤ ታኒ ኔ ማላ፤ ታ ዴሬይካ ኔ ዴሬዛ ማላ፤ ታ ፓራቲካ ኔ ፓራታ ማላ» ገ ዛሪዳስ።

8 ኢዮሳፊጾይ፡ «ኮኒ ኦላስ ኣዋ ባጋራ ባኔ?» ገ ኦይቺዳስ። ኢዮራሜይ ዛሪዲ ኤዶሜ ባዞራ ካንሊ ባና ገዴስ።

9 ሄሳ ገሻስ ኢሰራኤል ካዎይ፡ ዩሁዳ ካዎይኔ ኤዶሜ ካዎይ ኢሲፌ ኦላ ዎራጃናስ ዴንዲዳ። ላፑን ጋላሳፌ ጉዬ ኦላንቻታሲኔ ሜሄታስ ኡያና ሃሊ ቆይዳስ።

10 ኢሰራኤል ካዎዚ፡ «ኣዬ ኣና! ጎዳይ ኑና ሄቹ ካዎታ ሞኣቤስ ኣሊ ኢማናስ ጾይጊዴ?» ገዴስ።

11 ኢዮሳፊጾይ ገዲኮ፡ «ኢዛ ባጋራ ጎዳ ኦይቻና ማላ ጎዳ ናቤይ ሃይሳን ዴኔ?» ገዲ ኦይቺዳስ። ኢሰራኤል ኦላንቻታ ጋዳዋታፔ ኢሶይ፡ «ካሴ ኤላሳ ኩሼ ሜጨሲዛ ሳፋጼ ና ኤልሳኢ ሃይሳን ዴስ» ገ ዮቲዳስ።

12 ኢዮሳፊጾይካ ዛሪዲ፡ «ጎዳ ቃላይ ኢዛ ማታን ዳና» ገዴስ። ሄሳ ገሻስ ኢሰራኤል ካዎ፡ ኢዮሳፊጾይኔ ኤዶሜ ካዎይ ኢሲፌ ኢዛኮ ዲጌ ዎጲዳ።

13 ኤልሳኢካ ኢሰራኤል ካዎስ፡ «ኔና ኑናራ ጋሊዛ ሚሺ ኣዚ ዲን ያዲ? ኔ ሃኢ ካሴ ኔ ኣዋ ናቤቲኔ ኔ ኣዬይ ናቤቲ ዲዛሶ ባ» ገዴስ። ኢሰራኤል ካዎዚ ኢዛስ ዛሪዲ፡ «ሄሲ ሃኔና፤ ሞኣቤ ኩሼን ኑና ኣሊ ኢማናስ ሄቹ ካዎታ ኢሲ ቦላ ጾይጊዳይ ጎዳ» ገዴስ።

14 ኤልሳኢካ ኢዛስ፡ «ታ ኢዛስ ሃጋዚዛ ጎዳይ ቤዪን፡ ታ ዩሁዳ ካዎ ኢዮሳፊጾ ቦንቸንታኮ ኔና ቤያናስ ኮይኬ፤ ዉዲካ ገኬ።

15 ኣኔ ሃኢ ታስ ባጋና ዲጸዛይሳ ኤኪ ዪቲ» ገዴስ። ባጋና ዲጸዛይ ዲጸሺን ጎዳ ኩሼይ ኤልሳኤ ቦላ ዪዴስ።

16 ኤልሳኢ፡ «ጎዳይ፡ ሃይሳ ሃ ሾባን ዳሮ ኦላታ ቦኪቲ።

17 ጫርኮካ፡ ኢራካ በኤኬታ፤ ጊደ ኣቲን ሃ ሾባዛን ሃሊ ኩማና፤ ኢንቴ፡ ኢንቴ ሚዛቲኔ ኢንቴ ሜሃቲ ሃሊ ኡያና፤ ጌሰ።

18 ሃይሲ ጎዳሰ ላፋ ሚሻ። ኢዚ ሞኣቤ ኣሳ ኢንቴ ኩሼን ኣሊ ኢማና።

19 «ገምቤቲዳ ካታማታኔ ሎኢዛ ኢስታ ካታማታ ኡባ ኢንቴ ጸኒ ኦይካና። ሎኢዛ ኢስታ ሚላታ ኢንቴ ቃንጻና፤ ኢስታ ፑልቶታካ ሙሌራ ኢንቴ ቱጫና፤ ካል ሎኤሊ ኢሚዛ ጋዳዛ ኢንቴ ሹቻን ሞራና» ጊደሰ።

20 ዋንቴላ ጋላሰ ያርሾይ ያርሼቲዛ ሳቴን ኤዶሜ ባጋራ ሃሊ ዲኦ ማላ ዪን ቢታያ ሃላ ጸላ ጊዳዲሰ።

21 ሄ ዋይ ካዎቲ ኢስታ ኦላናሰ ዪዳይሳ ሞኣቤ ኣሳይ ኡባይ ሲዪዲ ናይ ጊዲን ጨማይ ኦላ ሚሽ ኦይካናሰ ዳንዳይዛ ኡባይ ጼይጌቲ ኬዚዲ ባንታ ዛዋ ቦላ ኤቂዲ ናጎ ኦይኪዳ።

22 ዋንቴላ ጋላሰ ማላዶ ዋንታራ ኢስቲ ዴንዲሺን ሃላ ቦላ ዋዲዳ ጸልቂይ ጸልቂደሰ፤ ፒንላን ዲዛ ሞኣቤ ዴሬዛሰ ኣይፌን ሃሊ ሱላ ማላ ዞኢ ቤቲደሰ።

23 ሄሳ ጊሻሰ ኢስታሰ፡ «ሄሲ ሱላኮ! ሲዴይ ባይንዳ ካዎቲ ባ ጋርሳን ኦሌቲዲ ኢሶይ ኢሳ ሹኪዳ፤ ሄሳ ጊሻሰ ሞኣቤ ኣሳወ! ዲኦ ሺሻናሰ ሲሚቲ» ጊዳ።

24 ሞኣቤ ኣሳይ ኢስራኤሌ ኣሳይ ዲዛሶ ኬዚሺን ኢስራኤሌ ኣሳይ ዴንዲዲ ኢስታ ኦሊደሰ፤ ሞኣቤቲ ኢስታ ሲንላፌ ባቃቲዳ፤ ሄሳፌ ጉዬ ኢስራኤሌ ኣሳይ ሞኣቤ ቦላ ዋራጂዲ ኢስታ ዲፒ ሂሰቲደሰ።

25 ኢስታ ካታማታ ሙሌራ ዳይሲዳ፤ ሎኦ ካላ ጋደቲካ ሹቻን ካሜታና ጋካናሰ ኢሶይ ኢሶይ ኢሲ ኢሲ ሹቕ ጋዳዛን ዬጊደሰ፤ ፑልቶታካ ሙሌራ ቱጪዳ፤ ሎኦ ሎኦ ሚላታ ኡባካ ቃንጸ ቃንጸ ዬጊዳ፤ ቂራ-ሄሬሴቴ ጌቲቲዛራ ጸላ ባ ሹቻራ ኣታዲሰ፤ ኢዞ ጊዲኮካ ያንባርሻን ኦሌቲዛ ኦላንቻቲ ጊደሊዲ ኦሊዳ።

26 ሞኣቤ ካዎይ ኢዛ ኦላ ኣሳይ ጸኔታናይሳ ኤሪዳ ማላ ጊላ ማሻ ጊጸዳ 700 ኣሰ ባናራ ኤኪዲ ኤዶሜ * ካዎይ ዲዛሶ ሜንሊ ጌላናሰ ዳፌቲደሰ፤ ጊደ ኣቲን ኢስቲ ጊዳ ማላ ኢስታሰ ሃኒቤና።

27 ሄሳፌ ጉዬ ኢዛፔ ካሊ ካዎታናይሳ ባሰ ባይራ ናዛ ኤኪ ቢዲ ካታማይ ገምቤዛ ቦላ ጸጌቲዛ ያርሾ ሂሰቲ ያርሺደሰ፤ ኢስራኤሌ ቦላ ዋልቃማ ሃንቆይ ጋኪደሰ፤ ሂሰቲን ኢስቲ ሄፔ ኬዚዲ ጉዬ ባ ዴሬ ሲሚዳ።

* 3:26 ኤዶሜ ጌቲቲዛይሲ ሶሪያ።

4

አምኤይ ዛይቲ

¹ ናቤታ ማባራ ጋርሳፌ አሳ ማቼያ፡ «ኔስ ሃጋዚዛ ታ ኣዚናይ ሃይቂደስ፤ ኢዚ ጎዳስ ያዪዛ ኣስ ጊዲዳይሳ ኔ ኤራሳ፤ ሃኢ ጊዲኮ ኣጮ ጎዳይ ታ ኣቱማ ናይታ ናምኣታካ ባስ ኣይሌ ሂስቲ ኤኪ ባናስ ዪ ኡቲዳስ» ጋዳ ኤልሳኤስ ዋሳዱስ።

² ኤልሳኢካ ኢዚስ፡ «ሂስቲን ታ ኔስ ኣይ ኦላና ማላ ኮያይ? ኔሶን ኣዚ ዲዛኮ ኣኔ ታስ ዮታ» ጊደስ። ኢዛካ ኢዛስ፡ «ታስ ኔ ኦሳንቻይስ ጉላ ዛይቲ፤ ኣቲን ታሶን ሃራይ ኣይኮይካ ዴና» ጋዱስ።

³ ኤልሳኢካ ኢዚስ፡ «ሂስቲኮ ኔኒ ሃኢ ባዳ ኔ ሾርታ ኡባታ ሶፔ ጉል ጊደንታ ዳሮ ኦቶታ ጋርጸ ሸሻ።

⁴ ኔ ናይታ ኡባታራ ሶ ጌላዳ ካሬ ኢንቲ ቦላ ጎርዳ፤ ዛይቲዛካ ኔ ጋርጸ ኤሂዳ ኦቶታ ኡባን ዱቃ፤ ኢሲ ኢሲ ኦቶይ ኩሚዳ ማላ ኢሲ ባጋን ዋላ» ጊደስ።

⁵ ሄሳ ጊሻስ ኢዛ ናቤዛ ሄን ኣጋ ባዳ ሶ ጌላዳ ካሬ ባ ቦላኔ ባ ናይታ ቦላ ጎርዳዱስ፤ ናይቲ ኢዚስ ኦቶታ ሸሸን ኢዛ ዛይቲዛ ቲጌል ዶማዱስ።

⁶ ኦቶቲ ኡባይ ኩሚዳ፤ ጉዬ ኢዛ ባ ናዛ፡ «ሃራ ኦቶ ታስ ኤካ ያ!» ጋዱስ። ኢዚካ ዛሪዱ፡ «ሃራ ኦቶይ ባዋ» ጊደስ፤ ሄሳፊ ጉዬ ዛይቲዚ ጎጊዛይሳ ኣጊደስ።

⁷ ኢዛካ ባዳ ሄሳ ጸሳ ናቤዛስ ዮታዱስ፤ ኢዚ ኢዚስ፡ «ኔ ባዳ ዛይቲዛ ባይዛዳ ኔ ኣጮዛ ቃንጸ፤ ኔኒ ኣጮዛ ቃንጸን ኣቲዳይሲ ኔስኔ ኔ ናይታስ ቃላባ ጊደ» ጊደስ።

ሃይቆፔ ሱኔሜ ማጫሳይ ናዛ ዴንል

⁸ ኢሲ ጋላስ ኤልሳኢ ሱኔሜ ቢደስ፤ ሄን ኢሲ ዱሬ ማጫሲ ዳራ ዳዉስ፤ ኤልሳኢ ኢዚ ሶን ቁማ ማና ማላ ሚንላ ዋሳዱስ፤ ኢዚ ካሴ ሄራ ኣጂ ቢዛ ዋዴ ቁማ ማናስ ኢዚ ሶ ጌሌስ።

⁹ ሄ ማጫሳያ ባ ኣዚናስ፡ «ሃይሲ ኡባ ዋዴ ኦ ፔንጌራ ኣጂ ቢዛ ኣዳዚ ጌሺኔ ጸሳ ኣስ ጊዲዳይሳ ታ ኤራይስ።

¹⁰ ሄሳ ጊሻስ ቦላ ፖቄን ኢሲ ጉላ ኪፊሌይን ኦ ኢዛስ ሂላ፡ ጸራጸዛ፡ ኦይዴኔ ፓኖሴ ጊግሲዱ ሄን ዋላስ፤ ኢዚ ኦኮ ዪዛ ዋዴ ኡባን ኢዛስ ሸምፖሶ ጊዳና» ጋዱስ።

¹¹ ኢሲ ጋላስ ኤልሳኢ ዪዱ ባ ሸምፒዛ ኪፊሌይን ጌሊዱ ሸምፓናስ ጌዱ ጊደስ።

¹² ባ ኣይሌዛ ጊያዜ፡ «ባዳ ሱኔሜ ማጫሳዮ ዴይጋ» ጊደስ። ኢዚ ኢዛ ዴይጊን ያዳ ኢዛ ሲንላን ኤቃዱስ።

13 ኤልሳኢ፡ «ጊያዜስ፡ ሩኔ ኑ ጊሻስ ጋዳ ዳር ዋያዳሳ፤ ኔስ ኣዚ ኦሴታና ማላ ኮያይ? ካዋዛስ ጊዲን ኦላንቻታ ኣዛዚዛይሳስ ኑ ኔ ጊሻስ ዮታና ሚሺ ዲዜ?» ጋዳ ኢዞ ኦይቻ» ጊዴስ። ማጫሳያካ ዛራዳ፡ «ታኒ ታ ዳቦ ጊደን ዳይስ» ጋዴስ።

14 ኤልሳኢካ ጊያዜስ፡ «ሂሰቲን ኢዚስ ኣይ ኦላኔ?» ጊዲ ኦይቹዴስ፤ ጊያዜይካ፡ «ኢዚስ ዩሎይ ዳና፤ ኢዚ ኣዚናዚ ጩጊዴስ» ጊዴስ።

15 ኤልሳኢካ ኢዛስ፡ «ሂሰቲኮ ኣኔ ኔኒ ኢዞ ሃ ጸይጋ» ጊዴስ፤ ኢዚ ኢዞ ጸይጊን ኢዞ ያዳ ፔንጌ ቦላ ኤቃዱስ።

16 ኤልሳኢካ ኢዚስ፡ «ኔኒ ላይላ ሃኒ ዋዴ ኣቱማ ና ኢዲማና» ጊዴስ። ኢዛካ ኢዛስ፡ «ጊዴና ታ ጎዶ! ኔኖ ጸሳ ኣሶ! ኔኒ ኔ ኦሳንቻይስ ታስ ዋርዶቶንታ ማላ» ጋዴስ።

17 ማጫሳያካ ቃንሳታዱስ፤ ኤልሳኢ ኢዚስ ዮቲዳ ማላካ ኢዚ ጊዳ ዋዴን ኣቱማ ና ዩላዱስ።

18 ናዚካ ዲጨዴስ፤ ኢሲ ጋላስ ኢዛ ኣዋይ ካላ ሺሺዛይታራ ዲሺን ናዚ ሄ ቢዴስ።

19 ኢዚ ባ ኣዋስ፡ «ታ ሁኤ! ታ ሁኤ!» ጊዴስ። ኣዋዚካ ባ ኣይሌዛስ፡ «ናዛ ባኣ ኤፋዳ ኢዛ ኣዩይኮ ጋላ» ጊዴስ።

20 ኣሽካራዚካ ናዛ ባኢ ኤፊዲ ኣዩይኮ ጋሊዴስ፤ ናዚ ሴታ ጋላስ ጋካናስ ባ ኣዩይ ኪኦን ኡቲዴስ፤ ሄሳፌ ጉዬ ሃይቂዴስ።

21 ኢዛ ኣያ ፑዴ ኬዛዳ ጸሳ ናቤዛ ሂጸን ኢዛ ኢሺሳዱስ፤ ካሬ ኢዛ ቦላ ጎርዳዳ ኬዛዱስ።

22 ሄሳፌ ጉዬ ባ ኣዚና ጸይጋዳ፡ «ታኒ ጸሳ ናቤዛኮ ኤሶን ጋካዳ ሲማና ጋካናስ ኢሲ ኦሳንቻኔ ኢሲ ሃሬ ታስ ዩዳርኪ!» ጋዴስ።

23 ኢዚ ኣዚናዚካ፡ «ኔ ሃቕ ኢዛኮ ባናስ ኣይስ ኮያዲ? ሃቕ ኣገና ጸር ዋይኮ ሳምባታ ጋላስ ጊዴና» ጊዴስ። ኢዛካ ዛራዳ፡ «ኤ ሂሲ ሊኬሺን ታ ቡስ ባና» ጋዴስ።

24 ሄሳፌ ጉዬ ሃሬዛ ኮራ ኤካዳ ኦሳንቻዛ፡ «ኤሌ ኤሌ ላጋ፤ ታ ኔስ ዮቶንታ ዲሺን ሎዱ ሂሰቶፋ» ጋዴስ።

25 ሄሳ ጊሻስ ኢዛ ጸሳ ናቤዚ ዲዛሶ ፑዴ ቃርሜሎሴ ዙማ ቦላ ኬዛዱስ። ጸሳ ናቤዚካ ኢዞ ሃሆን ቤኢዲ ባ ኦሳንቻ ጊያዜ፡ «ሴኪ ሰኔሜ ማጫሳዮ ቤያይ!

26 ኣኔ ኢዚኮ ዋጸ ባዳ፡ «ኣዜ! ሎኦ ጊዴኔ? ኔ ኣዚናይ ሎኦ ጊዴኔ? ኔ ናዚ ሎኦ ጊዴኔ?» ጋዳ ኢዞ ኦይቻ» ጊዴስ። ኢዛካ ኢዛስ፡ «ኡባይካ ሎኦ» ጋዴስ።

27 እዚ ጸሳ ናቤዚ ዲዛ ዙማ ቦላ ጋኪዳ ማላ እዚ ቶ ቦላ ጸጹታዲብ፤ ጊያዜይ እዚ ዩዲሳናሰ ቢሺን ጸሳ ናቤዚ ጊያዜ፡ «እዚ ዳሮ ኡንኤቲዳ ጊሻሰ ኣጋ፤ እዚ ቦቾፋ፤ ጎዳይ ሃይሳ ታፔ ኣዛሰ ጌንሉዳኮ ሃይሲ ታሰ ጌሊቤና» ጊዴሰ።

28 እዚ፡ «ታ ጎዳ! ታ ኔና ታሰ ና እማ ጋዳ ኦይቻዲና? ጮ ሃዳ ሂደታ ኔ ታሰ እሞንታ ማላ ታ ኔሰ ዮታቤኪና?» ጋዲሰ።

29 ኤልሳኢ ጊያዜሰ፡ «ሂሰቲኮ ኔኒ ኔ ጌላ ሚንሳ ጊጸዳ ሃይሳ ታ ጉፊዛ ኤካዳ ዋጸ፤ ኦጌ ቦላ ኣሴ ዳሚኮካ ሳሮኮፋ፤ ኦኒካ ኔና ሳሮ ጊኮ ዛሮ ሳሮኮፋ፤ ሃይሳ ታ ጉፊዛ ኤፋዳ ናዛ ሲንሳን ዋላ» ጊዴሰ።

30 ናዛ ኣያ ቃሴ፡ «ዳኦ ጎዳይ ቤዪን ኔ ኣሾ! ታ ኔና ኣጋዳ ሙሌካ ቢኬ» ጋዲሰ፤ ሄሳ ጊሻሰ ኤልሳኢ ዳንዲዲ እዚ ካሊዴሰ።

31 ጊያዜይካ ኢሰታፊ ሲንሳቲ ቢዲ ጉፊዛ ናዛ ሲንሳን ዋሊዴሰ፤ ጊዶ ኣቲን ኣይኮ ቃላይ ሲዬቲቤና፤ ማላታይካ ቤቲቤና፤ ሄሳ ጊሻሰ ጊያዜይ ጉዬ ኤልሳኤኮ ሲሚ ቢዲ፡ «ናዚ ቤጊቤና» ጊዴሰ።

32 ኤልሳኢ ሶ ጌሊዲ ናዚ ሃይቂዲ እዚ ሂሳ ቦላ ኢቺ ዲዛይሳ ቤኢዴሰ።

33 እዚ ጊዶ ጌሊዲ ካሬዛ ባ ቦላኔ ናዛ ቦላ ጎርዲዲ ጎዳ ዋሲዴሰ።

34 ሂሳ ቦላ ኬዚዲ ናዛ ቦላ ዛቁሊዲ ባ ዶና እዚ ዶናራ፡ ባ ኣይፊ እዚ ኣይፊራ፡ ባ ኩሼ እዚ ኩሼራ ጋሊ ዋሊዴሰ፤ ናዛ ቦላ ሙሊራ እዚ ዛቁሊን ናዛ ቦላይ ሆኢ ሆኢ ቢዴሰ።

35 ኤልሳኢ ዳንዲዲ ኬላ ጊዶን ያኔ ሃ ሲሜሬቲዳፔ ጉዬ ሂሳን ኬዚዲ ቃሴካ ናዛ ቦላ ሙሊራ ዛቁሊዴሰ፤ ናዚ ላፑንቶ ጺሺን እዚ ኣይፊቲ ጸሊዳ።

36 ኤልሳኢ ጊያዜ ዳይጊዲ፡ «ሱኔሜ ማጫሳዮ ሃ ጸይጋ» ጊዴሰ፤ እዚካ እዚ ዳይጊዴሰ፤ እዚ ያ ጋኪዳ ማላ፡ «ሄይ ኔ ናዛ ኤካ» ጊዴሰ

37 እዛካ ጌላዳ እዚ ቶ ቦላ ኩንዳዲሰ፤ ዱጌ ቢታን ጉፋናዳ ባ ናዛ ኤካ ኬዛዲሰ።

ማርኬራ ዲዛ ዋጾ

38 ኤልሳኢ ኣጊ ጌልጌላ ሲሚዴሰ፤ ሄ ዳሬዛን ኮሻይ ዴሰ። ናቤታ ማባራይ እዚ ሲንሉ ሸቂ ዲሺን ኤልሳኢ ባ ኦሳንቻዛ፡ «ዋጋ ዲሰቲ ታማ ቦላ ዋላዳ ሃይሳ ኣሳሰ ዋጾ ካላ» ጊዴሰ።

39 ኢስታ ጋርሳፌ ኢሶይ ሳንፌ ሚሳቲዛ ሃይላታ ማጻናሰ ጌዴ ዴምባ ኬዚዲ ባዞን ሞኪዛ ቱራ ዴሚዲ ሄ ቱራዛፔ ጎሴ ሚሳቲዛ አይፌ ባ ማይኦን ማጸ ኤኪዲ ሲሚዴሰ፤ ኢዛ ኣንጨዲ ዲሰቲን ኬሚዴሰ ሺን ኢዚ ኣዛኮ ኦኒካ ኤሪቤና።

40 ኣሳይ ማና ማላ ዎጼዚ ዱቄቲ ኬዚዴሰ፤ ኣሳይ ቡሮ ባዲዳ ማላ፡ «ጸሳ ናቤዙ! ዲሰታ ጊዶን ዎዲዛ ማርዜይ ዴሰ!» ጊዲ ዋሲዳ፤ ማናሰካ ዳንዳይቤቲና።

41 ኤልሳኢካ፡ «ኣኔ ታሰ ዲሌ ኤኪ ዩቲ» ጊዴሰ። ሄ ዲሌዛካ ኤኪዲ ዲሰቲዛን ጉጁዲ፡ «ኣሳይ ማና ማላ ኣሳሰ ኢሚቲ» ጊዴሰ። ዲሰቲዛን ቆሆ ጋሊዛ ሚሺ ቤቲቤና።

ኤልሳኢ ሚዚዳ ኣሳ

42 ኢሳዴይ ሻቻ ባንጋፌ ካጺዳ ናምኡ ታሙ ቁንቶኔ ጉላ ቲያ ቄሪ ሉካሞን ኤኪዲ ባኣሊ-ሻሊሻፔ ጸሳ ናቤኮ ዩዴሰ። ኤልሳኢካ ባ ኣይሌዛሰ፡ «ኣሳይ ማና ማላ ኣሳሰ ኢማ» ጊዴሰ።

43 ኣሸካራዚካ፡ «ታኒ ሃኖ ዎሰታ ጾቱ ኣሳሰ ጋሶ?» ጊዲ ኢዛ ኦይቹዴሰ። ኤልሳኢ ጊዲኮ ኢዛሰ፡ «ኣሳይ ማና ማላ ኢሰታሰ ኢማ፤ ጎዳይ፡ (ኢሰታ ሚ ካሊን ኢሰታፌ ፓላሃና) ጌሰ» ጊዴሰ።

44 ሄሳፌ ጉዬ ኢዚ ኣሳሰ ሺሺዴሰ፤ ጎዳይ ጊዳ ማላካ ኣሳይ ሚ ካሊን ፓላሂ ኣቲዴሰ።

5

ኢንቺራቻ ሃርጌፌ ኒኢማኔ ፓጾ

1 ሄ ዎዴ ኒኢማኔይ ኣራሚ ካዎ ኦላንቻታ ኣዛዚዛይሳ፤ ጎዳይ ኢዛ ባጋራ ኣራሚ ዴሬይ ጸኖ ዴማና ማላ ኦሊዳ ጊሻሰ ኢዚ ባ ጎዳ ኣቻን ዳር ጌታኔ ቦንቹቲዳ ኣሳ። ኢዚ ኦላ ቃራ ጊዲኮካ ኢንቺራቻ ሃርጌይ ኢዛ ቦላ ዎዲዴሰ።

2 ፓንጋቲ ኣራሚፔ ኬዚዲ ኢሰራኤሌ ዴሬፔ ኢሲ ጌላኦኖ ዲኢ ኤፊን ኢዛ ኒኢማኔሲኔ ማቹይሰ ሃጋዛዉሰ።

3 ኢዛ ባ ጎዳቲይሰ፡ «ታ ጎዳይ ሳማሪያን ዲዛ ናቤዛኮ ቢዲ ኢዛ ዴሚዳኮ ኢዚ ሃይሳ ኢንቺራቻ ሃርጌዛፔ ኢዛ ፓላናኮሺን» ጋዲሰ።

4 ኒኢማኔይካ ባ ጎዳዛኮ ቢዲ ኢሰራኤሌ ዴሬፔ ዩዳ ናያ ኢዛሰ ዮቶይሳ ዛሪ ዮቲዴሰ።

5 ኣራሚ ካዎዚካ ኢዛሰ፡ «ሂሰቲኮ ኔ ሃኢ ኤሶን ባ፤ ታኒካ ኢሰራኤሌ ካዎሰ ዳብዳቤ ጸፋና» ጊዴሰ፤ ሄሳ ጊሻሰ ኒኢማኔይ

ኢዛስ 30,000 ሳቂሌ ቢራ፣ 6,000 ሳቂሌ ዋርቃኔ 10 ኩሜላ ማይኦ ኤኪ ቢደሰ።

⁶ ኢስራኤል ካዎዛስ ኢዚ ኤኪ ቢዛ ዳብዳቤዚ፣ «ኔ ኢዛ ኢንቺራቻ ሃርጌዛፔ ፓላና ማላ ታኒ ሃይሳ ዳብዳቤዛራ ጋላ ታ ኦሳንቻ ኒኢማኔ ኔኮ ዩዳዲስ» ጊዛዛ።

⁷ ኢስራኤል ካዎዚ ዳብዳቤዛ ናባቢዳ ማላ ባ ማይኦ ዳኪዲ «ታኒ ኢዛ ኢንቺራቻ ሃርጌፌ ፓላና ማላ ኢዚ ታኮ ዩዳናስ ታኒ ዋዳዳ ፓላና ዳንዳይዛ ጸሴ? ሃይሳ ኢዚ ታናራ ኦዬታና ኮይዛይሳ ቤኢቱ» ጊዳሰ።

⁸ ጸሳ አሲ ኤልሳኢ ኢስራኤል ካዎይ ባ ማይኦ ዳኪዳይሳ ሲዩዳ ማላ፣ «ኔኒ ኔ ማይኦ ኣዛስ ዳካዲ? ኣዴዚ ሃ ታኮ ዮ፤ ሄሳፌ ጉዬ ናቤይ ኢስራኤልን ዲዛይሳ ኢዚ ኤራና» ጊዛ ከታ ዩዲደሰ።

⁹ ሄሳ ጊሻስ ኒኢማኔይ ባ ፓራ-ጋሬን ኡቲዲ ኤልሳኤ ከላ ፔንጌ ጋኪ ኤቂደሰ።

¹⁰ ኤልሳኢካ ኢዛ፣ «ባዳ ዮርዳኖሴ ሻፋን ላፑንቶ ጌላ ሜጤታ፤ ኔ አሻይ ፓጻና፤ ኔካ ጌያና» ጊዲ ኢዛስ ዮታና ማላ ኣስ ከታ ዩዲደሰ።

¹¹ ኒኢማኔይ ጊዲኮ ሃንቄቲዲ፣ «ኢዚ ታኮ ዩ ኤቂዲ ጎዳ ባ ጸሳ ሱንል ጳይጊዲ ኢዚ ባ ኩሼን ታ ኢንቺራቻዛ ቦሼሬሊዲ ታና ኢንቺራቻ ሃርጌዛፔ ፓላንዳ ጋ ቆፓዲስ።

¹² ሃይሳስ ሃይሳስ ጊዲኮ ዳማስቆ ሻፋቲ ኣማናይኔ ፋርፋሬይ ኣዋንካ ዲዛ ኢስራኤል ዳሬ ሃላታፔ ሎኤቲኔ? ሜጤቴሊ ሜጤቴል ጊዲኮ ኢስታን ሜጤታ ጌይኪና?» ጊሼ ሃንቄቲ ሲሚደሰ።

¹³ ኒኢማኔ አሽካራቲ ኢዛኮ ሸቂዲ፣ «ጎዶ ናቤዚ ሃይሳፌካ ጌታ ሚሽ ኔስ ዮቲዳኮ ኔኒ ኢዚ ጊዳይሳ ኦሊኪ? ሂስቲን ኔና፣ ሃኢ ሜጤታዳ ጌያ» ጊን ኢዛን ኔና ሜቶሊዳይ ኣዜ?» ጊዲ።

¹⁴ ሄሳ ጊሻስ ኒኢማኔይ ዲጌ ሻፋን ዋዳዲ ጸሳ ናቤዚ ኢዛስ ዮቲዳ ማላ ዮርዳኖሴን ላፑንቶ ጌሊ ኬዚደሰ፤ ኢዛ ቦላይካ ጌዪዲ ጉላ ና ቦላ ማላ ጊዲደሰ።

¹⁵ ሄሳፌ ጉዬ ኒኢማኔይ ባና ካሊ ዩዳ ኣሳ ኡባራ ጌዴ ጸሳ ናቤኮ ሲሚ ቢደሰ፤ ኢዛ ሲንላን ኣዲ ኤቂዲ፣ «ሄኮ ኢስራኤል ዳሬንፔ ኣቲን ኩሜላ ኣላሚን ኡባን ሃራ ጸሲ ባይንዳይሳ ታኒ ኤራዲስ፤ ሄሳ ጊሻስ ኔኒ ታፔ ኔ ኣይሌዛፔ ኢሞታ ኤካና ማላ ታ ኔና ዋሳይስ» ጊደሰ።

16 ናቤዚካ ኢዛስ፡ «ታኒ ኢዛስ ሃጋዚዛ ዴኦ ጎዳይ ቤዪን ታ ኔፔ ሄሳ ኤኪኬ» ጊደስ። ኒኢማኔይ ኢዛ ሜቶሊ ዋሲንካ ኤልሳኢ ኢዛ ኢሞታ ኤኪቤና።

17 ኒኢማኔይ ኢዛስ፡ «ኔኒ ታ ኢሚዛ ኢሞታ ኤኮንታ ኢጺኮ፡ ጎዳፔ ኣቲን ሃራ ኣይ ጸሳሰካ ጸጌቲዛ ያርሾ ዋይኮ ሃራ ያርሾ ታ ያርሾንታ ጊሻሰ ናሞኡ ባቁሎ ጫና ቢታ ታ ኤካ ባናይሳ ኔ ታና ደሳንታ ማላ ታ ኔና ዋሳይሰ።

18 ጊደ ኣቲን ጎዳይ ኢሲ ሚሻ ጊሻሰ ታና ኔ ኣይሌዛ ማር፤ ሄሰካ ታ ጎዳይ ጎይናናሰ ኣርሞኔ ኤቃ ጸሳ ሶ ጌሊሺን ታ ቄሴ ኢዚ ኦይኪ ማዲሼ ኢዛይሳላ ታኒካ ሄን ጎይኒኮ ኣርሞኔ ኤቃ ጸሳ ሶን ታ ጎይኒዳይሳሰ ጎዳይ ታና ኔ ኣይሌዛ ማር» ጊደስ።

19 ኤልሳኢካ ኢዛ፡ «ሳርን ባ» ጊደስ። ኒኢማኔይ ኢዛፔ ጉል ሃኪ ቢዳ ማላ፡

20 ጸሳ ናቤዛ ኣሽካራ ጊያዜይ፡ «ታ ጎዳይ ሃይሲ ኣራሚ ዴሪ ኣሰ ኒኢማኔይ ኢዛስ ኤሂዳይሳ ኤኮንታ ጮ ሚላ ዬዲዴስ፤ ዴኦ ጎዳይ ቤዪን ታ ኢዛ ካላ ባዳ ኢዛፔ ኢሲ ሚሻ ኤካናሰ ቤሴስ» ጊ ቆፒደስ።

21 ሄሳ ጊሻሰ ጊያዜይ ኒኢማኔ ካሊ ቢዴስ፤ ኒኢማኔይ ጊያዜይ ኢዛኮ ዋሳን ካሊ ዩዛይሳ ቤኢዲ ኢዛ ሃሳይሳናሰ ፓራ-ጋሬዛፔ ጋዴን ዋዲዲ፡ «ኣዜ ሎኦ ጊዴኔ?» ጊዲ ኢዛ ኦይቺደስ።

22 ጊያዜይካ ኢዛስ፡ «ኡባይካ ሎኦሺን ታ ጎዳይ ኔና፡ ናቤታ ማባራፔ ናሞኡ ናቲላቲ ቦላ ኤፍሬሚ ጌዜፌ ሃ ታኮ ኣይኮካ ታ ቆፖንታ ዩዳ ጊሻሰ 3,000 ቢራኔ ናሞኡ ኩሜላ ማይኦ ኢሰታሰ ኢማ» ጋዳ ዮታ» ጊዲ ታና ኔኮ ከቲደስ።

23 ኒኢማኔይካ «ሂሰቲኮ 6,000 ሳቂሌ ቢራ ሄይ ኤካ» ጊዲ ጊያዜ ሚንሉ ዋሲደስ። ሄሳፌ ጉዬ 6,000 ሳቂሌ ቢራ ኤኪ ናሞኡ ካራጺቲን ጌልሉ ቃቺዲ ናሞኡ ኩሜላ ማይኦዛ ጉጂ ኤኪዲ ናሞኡ ኣይሌታ ኦይሉደስ። ኢሰቲካ ሄሳ ቶኪ ኤኪዲ ጊያዜፔ ሲንሌ ኣጂ ቢዳ።

24 ጊያዜይ ቢዲ ፑዴ ዙሞቡላ ቦላ ጋኪዳ ማላ ሚሻዛ ኣይሌታፔ ኤኪዲ ባ ኬላን ዋሉደስ፤ ሂሰቲዲ ኣሳታ ሞይዚን ኣሳቲ ሲሚ ቢዳ።

25 ሄሳፌ ጉዬ ጊያዜይ ጌሊዲ ባ ጎዳ ኤልሳኤ ሲንላን ኣጂ ኤቂደስ።

ኤልሳኢካ ኢዛ፡ «ጊያዜ ኔ ኣዋ ባዲ?» ጊዲ ኢዛ ኦይቺደስ። ጊያዜይካ ኢዛስ፡ «ታ ኔ ኣይሌይ ኣዋካ ባቤኬ» ጊ ዛሪደስ።

26 ጊደ አቲን ኤልሳኢ ኢዛሰ፡ «ሄ አዳዚ ኔናራ ጋይታናሰ ኢዚ ባ ፓራ-ጋሬዛፔ ዋዲሺን ታ አያናይ ኔናራ ቢቤኔ? ሂሰቲን ሃይሲ ዋዳዚ ሚሼኔ ማይኦ፡ ዋጋራ ሚሊኔ ዋይኔ ቶኪዛሶሆ፡ ዶርሳ ወዴኔ ማሄ ወዴ፡ አቱማኔ ማጫ አይሌታ ኤኪዛ ዋዳ?

27 ሄሳ ጊሻሰ ኒኢማኔ ኢንቺራቻይ ኔ ቦላ አጳና፤ ሜርና ጋካናሰ ኔሰ ዜሬላፌ ዜሬላን አጳና» ጊዴሰ፡ ሄሳፌ ጉዬ ጊያዜይ ኤልሳኢ ሲንሳፌ ኬዚ ቢዴሰ፤ ኢንቺራቻ ሃርጌይ ኢዛ ቦላ ሻቻ ማላ ቦሊዴሰ፡

6

ሃላ ቦላ ካልታ ቶኬቲል

1 ናቤታ ማባራይ ኤልሳኢ፡ «ሄኮ ሃኢ ኑሰ ኔ ሲንላን ኡቲዛሶይ ኤንኢዴሰ፤

2 ሄሳ ጊሻሰ ኑኒ ዱጌ ዮርዳኖሴ ቢዲ ኑሰ ኢሲ ኢሲ ቱሰ ቃንጺ ኤኪ ያና፤ ኑ ኢዛን ዳናሰ ኬል ኬጻና» ጊዴ፤ ኢዚካ ኢሰታሰ፡ «ኤሮ ቢቲ» ጊዴሰ፡

3 ኢሰታ ጊዶፌ አሳዳይ ኢዛ፡ «ኔኒ ኔ ኦሳንቻታራ ኢሲፌ ቢኪ?» ጊዴሰ፡ ኤልሳኢካ፡ «ኤሮ ታ ባና» ጊዴሰ፡

4 ኢዚ ኢሰታራ ኢሲፌ ቢዴሰ፤ ኢሰቲካ ቢዲ ዮርዳኖሴን ሚል ቃንጺ ኦይኪዴ፡

5 ኢሰታ ጋርሳፌ ኢሶይ ሚላ ቃንጺሺን ካልታዚ ኩሼፔ ኬሲ ኤኪዲ ሃላ ጊዶ ጌሊዴሰ፤ ኢዚካ፡ «ታ ጎዶ ታኒ ፓላን ጋካዲሰ! ታኒ አሳፔ ጋርጸ ኤኪዳ ካልታኮ!» ጊ ዋሲዴሰ፡

6 ኤልሳኢካ፡ «አዋ ባጋራ ጌሊዴ?» ጊዲ ኢዛ ኦይቺዴሰ፡ ኢዚ ጌሊዳሶዛ ቤሲን ኤልሳኢ ሚል ሚንሊ ኤኪዲ ዱጌ ሃላ ጊዶ ዬጊዲ ካልታዚ ፑዴ ሃላ ቦላ ቶኬታና ማላ ኦሊዴሰ፡

7 ሄሳፌ ጉዬ፡ «አኔ ሃኢ ኬሳዳ ኤካ» ጊዴሰ፤ አዳዚ ኩሼ ዬዲዲ ካልታዛ ኤኪዴሰ፡

አራሜ ኦላንቻታ ጸኔቲል

8 ሄ ዋዳ አራሜ ካዋይ ኢሰራኤሌራ ኦሌቲሰ፤ ኢዚ ባ ኦላንቻታ ሃላቃታራ ኢሲፌ ዘሬቲዳፔ ጉዬ፡ «ሃይሳን ታ ኡታና» ጊዴሰ፡

9 ጸሳ ናቤዚ፡ «አራሜ አሳይ ሄሳራ ዱጌ ዋዲዳ ጊሻሰ ሄራ ኔ አጵንታ ማላ ናጌታ» ጊዲ ኢሰራኤሌ ካዋዛሰ ኪታ ዬዲዴሰ፡

10 ሄሳ ጊሻሰ ኢሰራኤሌ ካዋዚ ጸሳ አሲ ኢዛሰ ዮቲዳሶሆዛ ጸዋሳና ማላ አሰ ኪቲዴሰ፤ ኤልሳኢካ ካዋዚ ሄይታንታ ማላ ሶሆታፔ ባና ናጋና ማላ ዛሪ ዛሪ ቆፍሲዴሰ፡

11 ሄሲ አራሜ ካዎዛ ኬሂ ሸኔቺዳ ገሻሰ ባ ኦላንቻታ አዛዚዛይታ ባኮ ጸይገ ሸሺዲ፡ «ኮ ጊደፌ ኢሰራኤል ካዎራ ላጌቲዛ አሲ ዲዛይሳ እንቴ ታሰ አይሰ ዮቴኬቲ?» ጊ ኦይቺዴሰ።

12 ኦላንቻታ አዛዚዛይታ፤ ኢሶይ፡ «ታ ጎዳ ካዎ! ኮ ባጋፌ ኦኒካ ዴና፤ ጊደ ኦቲን ኔኒ ኔ ኢልፒኔን ዳሼ ሃሳይዛይሳ ኢሲኖካ ኦሾንታ ኢሰራኤል ካዎሰ ዮቲዛ አሲ ኢሰራኤል ዴሬን ናቤ ኤልሳኢ ዴሰ» ጊዴሰ።

13 ካዎዚካ፡ «ታኒ አሰ ዬዳዳ ኢዛ ኦይፋና ማላ ኢዚ አዋን ዲዛኮ ኢዚ ዲዛሶ ኮዩቴ» ጊዲ አዛዚዴሰ። ሄሳፌ ጉዬ፡ «ኢዚ ደታኔን ዴሰ» ጊዛ ዋሬይ ኢዛኮ ጋኪዴሰ።

14 ሄሳ ገሻሰ ኢዚ ፓራታ፡ ፓራ-ጋሬታኔ ዳሮ ኦላንቻታ ሄ ዬዲዴሰ። ሄይቲካ ቢዲ ካታማዮ ኦማርሰ ጊደሊዳ።

15 ጸሳ ናቤዛሰ አይሌይ ዋንታራ ኢዚ ካሬ ኬዚሺን ፓራታኒኔ ፓራ-ጋሬታን ሚኒዳ ዋልቃማ ኦላንቻቲ ካታማዮ ዩዩ አጂ ዲዛይሳ ቤኢዲ፡ «ጎዶ! ኮ አይ ኦሊኮ ሎኮ?» ጊዲ ኦይቺዴሰ።

16 ናቤዚካ፡ «ኦናራ ዲዛይቲ ኢሰታራ ዲዛይታ፤ አጂዛ ገሻሰ ባቦፋ» ጊዴሰ።

17 ኤልሳኢካ፡ «አቤት ጎዳዉ! ኢዚ ባ አይፌራ ቤኦና ማላ ኔ ኢዛ አይፌታ ዶያ» ጊ ዋሲዴሰ፤ ጎዳይ ኢዛ አይሌዛ አይፌታ ዶይኢዴሰ፤ ኢዚ ጸሊሺን ታማ ፓራቲኔ ፓራ-ጋሬቲ ኤልሳኤ ዩሾን ዙማን ኩሚዳይሳ ቤኢዴሰ።

18 አራሜ ኦላ አሳይ ዴጌ ዋጂዲ ኢዛኮ ዩሺን ኤልሳኢ ቤኢዲ፡ «ጎዶ! ኔ ሃይሳ ዴራ ቆቂሳ» ጊዲ ዋሲዴሰ፤ ሄሳ ገሻሰ ኤልሳኢ ዋሲዳ ማላ ጎዳይ ኢሰታ ቆቂሲዴሰ።

19 ኤልሳኢካ ኢሰታሰ፡ «ኦጌይ ሃይሳራ ዴና፤ ካታማያካ ሃኖ ጊዲኩ፤ ታኒ እንቴና እንቴ ኮይዛዴኮ ካሌላ ጋላና፤ ሃ ታና ካሊቴ» ጊዴሰ። ሄሳፌ ጉዬ ኢሰታ ካሌሊ ኤኪዲ ሳማሪያ ኤፌዴሰ።

20 ኢሰቲ ቢዲ ሄ ካታማዮ ጌለን ኤልሳኢ «ጎዳዉ! ሃይቲ ጸላና ማላ ኔ ኢሰታ አይፌ ዶያ» ጊዴሰ። ጎዳይካ ኢሰታ አይፌ ዶይዴሰ፤ ኢሰቲካ ባንቲ ሳማሪያ ጊደን ዲዛይሳ ቤኢዲ።

21 ኢሰራኤል ካዎዚ ኢሰታ ቤኢዲ፡ «ታ አዋዉ! ታ ኢሰታ ዋጶ? ኢሲ ቦላ ዲፒ ሂሰቶ?» ጊዲ ኤልሳኤ ኦይቺዴሰ።

22 ኤልሳኢካ፡ «ዋጶፓ፤ ኔ ማሻኒኔ ቶራን ዲኦ ኤሂዳይታ ዋጶናሰ ኔሰ ቤሰዜ? ኦኔ ኔ ሃኢ ኢሰታሰ ማናዚኔ ኡያናዝ ኢማ፤ ኢሰቲ ሚዲኔ ኡዬዲ ጌዴ ባ ጎዳኮ ቤቶ!» ጊዴሰ።

23 ሄሳ ገሻሰ ገታ ገቢራ ኢስታሰ ገግሲን ሚዳፔኔ ኡዱዳፔ ጉዬ ጌዴ ኢስታ ጎዳኮ ኢስታ ሞይዚ ዬዲን ቢዳ። አራሜ ኦላንቻቲ ናሞኣንፉ ኢስራኤል ቦላ ዋራጂቤቴና።

ካዎ ቤኒ-ሃዳዴይ ሳማሪያ ዶዴስ

24 ጉላ ዋዴፔ ጉዬ አራሜ ካዎ ቤኒ-ሃዳዴይ ባ ኦላንቻታ ኢሲ ቦላ ሺሺዴስ፤ ኬዚ ቢዲ ሳማሪያ ገዶላዴስ።

25 ኢዚ ሄ ካታማዮ ገዶላዴ ማላ ኢሲ ሃሬ ሁኤይ 80 ሳቂሌ ቢራ፥ ናሞኡ ጸቱ ገዲዛ ሃራጾ ሺያይ ኢቻሽ ሳቂሌ ቢራን ባይዘታና ጋካናሰ ዴሬዛን ገታ ኮሻይ ዴንዲዴስ።

26 ኢስራኤል ካዎዚ ገምቤ ቦላራ ሄማቲሺን ኢሲ ማጫሳያ ባ ቃላ ቶቄ ሂሰታዳ፥ «ታ ጎዳ ካዎ! ታና ማዳርኪ!» ጋዴስ።

27 ካዎዚካ ኢዚስ፥ «ጎዳይ ኔና ማዳንታ ታ ኔና ዋስታ ማዳና ዳንዳያዚና? ታ ኔና ማዳናይ ታ ካላ ባሌዛፔዬ ታ ዋይኔ ጉሞኢዛሶሆፔ?» ገ ዛሪዴስ።

28 ቃሴካ፥ «ኔና ማቲዳይ ኣዜ?» ገዲ ኢዞ ኦይቹዴስ፤ ኢዛካ ካዎዛስ፥ «ሃና ማጫሳያ ታና፥ ሱኒ ሃች ኢሲፌ ማናሰ ኔ ናዛ ሃ ኤካ ያ፤ ዋንቶ ቃሴ ታ ናዛ ኢሲፌ ማና» ጋዴስ።

29 ሂሰቲን ታ ናዛ ዶይሲ ሚዶስ። ዋንቲላ ጋላሰ ቃሴ ኑ ማና ማላ፥ ሱ ናዛ ሃ ኤካ ያ» ታ ገን ኢዛ ባ ናዛ ቆታ ዲጋዴስ» ጋዴስ።

30 ካዎዚካ ማጫሳያ ገዛይሳ ሲዬዲ ባ ማይኢዳ ማይኦዛ ዳኪ ዬገዴስ፤ ካሴ ኢዚ ገምቤዛ ቦላራ ያኔ ሃ ሲሜሬቲሺን ኢዚ ባ ማይኢዳ ማይኦዛፔ ጋርሳራ ማቃ ማይኢዳይሳ ኣሳይ ቤኢዴስ።

31 ካዎዚካ፥ «ሳፋጾ ና ኤልሳኤ ቆጼፔ ጩካ ዬጎንታ ኣይሲኮ ጸሲ ታ ቦላ ሄሳ ኦሶ፤ ሄሳፌካ ቦላራ ኢታ ሚሽ ታ ቦላ ኦሶ» ገዲ ማንዲዴስ።

32 ሄ ዋዴ ኤልሳኢ ባ ሶን ዴስ፤ ጨማ ኣሳይካ ኢዛራ ዴስ። ካዎዚ ኢሲ ኣሲ ኢዛፔ ሲንፋቲ ባና ማላ ኪቲዴስ፤ ሄ ኪቲቲዳ ኣዴዚ ቢ ጋኮንታ ዲሺን ኤልሳኢ ባናራ ዲዛ ጨማታስ፥ «ሃይሲ ሸምፖ ዋጲዛይሲ ታ ቆጼ ቃንጻናሰ ኣሰ ዬዲዳይሳ ቤዬቲ? ኢዚ ኪቶይሲ ሃ ጋኪሺን ኢዚ ሃ ጌሎንታ ማላ ፔንጋ ጎርዲቴ። ኢዛ ጌዶራ ሲዬቲዛይሲ ኢዛ ጎዳዛ ቶሆ ገሪሰ ገዴኔ?» ገዴስ።

33 ኤልሳኢ ጨማታራ ሃሳያ ቦላ ዲሺን ኪቲቲ ዬዳይሲ ዲጌ ኢዛኮ ዋጲዴስ፤ ካዎዚካ ጋኪዲ፥ «ሃይሲ ሜቶዚ ጎዳፔ ዬዴስ፤ ሂሰቲን ሃኢ ታኒ ጎዳፔ ኣይ ናጋዚና?» ገዴስ።

7

1 ኤልሳኢካ ኢዛስ፡ «ሂስቲኮ ኔኒ እኔ ጎዳ ቃላ ሲያ፤ ጎዳይ፡ ዋንቶ ሃኒ ዋዴ ሃኖ ሃ ሳቲዪን ሳማሪያ ካታማ ፔንፔን ሄዙ ኪሎ ሎኦ ጊስቲ ዲሌይ ዋይኮ ኡሱፑን ኪሎ ባንጋይ ኢሲ ሳቂሌን ባይዜታና» ጊዳስ።

2 ካዋዛስ ኬሂ ማታ ጊዲዳ ኦላንቻታ ሃላቃዚ ናበዛ፡ «ሃራይ ኣቲን ጎዳይ ሳሎ ማስኮቲ ዶይዳኮካ ሄሲ ሃናኔ?» ጊ ኦይቺዴስ። ኤልሳኢካ ኢዛስ፡ «ኢዚ ሃኒን ኔ ኢዛ ኔ ኣይፌራ ቤኣና፤ ጊዶ ኣቲን ኢዛፔ ኣይኮካ ኔ ዶናን ጌልላካ» ጊዳስ።

ጊዶዲዳ ኦላንቻታ ባቃታ

3 ሄ ዋዴ ኢንቺራቻ ሃርጌራ ዲዛ ኦይዱ ኣሳቲ ሄ ካታማይስ ጌሊዛ ፔንፔ ኣቻን ዴቲስ፤ ሄይቲ ባ ጋርሳን ኢሶይ ኢሳስ፡ «ኑኒ ኣዛስ ሃይቃና ጋካናስ ሃይሳን ጋምኢዛኒ?»

4 ጌዴ ካታማዮ ኑ ጌላና ጊኮ ሄን ኮሻይ ዲዛ ጊሻስ ኑኒ ኮሻን ሃይቃና፤ ሃን ሃይሳን ዲኮካ ኑስ ሃይቆይ ኣቲና፤ ኣራሜ ኦላንቻታ ጊዶ እኔ ጮኡ ጊዲ ቦስ፤ ኢስቲ ጮኡ ጊኮ ኑ ኣታና፤ ዋዲኮካ ሄን ሃይቃና» ጊዳ።

5 ሃሳፌ ጉዬ ጋዴይ ለምኢ ለምኢሺን ኢስቲ ዴንዲዲ ኣራሜ ኦላንቻቲ ዲዛ ሄራ ቢ ጋኪሺን ሄን ኢሳዴይካ ዴና።

6 ሄሲ ሃኒዳ ጋሶይካ ጎዳይ ኣራሜ ኦላ ኣሳይ ሲያና ማላ ፓራ-ጋሬታ ጊሪስ፡ ቶጋ ፓራ ጊሪስ ሄሳላካ ዳር ኦላ ኣሳ ጊሪስ ኣራሜ ኣሳ ሲሲዳ ጊሻስ ኣሳይ ባ ጋርሳን ኢሶይ ኢሳ፡ «ሄኮ ኢስራኤሌ ካዋይ ኑ ቦላ ሜቶ ዬጋናስ ሂቲ ዴሬ ካዋሲኔ ጊብጼ ዴሬ ካዋስ ሚሼ ኢሚዲ ኑ ቦላ ኤሂዴስ» ጊዳ።

7 ሃሳፌ ጉዬ ሳኣይ ቃማና ጊሺን ባንቲ ዲዛሶፔ ዴንዲዲ ባንታ ዴንካኔታ፡ ፓራታኔ ሃሬታ ኤኮንታ ዬጊ ኣጊዲ ባንታ ሹምፖ ጸላ ኣሻናስ ሄራ ባቃቲ ቢዳ።

8 ሄ ኢንቺራቻ ሃርጋንቻቲ ሄ ኣሳይ ዲዛ ሄራ ጋኪዲ ዴንካኔታፔ ኢሳን ጌሊዲ ሚዳኔ ኡዱዳ፤ ሃሳፌ ጉዬ ቢራ፡ ዋርቃኔ ማይኦ ቢዲ ቆቲዳ፤ ሲሚዲካ ሃራ ሃራ ዴንካኔታን ጌሊዲ ሃራ ዳር ሚሻታካ ኤኪ ቢዲ ቆቲዳ።

9 ኢስቲ ባንታ ጋርሳን ኢሶይ ኢሳ፡ «ሃይሲ ኑ ኦላዴሲ ሎኦ ጊዴና፤ ሃይሲ ጋላሳይ ሚሺራቾ ዮቲዛ ጋላሳ፤ ኑኒ ጊዲኮ ኑስ ጸላ ሂስቲዶስ። ሃይሳፌ ዋንታና ጋካናስ ኑ ጮኡ ጊኮ ኑ ሞራንቻ ጊዶስ፤ ሄሳ ጊሻስ እኔ ካዋሶ ኤሶን ቢዲ ሃይሳ ዮቶስ» ጊዳ።

10 ሄሳ ጊሻሰ ኢስቲ ቢዲ ካታማዮ ጌሊዛ ፔንጌ ናጊዛይታ ዋሲ ዳይጊዲ፡ «ኑኒ አራሜ አሳይ ዲዛሶ ቢ ጌሊደስ፤ ሄን ቃሽቲ ዲዛ ፓራቲኔ ሃሬቲ ኣቲን ሃራይ ኢሲ አሲካ ዳና፤ አይ አሳ ቃላይካ ሴቲቲቤና፤ ዲንካናይካ ባ ዲዛ ማላ ዴስ» ጊዲ ዮቲዳ።

11 ፔንጌዛ ናጊዛይቲካ ሄሳ ሲዪዲ ባ ሲዪዲሳ አሳስ ዛሪ ዮቲዳ፤ ሄ ዋሬዚ ቢዲ ካዎ ኬፋን ሴቲቲዴስ።

12 ካዎዚ ዎንታ ማላዶ ዴንዲዲ ባ ኦላንቻታ ሃላቃታስ፡ «አራሜ አሳይ ኑና አይ ኦሊዳኮ ታ ኢንቴስ ዮታይስ፤ ኑኒ ጋፊዳይሳ ኢስቲ ኤሪዛ ጊሻሰ፡ «ኢስቲ ሃ ኬዘንታ ኣጌቴና፤ ኢስቲ ኬዚኮ ኦ ኢስታ ሼምፖራ ፓጻ ኦይኪ ዲአና፤ ሂስቲዲ ጌዴ ኢስታ ካታማዮ ሲቲ ጊዲ ኦ ጌላና» ጊዲ ጌዴ ዴሬ ጊዶን ቆቴታናስ ካሴ ዲዛሶ፤ ኬዚዳ» ጊዴስ።

13 ኦላንቻታ ሃላቃታ፤ ኢሶይ፡ «ጉፋ አሳቲ ካታማ ጋርሳን ኣቲዳ ፓራታ፤ ኢቻሻታ ኤኪ ቤቶ፤ ኢስታ ሳማይ ሄን ኣቲዳ ኢስራኤል አሳ ሳማራ ኢሲና፤ ኢስቲ ናጊዛይ ዲኮ ሃይቂ ወሪዳ ኢስራኤል አሳ፡ ሃይቆ ጸላ፡ ሄሳ ጊሻሰ ኦ ኣኔ ኢስታ ከቲ ዬዲዲ ሃኒዳይሳ ቤዮስ» ጊዴስ።

14 ሄሳ ጊሻሰ ናምኡ ፓራ-ጋሬታ ፓራታራ ዶሪዳ፤ ካዎዚካ «ኢንቴ ቢዲ ሃኒዳዝ ኡባካ ጴሊቲ» ጊዲ አራሜ ኦላንቻታ ጉዬራ ባና ማላ አሊ ዬዲዴስ።

15 ኢስቲካ ዮርዳኖሴ ሻፋ ጋካናስ ኢስታ ካሊ ቢዳ። አራሜ አሳይ ኤሶን ባቃቲሼ ዬጊ ቢዳ ማይኦኔ ሚሻታ ኦጌይ ዲዛሶን ዲዛሶን ላሌቲዳይሳ ዴሚዳ፤ ሄ ከቲቲዳይቲካ ጉዬ ሲሚዲ ባ ቤይዳይሳ ካዎዛስ ዮቲዳ።

16 ሄሳፊ ጉዬ ዴሬዚ ኬዚዲ አራሜ ኦላንቻታስ ዲዛ አቆታ ባስ ኤኪዴስ፤ ሄሳ ጊሻሰ ካሴ ጎዳይ ዮቲዳ ማላ ሄቩ ኪሎ ጊስቲ ጳሌይ ዋይኮ ኡሱፑን ኪሎ ባንጋይ ኢሲ ሳቂሌን ባይዜቲዴስ።

17 ሄ ዎዴ ካዎዛስ ኬሂ ማታ ጊዲዳ ኦላንቻታ ሃላቃዛ ካዎይ ጊምቤዛ ፔንጌ ናጋና ማላ ሹሚዴስ፤ ሂስቲን ዴሬይ ኬዚዛ ካታማ ፔንጌን ሱጌቲሼ ኢዛ ዬዴሬሊዴስ። ሄ ጸሳ ናቤይ ካሴ ካዎዚ ኢዛኮ ዪን ዮቲዳ ማላ ኢዛ ኦላንቻታ ኣዛዚዛይሲ ሃይቂዴስ።

18 ሄሳፋካ ጸሳ ናቤዚ ካዎዛስ፡ «ዎንቶ ሃኒ ዎዴ ሳማሪያ ፔንጌን ሄቩ ኪሎ ጊስቲ ጳሌይ ዋይኮ ኡሱፑን ኪሎ ባንጋይ ኢሲ ሳቂሌን ባይዜታና» ጊዳ ማላ ፖሌቲዴስ።

19 እላንቻታ አዛዚዛይሲ ጸሳ ናቤዛሰ፡ «ሃራይ ኣቲን ጎዳይ ሳሎ ማሰኮቲ ዶይዳኮ ሄሲ ሃናኔ?» ጊዳ ጊሻሰ ጸሳ ናቤዚ «ኔኒ ሄሳ ኔ ኣይፌራ ቤያና ጊዶ ኣቲን ኔ ኢዛፔ ኣይኮካ ማካ» ጊዲ ካሴ ኢዛሰ ዛሮ ኢሚዴሰ።

20 ጌሊዛ ፔንጌ ቦላ ዳሬይ ኢዛ ዬጼቲን ኢዚ ሃይቂዳ ጊሻሰ ካሴ ዮቴቲዳ ቲንቢቲይ ኢዛ ቦላ ፖሌቲዴሰ።

8

ሱኔሚ ማጫሳያ ዳሬ ሲሞ

1 ሄ ዎዴ ካሴ ኤልሳኢ ኢዚ ናዛ ሃይቆፔ ዴንፊዳ ማጫሳይሰ ጸሲ፡ «ሃ ቢታ ቦላ ላፑን ላይላ ኮሻይ ዴንዳና ማላ ጎዳይ ቃቺዳ ጊሻሰ ኔኒ ዴንዳ፤ ሄ ዎዴይ ኣፋና ጋካናሰ ኔሶ ኣሳራ ኔ ዳናሶ ባሻ» ጊዴሰ።

2 ማጫሳያካ ጸሳ ናቤዚ ኢዚሰ ዮቲዳ ማላ ሃናዴሰ፤ ባ ሶ ኣሳራ ዴንዳ ባዳ ፊሊሰጾሚ ዳሬን ላፑን ላይላ ኡታዴሰ።

3 ላፑን ላይላፌ ጉዬ ፊሊሰጾሚ ዳሬፔ ባ ዳሬ ሲማዴሰ፤ ባ ኬላ ጊሻሰኒ ባ ጋዴ ጊሻሰ ካዎዛሰ ኣቤት ጋናሰ ኢዛኮ ባዴሰ።

4 ሄ ዎዴ ካዎዚ ጸሳ ናቤዛ ኣይሌ ጊያዜ፡ «ኤልሳኢ ካሴ ኡፊዳ ጌታ ሚሻታ ኔ ኣኔ ታሰ ዮታ» ጊ ኦይቺሼ ጋሞኢዴሰ።

5 ኤልሳኢ ኢዚ ናዛ ሃይቆፔ ዴንፊዳ ናዛ ኣያ ባ ኬላ ጊሻሰኒ ባ ጋዴ ጊሻሰ ካዎዛሰ ዋሳናሰ ካዎዛኮ ጌሊዳ ዎዴ ኤልሳኢ ኢዚ ናዛ ሃይቆፔ ዎሰቲ ዴንፊዳኮ ጊያዜይ ካዎዛሰ ዮቲዴሰ።

ጊያዜይካ ካዎዛሰ፡ «ታ ጎዳ ካዎ! ኢዚ ናዛ ኤልሳኢ ዴንፊዳ ማጫሳያ ሃኖ፤ ኢዚ ሃይቆፔ ዴንፊዳ ናዚካ ሃይሳ» ጊዴሰ።

6 ካዎዚ ሄሳ ሄ ዮኦዛ ጊሻሰ ኢዛ ኦይቺን ኢዛካ ዮታዴሰ። ሄሳፌ ጉዬ ካዎዚ፡ «ካሴ ኢዚ ሚሽኔ ኢዛ ዬጋ ቦሶፌ ሃ ሲሚን ሃኖ ጋካናሰ ኢዚ ጋዴን ካጺዳ ካፊ ሙሌራ ኔ ኢዚሰ ዛራ» ጊዲ ሹሚታፔ ኢሳ ኣዛዚዴሰ።

ኣዛሄሌ ኩሼን ቤንሃዳዴ ሃይቆ

7 ኤልሳኢ ዳማሰቆ ቢዴሰ፤ ሄ ዎዴ ኣራሚ ካዎ ቤኒ-ሃዳዴይ ሳኬቲዴሰ፤ ካዎዛሰ፡ «ጸሳ ኣሲ ሃ ዬዴሰ» ጊዲ ዮቲዳ።

8 ኢዚካ ኣዛሄሌ፡ «ኔኒ ኣይኮ ኩሼ ጌንሶ ኤካ ባዳ ጸሳዴዛራ ጋይታ። ኢዛ ባጋራ፡ «ታኒ ሃይሳ ሃርጌዛፔ ፓጻኔ?» ጋዳ ኣኔ ጎዳ ኦይቻ» ጊዴሰ።

9 አዛሄሌይካ ዳማስቆን ዲዛ ሎኦ ሚሻታ ኡባፌ ኦይዱ ታሙጋ ጋማላን ጫኒ ኤኪዲ ኤልሳኤራ ጋይታናሰ ቢዴሰ፤ ኢዛ ሲንፋን ቢ ኤቂዱ፡ «ኔ ና አራሜ ካዎ ቤኒ-ሃዳዴይ፡ ሃይሳ ሃ ሃርጌዛፔ ታ ፓጻኔ?» ጊዲ ታና ኔኮ ዩዲዴሰ» ጊዴሰ።

10 ኤልሳኢካ ዛሪዲ፡ «ኔኒ ባዳ ኢዛሰ፡ ሳኒ ፓጻ ፓጻና፡ ጋ። ጊዶ አቲን ኢዚ ሃይቃናይሳ ጎዳይ ታና ቤሲዴሰ» ጊ ዛሪዴሰ።

11 ኢዚ ዬላታና ጋካናሰ አዛሄሌይ ኢዛ ቲሺ ሂሰቲ ጸሊዴሰ፤ ሄሳፌ ጉዬ ጸሳ ናቤዚ አይፋንሐ ጉሲዴሰ።

12 አዛሄሌይካ፡ «ታ ጎዳይ አይሰ ዩኪዜ?» ጊ ኦይቺዴሰ። ኤልሳኢካ ዛሪዲ ኢዛሰ፡ «ኔኒ ኢሰራኤሌ አሳ ቦላ ጋፋና ቆሆዛ ታ ኤሪዛ ጊሻሰ ዩካይሰ፤ ኔ ኢሰታ ሚጸታ ታማን ጽጋና፤ ኢሰታ ናቴላ ናይታካ ማሻን ዎጃና፤ ኢሰታሰ ቂሪ ናይታካ ቢታ ቦላ ዲንጩራፋና፤ ሻራ ማጫሳታ ኡሎ ኔ ዳካና» ጊዴሰ።

13 አዛሄሌይካ፡ «ታኒ ካና ማላ ቆዴቲዛ ኔ አይሌይ ሄሳ ማላ ዎልቃማ ኦሶ አፋናሰ ዋና ዳንዲያኔ?» ጊዴሰ። ኤልሳኢካ ዛሪዲ ኢዛሰ፡ «ኔኒ አራሜ ቦላ ካዎታናይሳ ታና ጎዳይ ቤሲዴሰ» ጊዴሰ።

14 ሄሳፌ ጉዬ አዛሄሌይ ኤልሳኤ አቻፌ ጌዴ ባ ጎዳኮ ሲሚ ቢዴሰ፤ ቤኒ-ሃዳዴይካ ኢዛ፡ «ኤልሳኢ ኔሰ አይ ጊ ዮቲዴ?» ጊ ኦይቺዴሰ። አዛሄሌይካ ዛሪዲ ኢዛሰ፡ «ቱማፔ ኔኒ ሃርጌዛፔ ፓጻናይሳ ኢዚ ታሰ ዮቲዴሰ» ጊዴሰ።

15 ኢዚ ዎንቴላ ጋላሰ ኦርዴ ማይኦ ኤኪዲ ሃፋን ማጺ ኬሲ ኤኪ ኢዛራ ካዎዛ አይፌሶ ጎዚዴሰ፤ ካዎዚ ሄሳ ጌዶን ሃይቂዴሰ፤ አዛሄሌይካ ኢዛሰሆን ካዎቲዴሰ።

የሁዳ ካዎ ኢዮራሜ

(2ታሪ 21:1-20)

16 ኢሰራኤሌ ካዎ አካቤ ና ኢዮራሜይ ካዎቲዳ ኢቻሻንሐ ላይላን ኢዮሳፊጾ ና ኢዮራሜይ የሁዳ ዴሬን ካዎቲዴሰ።

17 ኢዚ ካዎቲሺን ኢዛሰ ላይላይ 32፤ ኢዚ ዬሩሳሌሜን ኡቲዲ 8 ላይሐ ዴራ ሃሪዴሰ።

18 ኢዛ ማቺያ አካቤ ና ጊዲዳ ጊሻሰ አካቤሶ አሳይ ኦሊዳ ማላ ኢዚካ ኢሰራኤሌ ካዎታ ኦጌ ካሊዴሰ፤ ጎዳ ሲንፋንካ ኢታ ሚሽ ኦሊዴሰ።

19 ጊዶ አቲን ጎዳይ ባ አይሌዛ ዳዊቲ ጊሻሰ ጊዲ የሁዳ ጳይሳናሰ ኮዩቤና። ጋሶይካ ዳዊቲሲኔ ኢዛ ዜሬላሰ ጸምፔ ጳይሶንታ ማላ ካሴ ሂዶታ አሚ ዎሊዴሰ።

20 እየራሜ ካዎቲላ ላይላን ኤዶሜይ ዩሁዳ ቦላ ዴንዲዲ ባሰ ሃራ ካዎ ካዎሊዴስ።

21 ሄሳ ጊሻሰ እየራሜይ ፓራ-ጋሬታ ኡባ ሺሺዲ ጸኢሬ ቦላ ዎራጂዴስ፤ ኤዶሜ ዴሬ አሳይ ኢዛኔ ፓራ-ጋሬታ ኣዛዚዛይታ ጊዶሊዴስ፤ ኢዚኔ ፓራ-ጋሬ ኣዛዚዛይቲ ጊዲኮ ጊዶላ ዴንዲዲ ባና ጊዶሊዴይታ ጸኒ ኬዚ ቢዳ፤ ኢዛ ኦላንቻቲ ባቃቲዲ ጉዬ ሲሚዳ።

22 ኤዶሜይካ ሃቕ ጋካናሰ ዩሁዳ ቦላ ማካሊዳ ማላ ዴስ፤ ሄ ዎዴ ሊቢናይካ ማካሊዴስ።

23 እየራሜ ካዎቲላ ዎዴ ሃኒዳ ሃራ ሚሽ ኡባይ ዩሁዳ ካዎታ ታሪኬ ማጻፋን ጻፊቲ ዴስ ጊዴኔ?

24 እየራሜይካ ካሴ ባ ኣዎታን ጋይቲዴስ፤ ኢሰታቶካ ዳዊቲ ካታማን ሞጌቲዴስ፤ ኢዛ ና ኣካዚያሲ ኢዛሶሆን ካዎቲዴስ።

ዩሁዳ ካዎ ኣካዚያሳ

(2ታሪ 22:1-6)

25 ኢሰራኤሌ ካዎ ኣካቤ ና እየራሜይ ካዎቲዳ ታማኔ ናሞኣንላ ላይላን እየራሜ ና ኣካዚያሲ ዩሁዳን ካዎቲዴስ።

26 ኣካዚያሲ ካዎቲዛ ዎዴ ኢዛሰ ላይላይ 22። ኢዚ ዩሩሳላሚን ኡቲዲ ዴራ ኢሲ ላይላ ሃሪዴስ፤ ኢዛ ኣያ ጎቶሊያ ጌቲታዉስ፤ ኢዛካ ኢሰራኤሌ ካዎ ኦሚሬሰ ናዛ ና።

27 ኣካዚያሲ ኣካቤሶ አሳራ ቦሎቲዳ ጊሻሰ ኣካቤሶ አሳይ ኦሊዳ ማላ ኢዚካ ኣካቤሶ አሳ ኦጌ ካሊዴስ፤ ጎዳ ሲንላንካ ኢታ ኦሊዴስ።

28 ኣካዚያሲ ኣካቤ ና እየራሜራ ኢሲፌ አራሜ ካዎ ኣዛሄሌ ቦላ ዎራጂናሰ ጋላኣዴን ዲዛ ኤራሞቲ ቢዴስ፤ አራሜ አሳይ ሄን እየራሜ ማዲንሊዴስ።

29 ሄሳ ጊሻሰ ካዎ እየራሜይ ኤራሞቲን ኣዛሄሌራ ኦሊቲዳ ኦላዛን አራሜ አሳይ ኢዛ ማዲንሊዳ ማዲንላፌ ፓጻናሰ ኢዝራኤሌ ሲሚዴስ። ሄሳፌ ጉዬ ኣካቤ ና እየራሜይ ሳኬቲዳ ጊሻሰ ዩሁዳ ካዎ እየራሜ ና ኣካዚያሲ ኢዛ ኦይቻናሰ ዲጌ ኢዝራኤሌ ዎዲዴስ።

9

ኢሰራኤሌ ቦላ ካዎታናሰ ኢዩ ቲዬቴላ

1 ናቤ ኤልሳኢ ናቤታ ማባራ ጋርሳፌ ኢሳ ጸይጊዲ፡ «ኔ ጊል ሎኤላ ጊጸዳ ሃይሳ ዛይቲ ጸኣ ኤካዳ ጋላኣዴን ዲዛ ኤራሞቲ ባ።

2 ኔኒ ሄ ባ ጋካሼ ኒሚሼሰ ናዛ ና ኢዮሳፊጾ ና ኢዩ ኮያ። ኔ ጌዴ ኢዛኮ ሺቃዳ ኢዛ ኢዛ ላጌታፔ ዱማ ሻካዳ ጌዴ ኢልፒኔን ጌልላ።

3 ሄሳፌ ቃሴ ሄ ጸኣን ዲዛ ዛይቲዛ ኢዛ ሁኤን ጉሳዳ፡ ሳዳይ ኔና፡ ሄኮ ታ ኢሰራኤሌ ቦላ ኔ ካዎታና ማላ ቲያዲሰን ጌሰ ጋዳ አዋጃ፤ ሄሳፌ ካሬዛ ዶያዳ ዋጸ፤ ሙሌካ ታኮፋ» ጊዴሰ።

4 ሄሳ ጊሻሰ ሄ ዬላጋ ናቤዚ ጋላኣዴን ዲዛ ኤራሞቲ ቢዴሰ።

5 ኢዚ ሄ ቢ ጋኪዳ ማላ ኦላ ጋዳዋቲ ኢሲ ቦላ ኡቲ ዲሺን ኢዚ፡ «ሹማዞ፡ ታ ኔኮ ከቲታ ያዲሰ» ጊዴሰ። ኢዩይካ «ኑፔ ኦናኮ ያዲ?» ጊዲ ኢዛ ኦይቺዴሰ፤ ኢዚካ ዛሬዲ፡ «ሹማዞ፡ ኔኮ ያዲሰ» ጊዴሰ።

6 ኢዩይካ ዴንዲ ኤቂዲ ጌዴ ሶ ጌሊዴሰ፤ ሄሳፌ ጉዬ ናቤዚ ኢዛ ሁኤን ዛይቲዛ ጉሲዲ ኢዛሰ፡ «ጎዳ ኢሰራኤሌ ጸሳይ፡ ሳዳ ዴሬ ኢሰራኤሌ ቦላ ኔ ካዎታና ማላ ታ ኔና ቲያዲሰ።

7 ታ ኦሳንቻታ ናቤታ ሱላ ሄሳሶካ ጎዳ ኦሳንቻታ ሱላ ኡባ ጊሻሰ ኤልዛቤሊ ቦላ ታ ሃሎ ኬሳና ማላ ኔኒ ኔ ጎዳ ኣካቤሶ ኣሳ ሸጫ።

8 ኣካቤሶ ኣሳይ ሙሌራ ቆያና፤ ኣይሌ ጊዲን ዋይኮ ኢዛ ዬሎ ጊዲን ኢሰራኤሌን ዲዛይሳ ኢዛሰ ዉርሴላን ዬሌቲዳ ኣቱማ ናካ ኣካቤሶፔ ፒታ ቆይሳና።

9 ሃይሳፌ ጉዬ ታኒ ኣካቤ ኬል ናባጾ ና ኢዮርባኣሜ ኬል ማላኔ ኣካያ ና ባሼ ኬል ማላ ኦላና።

10 ኤልዛቤሎ ጊዲኮ ኢዝራኤሌ ጋዴ ጊደን ካናቲ ኢዞ ማና፤ ኢዚ ኣሃይ ሞጌቲናን ጌሰ» ጊ ዮቲዳ ማላ ካሬ ዶዩ ዩጊዲ ዋጺዴሰ።

11 ኢዩይ ኬዚዲ ባ ላጌ ኦላ ጋዳዋታኮ ጋኪዳ ማላ ኢሰታፌ ኢሶይ፡ «ኡባይካ ሎኦ? ሄሲ ጎሻዚ ኔኮ ኣይ ኤካና ዪዴ?» ጊዲ ኢዛ ኦይቺዴሰ። ኢዩይካ ኢዛሰ፡ «ኣዳዛካ ጊዲን ዋይኮ ኢዚ ዮቲዳይሳ ኢንቲካ ኤሬታ» ጊ ዛሬዴሰ።

12 ኢሰቲካ ኢዛሰ፡ «ሄሲ ሊኬ ጊዴና፤ ሄሳ ኣጋዳ ኣኔ ቱማዮ ኑሰ ዮታ» ጊዴ። ኢዩይካ ኢሰታሰ፡ «ኢዚ ታሰ ዮቲዳይ ሃይሳ፡ ሳዳይ ኔኒ ኢሰራኤሌ ቦላ ካዎታና ማላ ታ ኔና ቲያዲሰን ጌሰ» ጊዴሰ።

13 ሄሳፌ ጉዬ ኡባይካ ባንታ ማይኦ ቃሪ ቃሪ ዩጊዲ ኢዚ ባና ኢጌዛ ቦላ ሚጨዳ፤ ቃሴካ ዛዬ ዛዬዲ፥ «ኢዩይ ካዎቲዳስ» ጊዳ።

ኢዮራሜኔ አካዚያሳ ሃይቆ

14 ሄሳ ጊሻስ ኒሚሼስ ናዛ ና ኢዮሳፊጾ ና ኢዩይ ኢዮራሜ ቦላ ዳሬ ዳንፊሲዳስ። ሄ ዎዴ ኢዮራሜይኔ ኢሰራኤል አሳይ ኡባይ ጋላኣዴን ዲዛ ኤራሞቱ ዳሬ ኣራሜ ካዎ አዛሄሌ ኩሼፔ አሻናስ ናጌቲስ።

15 ካዎ ኢዮራሜይ አራሜ ካዎ አዛሄሌራ አላን ጋይቲን አራሜ አሳይ ኢዛ ጫዲ ማዲንፊዳ፤ ኢዚ ሄ ማዲንፊፌ ፓጳናስ ጉዬ ኢዝራኤል ሲሚ ቢዳስ። ኢዩይካ፥ «ኢንቲ ቆፋይ ሄሳ ማላ ጊዲኮ ሃይሳ ዮኦዛ ኢዝራኤል ቢዲ ዮቶንታ ማላ ኦኒካ ሃና ካታማይፔ ኩሲ ኤኪ ቦንታ ማላ ናጌቲ» ጊዳስ።

16 ሄሳፌ ጉዬ ኢዚ ባ ፓራ-ጋሬን ኡቲዲ ኢዝራኤል ጋካናስ ሆርዳፊዳስ። ኢዚ ሄሳሶ ኦሊዳይ ኢዮራሜይ ሄን ኢቺ ዲዛ ጊሻሲኔ ዩሁዳ ካዎ አካዚያሲካ ኢዛ ኦይቻናስ ዲጌ ኢዛኮ ዎቋዳ ጊሻሳ።

17 ኢዝራኤል ጊምቤ ቦላ ዲዛ ሻኮዛን ኤቂ ናጊዛይሲ ኢዩ ዎታዳራቲ ኢዛኮ ማቲዳይሳ ቤኢዲ፥ «ኦላ! ኦላ! ዎታዳራቲ ጋኪዳ» ጊ ዋሲዳስ። ኢዮራሜይካ፥ «ኢሲ ቶጋንቻይ ጸይጌቲ ቢዲ ኢሰታራ ጋይታና ማላ ዬዲዲ፥ «ኢንቲ ሳሮስ ዩዳቲ?» ጊዲ ኦይቻና ማላ አዛዚዳስ» ጊዲ አዛዚዳስ።

18 ቶጋንቻዚ ኢዩራ ጋይታናስ ፓራ ዬዲ ቶጊ ቢዲ «ካዎይ ኢንቲና፥ «ሳሮስ ዩዳቲ?» ጌስ» ጊዳስ። ኢዩይካ፥ «ሳሮቲፋ ጊሻስ ቆፓናይ ኔና ጊዳካ! ሄሳ ኣጋጋዳ ሃ ታ ጉዬ ኣቋዳ ታና ካላ» ጊዳስ። ናጊዛይሲካ «ከቲቲዲ ቢዳይሲ ኢሰታኮ ጋኪዳስ ሺን ሃ ሲሚ ዩቤና» ጊዳስ።

19 ሄሳ ጊሻስ ካዎዚ ሃራ ቶጋንቻ ዬዲዳስ፤ ኢዚ ቢዲ ኢሰታኮ ጋኪዳ ማላ፥ «ካዎይ ኢንቲና፥ «ኢንቲ ሳሮስ ዩዳቲ?» ጌስ» ጊዳስ። ኢዩይካ ኢዛስ፥ «ሳሮቲፋ ጊሻስ ቆፓናይ ኔና ጊዳካ! ሄሳ ኣጋዳ ሃ ታ ጉዬ ኣቋዳ ታና ካላ» ጊዳስ። ናጊዛይሲካ «ከቲቲ ቢዳይሲ ቢዲ ኢሰታኮ ጋኪዳስ ሺን ሃ ጉዬ ሲሚ ዩቤና» ጊዳስ።

20 ናጊዛይሲካ «ከቲቲ ዩዛይሲ ኢሰታኮ ጋኪዳስ ሺን ሄ ኢዚካ ሃ ሲሚ ዩቤና፤ ዎታዳራታ ካሌሊዛይሳ ፓራ-ጋሬዛ ላጎይ ሊኬ ኒሚሼ ና ኢዩ ላጎ ማላ፤ ኢዚ ላጊሼ ጎሻ ኣሳ ማላ ላጌስ» ጊዳስ።

21 ኢዮራሜይካ፡ «እኔ ታ ፓራ-ጋሬዛ ታሰ ገግሲቴ» ጌዲ አዛዚዳሰ። ፓራ-ጋሬዚ ገገዳ ማላ ኢሰራኤል ካዎ ኢዮራሜይኔ የሁዳ ካዎ አካዚያሲ ባንታ ፓራ-ጋሬን ኡቲዲ ኢዩራ ጋይታናሰ ቢዳ፤ ኢዘራኤል ዴሬ አሰ ናቡቴ ጸንጾ ጋዴን ጋይቲዳ።

22 ኢዮራሜይ ቡሮ ኢዩ ቤይዳ ማላ፡ «ኢዩ ኔ ሳሮን ያዲ?» ጌዲ ኢዛ ኦይቺዳሰ። ኢዩይካ፡ «ኔ አዮ ኤልዛቤሊ ኤቃ ጸሳታሰ ጎይኖይኔ ሙሬኖይ ሃይሳሉ ዳሪ ዲሺን አይ ሳሮይ ዲዜ!» ጌ ዛሪዳሰ።

23 ኢዮራሜይ ባ ፓራ-ጋሬዛ ጉዬ ዛሪ ባቃቲሹ፡ «አካዚያሳ! ሃይሲ ካዶ» ጌዳሰ።

24 ሄሳፌ ጉዬ ኢዩይ ባ ዎንዳፌ ዪሻን ኢዮራሜሰ ባቂናቴን ጫዲዳሰ። ዪሻዚ ካንሉ ቢዲ ኢዛሰ ዎዚና ጫዲዳ ገሻሰ ኢዚ ፓራ-ጋሬዛ ጌዶን ቦልቁ ጌ ኩንዲዳሰ።

25 ኢዩይካ ፓራ-ጋሬዛ ሳገዛይሳ አላፌ ቢዲቃሬሰ፡ «ኔ ኢዛ ዴንላዳ ኢዘራኤል ዴሬ አሰ ናቡቴ ጸንጾ ጋዴን ዬጋ፤ ኔኔኔ ታኒ ኑ ፓራ-ጋሬታ ቦላ ኡቲዲ ኢዛ አዎ አካቤ ካሊ ቢሺን ጎዳይ ሃይሳ ካሴቲ ዮቲዳይሳ አኔ ኔ አኬካ፤

26 ጎዳይ፡ (ታኒ ዚኔ ናቡቴ ሱሉኔ ኢዛ ናይታ ሱሉ ቤያዲሰ። ኔኒ ሃይሳ ሃ ጋዴዛን ሃሎ ኬሳና ማላ ካሴታ ገገሳዲሰ) ጌሰ፤ ሃኢካ ጎዳ ቃላይ ካሴቲ ዮቲዳ ማላ ዴንላዳ ሃይሳ ሃ ጎሻ ጌዶን ዬጋ» ጌዳሰ።

27 የሁዳ ካዎ አካዚያሲ ሄሳ ቤኢዲ ጌዴ ቤቲ-ሃጋኔ ኤፊዛ ኦጌዛራ ባቃቲዳሰ፤ ኢዩይካ ኢዛ ጎዲሼ ባ ቃላ ቆቁ ሂሰቲዲ፡ «ኢዛካ ዎቂቴ» ጌዳሰ። ኢሰቲካ ዪቢላአሜ ካታማ አቻን ጉሬ ፑዱንላ ኦጌ ኬኢሺን ፓራ-ጋሬ ቦላ ዲዛይሳ ጫዲ ማዲንሉዳ፤ ጌዶ አቲን ኢዚ ማጌዶ ባቃቲ ቢዲ ሄን ሃይቂዳሰ።

28 ኢዛ ኦሳንቻቲ ኢዛ አሃ ፓራ-ጋሬ ቦላ ዎሉዲ ዬሩሳላሜ ኤፊዳ፤ ዳዊቲ ካታማን ካሴ ኢዛ አዎታ ዱፎን ሞጌዳ።

29 አካዚያሲ ኢሰራኤል ካዎ አካቤ ና ኢዮራሜይ ካዎቲዳ ታማን ኢሲንሉ ላይላን የሁዳን ካዎቲዳሰ።

ኤልዛቤሊ ሃይቆ

30 ሄሳፌ ጉዬ ኢዩይ ጌዴ ኢዘራኤል ቢዳሰ፤ ኤልዛቤላ ሄሳ ሲያዳ፡ ባ አይፌሶ ቲዩታዳ፡ ባ ሁኤ ሎኤላ ገገሳዳ ማሰኮቴራ ዱጌ ጸላዲሰ።

31 ኢዩይ ገምቤዛ ካንሉ ጌሊዳይሳ ቤኣዳ፡ «ኔ ጎዳ ዎቂዳ ዘሚሬ! ኔ ሳሮሰ ያዲ?» ጋ ኦይቻዲሰ።

³² አዩይ ኢዞ ፑዴ ጸሊዲ፥ «ኔ ኦኔ?» ታናራ ማዴታናይ ኦኔ? ጊሼ ዋሲ ጸይጊዴስ። ኢዚ ዋሲን ናምኡ ዋይኮ ሄቹ ጉንዲላቲ ዲጌ ኢዛኮ ጸሊዲ።

³³ አዩይካ ኢስታስ፥ «ኢዞ ሃ ዲጌ ኦሊቲ!» ጊዴስ። ኢስቲካ ኢዞ ዲጌ ዛሪ ኦሊዲ። ፓራቲ ኢዞ ዲሬቲን ኢዚ ሱላይ ጊምቤዛ ቦላኔ ፓራታ ቦላ ፒንጺዴስ።

³⁴ አዩይ ሶ ጌሊዲ ሚዴሲኔ ኡዩዴስ፤ ሄሳፌ ጉዬ፥ «አይ ጊዲኮካ ኢዛ ካዎ ና ጊዲዳ ጊሻስ ሃኖ ቃንጌቲዳ ማጫሳኖ ሎኤሊ ሞጌቲ» ጊዴስ።

³⁵ ኢስቲ ኢዞ ሞጋና ኬዚሺን ኢዚስ ሁኤ ሜቁላታ፤ ኩሼ ሜቁላታ፤ ቶሆ ሜቁላታ፤ ኦቲን ሃራ ዴሚቤቲና።

³⁶ ኢስቲ ሲሚዲ ኢዛስ ሄሳ ኦቲን አዩይ፥ «ኅዳይ ባ አይሌዛስ ቲሲቤ ዴሬ ኣስ ኤላሳስ፥ «ኢዘራኤሌ ቢታን ኅሻ ጋዴ ጊዶን ካናቲ ኤልዛቤሊ ኣሾ ማና።

³⁷ ኢዚ ኣሾይ ኢዘራኤሌ ቢታን ኅሻ ጋዴስ ኢጊሳ ጊዳና፤ ሄሳ ጊሻስ ኣይ ኣሲካ፥ «ሃና ኤልዛቤሎ ጋናስ ዳንዳዬና ጊ ኦቲዳ ቃላይ ሃይሳ» ጊዴስ።

10

አካቤሶ ኣሳ ሃይቆ

¹ ሄ ዋዴ አካቤሶ ሳማሪያን 70 ኣቱማ ናይቲ ዴቲስ፤ ሄሳ ጊሻስ አዩይ ዳብዳቤ ጳፊዲ ኢዘራኤሌን ዲዛ ሹሜታስ፥ ጨማታሲኔ አካቤ ናይታ ዲቺዛይታስ ኪታ ሳማሪያ ዬዲዴስ። ኢዚ ዬዲዳ ኪታዛ ቃላይ፥

² «ኢንቲ ኅዳዛ ናይቲ ኢንቲናራ ዲዛ ጊሻሲኔ ፓራ-ጋሬቲኔ ፓራቲ፥ ጊምቤቲዳ ካታማቲኔ ኦላ ሚሻይ ኢንቲስ ዲዛ ጊሻስ ሃይሲ ኪታ ዳብዳቤዚ ኢንቲኮ ጋኪዳ ማላ ሄራካ፥

³ ኢንቲ ኅዳዛ ናይታ ጊዶፌ ኡባፌ ኣፂዛዴኔ ሃይሲ ኢዛስ ቤሴስ ጊዛዴ ዶሪዲ ኢዛ ኣዋ ካዎቲላ ኣራታን ኡቲሲቲ፤ ሄሳፌ ጉዬ ካሴ ኢንቲ ኅዳዛ ኬላ ጊሻስ ኦሊቲቲ» ጌሰ።

⁴ ኢስቲ ጊዲኮ ዳር ባቢዳ ጊሻስ፥ «ናምኡ ካዎቲ ኢዛራ ኦሊቲዲ ዳንዳኖንታይሳ ኦኒ ኢዛ ዋስቲ ዳንዳያኔ?» ጊዳ።

⁵ ሄሳ ጊሻስ ካዎቲላ ኬላን ኣዛዚዛይሲ፥ ሄ ካታማኖ ኣይሲዛይሲ፥ ዴሬ ጨማቲኔ ካዎዛ ናይታ ዲቺዛይቲ፥ «ኦኒ ኔ

አይሌቲ ኔኒ ጊዳይሳ ኡባካ ፖላና፤ ኑኒ ሃራ ኦናካ ካዎሶኮ፤ ኔኒ ኔና ሎኢዳዝ ኡባካ ኦላ» ጊዳ ሄ ኪታዛ አዩሰ ዩዲዳ።

6 ሄሳፌ ጉዬ አዩይ፡ «ሂሰቲኮ አንቲ ታ ባጋ ጊዲኮኔ ታሰ አዛዜቲዛይታ ጊዲኮ አንቲ ጎዳዛ ናይታ ሁኤ ቃንጺ ቃንጺ ኤኪዲ ዋንቶ ሃኒ ዋዴ አዝራኤሌ ጋኪቲ» ጊዳ አሰታሰ ቃሴካ ጸፊዴሰ። ሄ ዋዴ ካዎዛ ናይቲ ላፑን ታማቲ ሄ ካታማይን ዲዛ ዳር ኤሬቲዳ ኢሰታ ዲቺዛ አሳታኮን ዴቲሰ።

7 ሄ ዳብዳቤዚ ኢሰታኮ ጋኪዳ ማላ ናይታ ዲቺዛይቲ ካዎ ናይታ ላፑን ታማታ ኡባ ዋዲዳ፤ ሄ ናይታ ሁኤ ቃንጺ ቃንጺ ኬሼን ኤኪዲ አዩሰ አዝራኤሌ ዩዲዳ።

8 ኪቲቲ ቢዳይሲ ቢ ጋኪዳ ማላ አዩሰ፡ «ካዎዛ ናይታ ሁኤዛ ኤሂዳ» ጊን አዩይ፡ «ዋንቶ ማላዶ ጋካናሰ ካታማ ጌሊዛ ፔንጌን ናምኡሶን ዶሪ ዋሊቲ» ጊ አዛዚዴሰ።

9 ዋንቲላ ጋላሰ ማላዶ አዩይ ኬዚ ዴሬዛ ሲንላን ኤቂዳ፡ «አንቲ ጸሎ፤ ታ ጎዳ ቦላ ዴራ ዴንፊሊዳይኔ ዋዲዳይ ታና። ጊዶ አቲን ሃይታ ኡባ ወርሲዳይ ኦኔ?» ጊዴሰ።

10 ሄሳ ጊሻሰ ጎዳይ ካሴ አካቤሶ አሳ ቦላ ዮቲዳ ቃላፔ አሲኔያካ ፎ ቢታ ቦላ ዋዳ አቶንታይሳ አንቲ ኤሪቲ። ጎዳይ ካሴ ባ አይሌ ኤላሳ ባጋራ ዮቲዳይሳ ፖሊዴሰ።

11 አዩይ አካቤሶ አሳፔ አቲዳ አሳ ኡባ፡ ጊታ አሳ ኡባ፡ ማታ ላጌታኔ ኢዛ ቄሴታ ኢሲኖካ አሾንታ አዝራኤሌን ዋዲዴሰ።

12 አዩይ ሄፔ ዴንዲዲ ሳማሪያ ቢዴሰ፤ ኢዚ ቢዲ ቤት-ኤኬዴ ጌቲቲዛሶን ዶርሳ ሄሚዛይታሶ ቢ ጋኪሼ፡

13 ዩሁዳ ካዎ አካዚያሳሰ አሾ ዳቦታፔ አማርዳይታ ዴሚዲ፡ «አንቲ ኦናንቲ?» ጊ ኦይቺዴሰ። ኢሰቲካ ኢዛሰ፡ «ኦኒ አካዚያሳሰ አሾ ዳቦታ፤ ኦኒ ካዎዛሶ አሳታኔ ጎዳቲይ ናይታ ኦይቻናሰ ሃ ዴጌ ዪዶሰ» ጊዳ።

14 ኢዚካ፡ «ሃይታ ሼምፖራ ፓጻ ኦይኪቲ!» ጊ አዛዚዴሰ፤ ሄሳ ጊሻሰ ኢሰቲ ሼምፖራ ፓጻ ኦይኪ ኤፊዲ ቤት-ኤኬዴ ሃላ ኦላ አቻን ኦይዱ ታማኔ ናምኡ አሳታፔ አሳዴካ አሾንታ ዋዲዳ።

15 ኢዚ ሄፔ ዴንዲ ቢሼን ኤሬካቤ ና አዮናዳቤይ ባኮ ቢዛይሳ ኦጌ ቦላ ዴሚዴሰ፤ አዩይካ ኢዛ ሳርኪዲ፡ «ታ ዋዚናይ ኔና አማኒዛይሳ ማላ ኔ ዋዚናይ ታና አማኒዜ?» ጊዳ ኢዛ ኦይቺዴሰ፤ አዮናዳቤይካ፡ «ኤ አማኒሰ» ጊዴሰ፤ አዩይካ፡ ሂሰቲኮ «ኦኔ ታ ኩሼ ኦይካ» ጊዴሰ፤ ኢዚካ ኢዛ ኩሼ ኦይኪዴሰ፤ ሄሳፌ ጉዬ አዩይ ባ ፓራ-ጋራ ቦላ ካፊ ኬሲዴሰ።

27 ባኣሌስ ጎይኒዛ ሚስሌዛ ቆጾሬሊዳ፤ ኢዛን ባኣሌስ ጎይኒዛ ኩፋካ ላሊዳ፤ ሄሳ ሄ ሶሆዛ ሃች ጋካናስ ዴሬይ ሼሽ ኡቲዛሶ ኬሲዳስ።

28 ኢዩይ ሄሳሶ ኦሊዲ ባኣሌስ ጎይኒዛይሳ ኢሰራኤል ዴሬፔ ዳይሲዳስ።

29 ጊዶ አቲን ኢዩይ ናባጼ ና ኢዮርባኣሜይ ቤቱሌኒኔ ዳኔን ዋርቃፌ ኦሴቲዳ ማራ ሚስሌታስ ኢሰራኤል ኣሳይ ጎይናና ማላ ኣሳ ኦሲሲዳ ናጋራፔ ሃኪቤና።

30 ጎዳይ ኢዩስ፡ «ኔኒ ታ ሲንፋን ሎኦ ኦሊዳ ጊሻሲኔ ኣካቤ ኩፋ ቦላ ጋካና ማላ ታ ዋዚናን ዲዛይሳ ኡባካ ኔ ፖሊዳ ጊሻሲ ኔ ዜሬላይ ቢዲ ኦይዳንሶ ዩሌታ ጋካናስ ኢሰራኤል ቦላ ካዎታና» ጊዳስ።

31 ጊዶ አቲን ኢዩይ ጎዳ ኢሰራኤል ጸሳ ዋጋ ባ ኩሜላ ዋዚናፔ ናጊቤና፤ ኢዮርባኣሜይካ ኢሰራኤል ኣሳ ኦሲሲዳ ናጋራፔ ሃኪቤና።

32 ሄ ዋዴ ጎዳይ ኢሰራኤል ቢታ ጉሊ ጉሊ ኤፎ ዶሚዳስ። ኣዛሄሌይ ኢሰራኤል ኣሳ ሄ ጋጸፔ ሃ ጋጸ ጋካናስ ኦሊ ጸኒዳስ።

33 ሄሲካ ዮርዳኖሴፔ ኣርሼይ ሞኪዛ ባጋራ ዲዛ ጋላኣዴ ዴሬ ኡባ ጊዲሺን ኣርኖኔ ሻፋ ኣቻን ዲዛ ኣርኤሬፔ ቢዲ ጋዴ ዴሬ፡ ኦርቤሌ ዴሬ፡ ሚናሴ ዴሬ ጋላኣዴኔ ባሳኔ ጋካናሳ።

34 ሃንኮ ኣቲዳይሲ ኢዩ ካዎቲላ ላይላን ሃኒዳይሲኔ ኢዚ ኦሊዳ ኦሶ ኡባይ ኢሰራኤል ካዎታ ታሪኬ ማጻፋን ጸፊቲ ዳስ ጊዳኔ?

35 ኢዩይ ካሴ ባ ኣዋታ ማላ ሃይቂዳስ፤ ኢዛ ሳማሪያን ሞጊዳ፤ ኢዛ ና ኢዮኣካዚ ኢዛሶሆን ካዎቲዳስ።

36 ኢዩይ ሳማሪያን ዲሼ ኢሰራኤል ቦላ 28 ላይሳ ካዎቲዳስ።

11

ጎቶሊያኔ ኢዮኣሳ

(2ታሪ 22:10—23:15)

1 ኣካዚያሳ ኣያ ጎቶሊያይ ባ ናዛ ሃይቆ ሲያዳ ካዎ ኩፋ ኣስ ኡባካ ዋዳ ዳይሳዱስ።

2 ካዎ ኢዮራሜ ና ኣካዚያሳ ሚቾ ዮሳቤታ ሃይቃና ሸቂ ኡቲዳ ካዎ ናይታ ጊዶፌ ኣካዚያሳ ናዛ ኢዮኣሳ ካይሳ ኤካዱስ። ኢስቲ ኢዛ ዋድንታ ማላ ጎቶሊያፔ ኢዛ ቆታ ኤካዳ ኢዛኔ ኢዛ ናጊዛር ኢሲ ኢልፒኔ ኩፋን ጌልላ ቆታዱስ።

3 ጎቶሊያይ ዳሬዛ ሃሪዛ ዎዴካ ኢዚ ባና ናጊዛሪራ 8 ላይል ጎዳ ኬላን ቆቲቲዳስ።

4 ላፑንሶ ላይላን ዮዳሄይ ኪታ ዬዲዲ ካራ ዳሬ ኣሲኔ ዛቤ ናጊዛይታ ኣዛዚዛ ማቶ ሃላቃታ ኢዚ ዲዛሶሆ ጎዳ ኬል ያና ማላ ኣዛዚዳስ፤ ኢዚ ኢሰታራ ጫቄቲዲ ጎዳ ኬላን ጫቄሊዳስ፤ ሄሳፌ ጉዬ ካዋ ናዛ ኢሰታ ቤሲዳስ።

5 ኢዚ ኢሰታስ፡ «ኢንቴ ኦላናይ ሄቹ ኬዚ ሻኬቲዲ ሳምባታ ጋላስ ዛቤ ናጊዛይታ ጋርሳፌ ኮይሮይሲ ካዋ ኬል ናጎ።

6 ናምእንሶ ሻኮዚ ሱሬ ጌቲቲዛ ፔንጌዛ ናጎ፤ ጸሳ ኬል ታራን ታራን ናቤታፔ ጉዬ ባጋራ ዲዛ ፔንጌዛ ናጎ።

7 ኢንቴስ ካሴካ ዶሴ ጊዲዳ ማላ ሳምባታ ጋላስ ዛቤ ናጎፔ ሸምፒዳይቲ ኡባይ ሄቫፌ ናምኡ ኩሼቲ ካዋዚ ኢዛን ዲዛ ጸሳ ኬላዛ ናጊቲ።

8 ኢንቴ ኡባይካ ኢንቴ ማሳራ ማሳራ ኦይኪዲ ካዋዛ ዩሾን ኤቂቲ፤ ኢንቴኮ ሸቂዛ ኣሲ ዲኮ ሃይቆ» ጊዳስ።

9 ማቶ ሃላቃቲ ቄሴ ዮዳሄይ ኣዛዚዛይሳ ኡባካ ኦሲዳ፤ ኢሰታፌ ኢሶይ ኢሶይ ሳምባታ ጋላስ ዛቤ ናጋናስ ጌሊዛይቲኔ ዛቤ ናጊዲ ኬዚዛይቲ ባና ካሊዛይታ ካሌሊ ኤኪዲ ቄሴ ዮዳሄኮ ጋኪ ዎዳዳ።

10 ቄሴዚካ ጸሳ ኬላን ዲዛ ካዋ ዳዊቲ ቶራዛኔ ጎንዳሌዛ ማቶ ሃላቃታስ ኢሚዳስ።

11 ዎታዳራቲካ ኢሶይ ኢሶይ ባ ማሳራ ኤኪዲ ጸሳ ኬላዛስ ዲጌሃ ባጋፌ ደሚዲ ፑዴሃ ጋካናስ ያርሾ ያርሺዛሶኔ ጸሳ ኬላ ማታን ካዋዛ ዩሾን ኤቂዳ።

12 ዮዳሄይካ ካዋ ናዛ ኢዚ ዲዛሶሆፔ ኬሲዲ ኢዛ ሁኤን ካላቻ ጎጂዳስ፤ ጫቆ ቃላ ማጻፋካ ኢዛስ ኢሚዳስ፤ ኢዛ ቲይዲ ካዋሊዳይሳ ኣዋጁዳስ፤ ሄሳፌ ጉዬ ዳሬዚ፡ «ካዎይ 1,000 ላይል ካዎቶ» ጉሳን ባ ኩሼ ባቂዲ ባ ኡፋይሳ ቆቃ ቃላን ዋሲ ኤሪሲዳስ።

13 ጎቶሊያይካ ኦላ ኣሳ ዋሶዛኔ ዳሬዛ ዋሶዛ ሲያዳ ዳሬዚ ዲዛሶ ጸሳ ኬላኮ ባዲስ።

14 ሄኮ ካሴ ዲዛ ዎጋ ማላ ካዋዚ ቱሳ ማታን ኤቂዳይሳ ኢዛ ሹሜቲኔ ዛዬ ፑኒዛይቲ ኢዛ ኣቻን ዲዛይሳ ቤኣዲስ፤ ዳሬይ ኡባይ ኡፋይሳን ጉፔሲኔ ዛዬካ ዛዬስ። ጎቶሊያይ ባ ማይኢዳ ማይኦዛ ዳካ ዬጋዳ፡ «ሃይሲ ካዶ፤ ሃይሲ ካዶ!» ጋ ዋሳዲስ።

15 ቄሴ ዮዳሄይ ኦላ አሳታ አዛዚዛይታ ማቶ ሃላቃታ፡ «ቡቴን ቡቴን ሳልፊዳ አሳ ጋርሳፌ ኢዞ ሃራሶ ኬሲቴ፤ ኢዞ ካሊዛይታ ማሻን ቡሳኪቴ» ጊዲ አዛዚዳሰ፤ ሄሲካ ሃኒዳይ ቄሴዚ ካሴ፡ «አሲ ጸሳ ኬላን ሃይቃና ቤሴና» ጊዳ ጊሻሳ፡

16 ሄሳ ጊሻሰ ኢዛ ፓራቲ ካዎ ኬል ጌሊዛ ሶ ቢ ጋኪሺን ኦይኪዲ ኢዞ ሄን ዎዲዳ፡

17 ዮዳሄይካ አሳይ ጎዳ ዴሬ ጊዳና ማላ ጸሳ ሲንፋኒኔ ካዎዛ ሲንፋን ዴሬዛሲኔ ጎዳሰ ጊዳን ጫቆ ቃላይ ዳና ማላ ኦሊዳሰ፡ ሄሳሶካ ካዎዛሲኔ ዴሬዛሰ ጊዳን ጫቆ ቃላ ዎሊዳሰ፡

18 አሳይ ኡባይካ ቢዲ ባኦሌ ጌቴቲዛ ኤቃ ጸሳ ኬል ላሊዳሰ፤ ያርሾሶዛኔ ሚሰሊታ ኡባ ሚንፊሬሊ ዩጌዳሰ፤ ባኦሌ ቄሴ ማታኔካ ያርሾ ያርሺዛሶሆታ ሲንፋን ዎዲዳሰ፡ ሄሳፌ ጉዬ ቄሴ ዮዳሄይ ጸሳ ኬል ናጊዛ ዛቤታ ዎሊዳሰ፡

19 ሄሳፌ ጉዬ ማቶ ሃላቃታ፡ ካራ ዴሬ ዎታዳራታ፡ ዛቤታ፡ ሄ ዴሬ አሰ ኡባ ኤኪ ዩዳሰ፤ ኡባይካ ኢሲ ቦላ ካዎዛ ጎዳ ኬላፌ ኬሲ ኤፊዲ ዛቤ ናጊዛይታ ገምቤ ፔንጌፌ ዱጌ ባጋራ ዲዛ ካዎ ኬል ኤፊ ጌልሊዳ፡ ካዎዚካ ባ ካዎቴላ አራታ ቦላ ኡቴዳሰ

20 ሄ ዴሬ አሳይ ኡባይካ ኡፋዩቴዳሰ፤ ጎቶሊያይ ካዎ ኬል ጊዳን ማሻን ሲፊቴዳ ጊሻሰ ካታማያ ሲርጺ ጋዲሰ፡

21 ኢዮኦሲ ካዎቴሺን ኢዛሰ ላይላይ ላፑና፡ *

12

ኢዮኦሲ ጸሳ ኬላዛ ኦራጺሶ

(2ታሪ 24:1-16)

1 ኢዩይ ካዎቴዳ ላፑንፋ ላይላን ኢዮኦሲ ካዎቴዳሰ፤ ኢዚ ዩሩሳላሚን ኡቴዲ 40 ላይል ሃሪዳሰ፤ ኢዛ አያ ሳቢዮ ጌቴቲዛራ ቤርሳቤሄ ካታማን ዩሌታዲሰ፡

2 ቄሴ ዮዳሄይ ታማርሲዛ ዎዴ ኡባን ኢዮኦሲ ጎዳ ሲንፋን ሎኦ ሚሽ አሊዳሰ፡

3 ጊዳ ኦቴን ዙዎቡላታ ቦላን ጎይኒዛሶሆታ ዳይሲቤና፤ ዴሬዚካ ሄ ሶሆታን ያርሾ ሺሾኔ ኤጻኔ ጨዋሴል ጉጂ ጉጂ ቢዳሰ፡

4 ኢዮኦሲ ቄሴታ፡ «ዴሬዛ ቆዳን ሺቂዳ ሚሻ፡ አዲናን ጌሊዳ ሚሻ ቃሴካ አሳይ ባ ሼኔን ጎዳ ኬላሰ ኢሚዳ ዱማ ዱማ ሚሻ ኡባ ኢሲሶ ሺሺቴ፡፡

* 11:21 ኢዮኦሳ ጊዛይሳ ኢሲ ኢሲ ጌሻ ማጻፋቲ ኢዮሲያሳ ጌቴሰ፡፡

5 ቄሴቲ ኢሶይ ኢሶይ ሚሻዛ ሺሺዛይታ ኩሼፔ ኤኬቶ፤ ሄ ሚሻዛ ኩሺዛ ማላ ጸሳ ኬላ ጊዶን ሞሬቲዳ ሶሆታ ኦራጸሳና ኬዞ» ጊደሰ።

6 ጊዶ ኣቲን ኢዮኣሲ ካዎቲን ቢዲ ናምኡ ታማኔ ሄፃንላ ላይሊ ጋካናሰ ቄሴቲ ጸሳ ኬላዛ ጋርሳን ሞሬቲዳ ሶሆታ ኦራጸሲቤቴና።

7 ሄሳ ጊሻሰ ኢዮኣሲ ቄሴ ዮዳሄኔ ሃራ ቄሴታካ ባኮ ጾይጊ ሺሺዲ፡ «ኣይሰ ጸሳ ኬላ ጊዶን ሞሬቲዳይታ ዛሪ ሎኤሶንታ ኣጊዴቲ?» ጊ ኦይቺደሰ። ቃሴካ፡ «ሃይሳፌ ሲንላን ሚሻይ ጸሳ ኬላዛ ጊዶን ሞሬቲዳይሳ ኦራጸሳናሰ ኬዞ ኣቲን ሚሻ ኦይኪዛ ኣሳታፔ ኤኮፍቴ» ጊደሰ።

8 ቄሴቲካ ሄሳፌ ጉዬ ዳራፔ ሚሼ ሺሹንታ ማላኔ ጸሳ ኬላዛ ባንታርካ ኦራጸሳንታ ማላ ቃላ ቃቺዳ።

9 ሄሳፌ ጉዬ ቄሴ ዮዳሄይ ኢሲ ሳጺኔ ኤኪዲ ኢዛሰ ካማዛ ሉኪዲ ጸኤ ኬሲደሰ፤ ኤፊዲ ጸሳ ኬላን ጌሊዛሶፔ ኡሻቻ ባጋራ ያርሾ ያርሺዛሶሆዛ ኣቻን ዋሊደሰ። ካሬዛ ናጊዛ ቄሴቲካ ጸሳ ኬላሰ ዪዛ ሚሽ ኡባካ ሄ ሳጺኔዛን ጌልሌቴሰ።

10 ሳጺኔዛ ጊዶን ዳር ሚሹ ዲዛይሳ ቤዪ ቤኢዲ ካዎዛ ጸፊዚኔ ቄሴታ ሃላቃይ ዪዲ ዪዲ ጸሳ ኬላሰ ዪዳ ሚሻ ቆዲ ቆዲዲ ካራጸቲን ጌልሊ ቃቺ ዋሌቴሰ።

11 ሄ ሚሻዛ ሚዛኔይ ኤሬቲዳፔ ጉዬ ጎዳ ኬላዛ ኦሶ ኣላፌቲላን ኦሲሳና ማላ ሚሻዚ ዶሬቲዳ ኣሳታሰ ኢሜቴሰ፤ ሄሲካ ጸሳ ኬላ ኬጸዛ ኣናጸታሰ፡ ገምቤ ገምቢዛይታሰ።

12 ሹቕ ማሲዛይታሰ፡ ሹቕፌ ዱማ ዱማ ሜፋ ገግሲዛይታሲኔ ጸሳ ኬላ ኦራጸሳናሰ ሚላሲኔ ማሴቲዳ ሹቕሰ ኬዜሰ።

13 ጸሳ ኬላዛሰ ጌሊዳ ሚሻፌ ጊዲኮ ጸሳ ኬላሰ ሶ ጊዶ ኦሶሰ ኮሺዛ ቢራ ጸኣታ፡ ታማ ቃጾታ፡ ዲሰቲታ፡ ዲንኬታኔ ሃራ ዋርቃፌ ጊዲን ቢራፔ ኦሴቲዛ ሚሻታሰ ኬዚቤና።

14 ሄ ሚሻፌ ጸሳ ኬላዛ ኦራጸሲዛይታሰ ጸላ ቃንጾቲደሰ።

15 ኬላ ኦራሊዛ ኣሳታሰ ሚሽ ቃንጸናሰ ዶሬቲዳ ኣሳቲ ሙሌራ ኣማኔቲዳይታ ጊዲዳ ጊሻሰ ኢሰታ ካሊ ጸሊዛዴ ኮሺቤና።

16 ቆሆ ጊሻሰ ሺቂዛ ያርሾይኔ ናጋራ ጊሻሰ ሺቂዛ ያርሾይ ጊዲኮ ሃይቲ ቄሴታሰ ጊዲዳ ጊሻሰ ጸሳ ኬላ ጌሊቴና።

17 ሄ ዋዴ ኣራሜ ካዎ ኣዛሄሌይ ኬዚዲ ጌቴ ቦላ ሜቶ ጋሊዲ ኢዞ ኦይኪደሰ፤ ቃሴካ ዬሩሳላሜ ቦላ ሜቶ ዬጋናሰ ሄ ሲሚደሰ።

18 የሁዳ ካዎ ኢዮአሲ ጊዲኮ ካሴ ኢዛ አዋቲ የሁዳ ካዋቲ ኢዮሳፊዬይ፥ ኢዮራሜይ፥ አካዚያሲ ጸሳስ ዲማ ሻኪዳ ሚሻታ ኡባ ኢዚ ባርካ ሻኪ ዋሒዳ ዲማቲዳ ኢሞታታ ሄሳቶካ ጸሳ ኬላኒኔ ካዎ ሚሻታ ዋሒዛ ሚንጃ ኬላን ቤቲዳ ዋርቃ ኡባ ኢሲ ቦላ ሺሺዲ አራሜ ካዎ አዛሄሌሰ ዬዲዴሰ፤ አዛሄሌይ ዬሩሳላሜ ዩስ አጊዲ ጉዬ ሲሚዴሰ።

19 ኢዮአሲ ባ ካዋቲላ ላይላታን ኦሒዳ ሃራ ኦሶቲኔ ኢዚ ፖሊዳ ሃኖቲ ኡባይ የሁዳ ካዎታ ታሪኬ ማጻፋን ጸፊቲ ዴስ ጊዴኔ?

20 ኢዛ ሹሜቲካ ኢዛ ቦላ ዴንዲዳ፤ ዴጌ ሲላ ዋሒዛ ኦጌዛ ቦላ ቤቲሚሎኔን ኢዛ ዋዲዳ።

21 ኢዛ ዋዲዳይቲካ ሹሜቲ ሺሞኦታ ና ዮዛካሬኔ ሹሜሬዬ ና ዮዛባዴ፤ ኢዚ ሃይቁዲ ካሴ ባ አዋታ ኡባታ ማላ ዳዋቲ ካታማን ሞጌቲዴሰ፤ ኢዛ ና አማሲያሲ ኢዛሶሆን ካዋቲዴሰ።

13

ኢሰራኤል ካዎ ኢዮአካዜ

1 የሁዳ ካዎ አካዚያሳ ና ኢዮአሲ ካዋቲዳ ናሞኡ ታማኔ ሄዳንሶ ላይላን ኢዩ ና ኢዮአካዚ ሳማሪያ ካታማን ኢሰራኤል ቦላ ካዋቲዴሰ፤ ኢዚ 17 ላይሶ ሃሪዴሰ።

2 ኢዚካ ናባጼ ና ኢዮርባአሜይ ኢሰራኤል አሳ ኦሲሲዳ ናጋራ ካሊዲ ጎዳ ሲንላን ኢታ ኦሶ ኦሒዴሰ፤ ሄሳ ሄ ኦሶዛፔ ሲሚቤና።

3 ጎዳ ሃንቆይ ኢሰራኤል ቦላ ታማ ማላ ኤጲዴሰ፤ ሄሳ ጊሻሰ አራሜ ካዎ አዛሄሌይኔ ኢዛ ና ቤኒ-ሃዲዴይ ዲዛ ዋዴ ኡባን ጎዳይ ኢሰራኤሌታ ኢሰታ ኩሼን አሒ አሚዴሰ።

4 ሄሳፌ ጉዬ ኢዮአካዜ ጎዳ ዋሲዴሰ፤ ጎዳይካ አራሜ ካዋይ ኢሰራኤል ዋሰቲ ሜቶሒዳኮ ቤኢዳ ጊሻሰ ኢዛ ዋሳ ሲዬዴሰ።

5 ሄሳ ጊሻሰ ጎዳይ ኢሰራኤል አሺዛ አሰ ኢሰታሰ አሚዴሰ፤ ኢሰቲካ አራሜ አሳ ኡንኤቲላፌ ኬሲ ኤኪዳ፤ ካሴ ማላካ ባንታ ኬላን ኬላን ዴሰ ኦይኪዳ።

6 ጊዶ አቲን ካሴ ኢሰራኤል ባሌሒዳ ኢዮርባአሜ ኬላ ናጋራፔ ሲሚቤቲና፤ ሲንሶ ጉጂ ጉጂ ቢዳ። አሼሪ ሚሰሌ ቱሳሰ ሳማሪያን ጉጂ ጎይኒዳ።

7 ኢዮአካዜ ኦላ አሳፔ 50 ቶጋ አሳቲ፥ ታሙ ፓራ-ጋሪቲኔ 10,000 ዋታዳራቲ ጸላ አቲዳ፤ ሃይሲ ሃኒዳይ አራሜ ካዋይ አቲዳይታ ኡባ ዲፒ ሂሰቲ ዳይሲዲ ባሌፔ ኬኢዛ ሱላ ማላ ኦሒዳ ጊሻሳ።

8 እየኣካዚ ባ ካዎቲፋ ላይፋታን ኦሊዳዚ፥ ፖሊዳዚኔ ሃኒዳ ሃኖታቲ ኡባይ ኢሰራኤል ካዎታ ታሪኬ ማጻፋን ጸፊቲ ዴሰ ጌዴኔ?

9 እየኣካዚ ካሴ ባ ኣዎታ ማላ ሃይቂዴሰ፤ ሳማሪያንካ ሞጌቲዴሰ፤ ኢዛ ና እየኣሲ ኢዛሶሆን ካዎቲዴሰ።

ኢሰራኤል ካዎ ዮኣሳ

10 ዩሁዳ ካዎ እየኣሲ ካዎቲዳ ሄሹ ታማኔ ላፑንፋ ላይፋን እየኣካዜ ና ዮኣሲ ሳማሪያ ካታማን ኢሰራኤል ቦላ ካዎቲዳ 16 ላይፋ ዴሪ ሃሪዴሰ።

11 ኢዚካ ጎዳ ሰንፋን ኢታ ኦሶ ኦሊዴሰ፤ ናባጼ ና እየርባኣሜይ ኢሰራኤል ኣሳ ኦሲሲዳ ናጋራ ኡባፊ ሃኪቤና፤ ጌዴ ጉጂ ጉጂ ቢዴሰ።

12 ዮኣሲ ባ ካዎቲፋ ላይፋታን ኦሊዳዚ፥ ፖሊዳዚኔ ሃኒዳ ሃኖታቲ ኡባይ ሄሳሶካ ዩሁዳ ካዎ ኣማሲያሳራ ኦሊቲዳ ኦላይ ኡባይ ኢሰራኤል ካዎታ ታሪኬ ማጻፋን ጸፊቲ ዴሰ ጌዴኔ?

13 ዮኣሲ ካሴ ባ ኣዎታ ማላ ሃይቂዴሰ፤ ሳማሪያን ኢሰራኤል ካዎቲ ሞጌቲዳሶን ሞጌቲዴሰ፤ እየርባኣሜይ ኢዛሶሆን ካዎቲፋ ኣራታን ኡቲዴሰ።

14 ሄ ዎዴ ኤልሳኢ ሃርጊዲ ሸምፖ ቦላ ዴሰ። ኢሰራኤል ካዎ እየኣሲ ኢዛ ኦይቻና ዴጌ ዎፂዲ ኢዛሰ ዬኪዴሰ፤ «ኦላ! ታ ኣዎዉ! ኦላ! ታ ኣዎዉ! ኔኒ ኢሰራኤሌስ ፓራ-ጋሬኔ ቶጋንቻ!» ጌ ዋሲዴሰ።

15 ኤልሳኢካ፥ «ኢሲ ዎንዳፊኔ ዩሻታ ሃ ኤካ ያ» ጌዴሰ፤ ኢዚካ ኤሂዴሰ።

16 ኢሰራኤል ካዎዛ፥ «ኔ ኩሼን ዎንዳፊዛ ኦይካ» ጌዴሰ፤ ኢዚ ዎንዳፊዛ ባ ኩሼን ኦይኪን ኤልሳኢ ባ ኩሼ ካዎዛ ኩሼ ቦላ ዎሊዴሰ።

17 ቃሴካ፥ «ኣርሼይ ሞኪዛ ባጋራ ዲዛ ማሰኮቲዛ ዶያ» ጌዴሰ፤ ኢዚካ ዶይዴሰ፤ ኤልሳኢካ ኢዛሰ፥ «ኣኔ ሃኢ ዎንዳፊዛ ዶካ» ጌዴሰ፤ ኢዚካ ዶኪዴሰ። «ጎዳሰ ጸኖ ዎንዳፊ! ኣራሜይ ኢዛን ጸኔታና ዎንዳፊ!» ጌዴሰ። ኤልሳኢ ዛሪዲ፥ «ኔኒ ኣራሜ ኣሳ ኣፊቄን ሙሌራ ጸናና» ጌዴሰ።

18 ቃሴካ፥ «ኣኔ ዎንዳፊታ ኤካ» ጌዴሰ፤ ካዎዚካ ኤኪዴሰ። ኤልሳኢካ፥ «ኣኔ ሃይሳ ቢታ ጫዳ» ጌዴሰ፤ ኢዚካ ሄሹቶ ጫዲዲ ኣጋጊዴሰ።

19 ጸሳ አሲ ኢዛ ቦላ ሃንቁቲዲ፥ «ኔኒ ቢታዛ ኢቻሹቶ ዎይኮ ኡሱቸንቶ ጫዳናሰ ቤሴሰ፤ ኔ ሂሰቲዳኮ አራሜ አሳ ጸናዳ ሙሉራ ዳይሳና፤ ሃኢ ጊዲኮ ኔ ኢዛ ሄሹቶ ጸላ ጸናና» ጊዴሰ።

20 ኤልሳኢካ ሃይቂዴሰ፤ አሳይ ኢዛ ሞጊዴሰ። ሄ ዎዴ ሞአቤ አሳይ ላይላን ላይላን ኦፊንላ አጊናታን ኢሰራኤሌ አሳ ቦላ ኦላሰ ዎራጃቲሰ።

21 ኢሲቶ ኢሲ ኢሰራኤሌ አሲ ሃይቂዴይሳ ሞጊሼ ሜቶ ጋላናሰ ዛማዲ ኡቲዳ አሳታ ዲንጋቲ ዴሚዳ፤ ሄሳ ጊሻሰ ሃይቂዴይሳ አሃዛ ኤልሳኤ ዱፎን ዬጊዳ፤ አሃዚካ ኤልሳኤ ሜቄሊ ቦቺዳ ማላ ሄራካ ፓጺዲ አዴዚ ባ ቶሆን ኤቂዴሰ።

22 ኢዮአካዜ ካዎቲላ ዎዴ ኡባን አራሜ ካዎ አዛሄሌይ ኢሰራኤሌ አሳ ከሂ ኡንኤላሰ።

23 ጎዳይ ጊዲኮ ኢሰታሰ ቃዴቲዴሰ፥ ሚሼቲዴሰኔ ባ ሲንሊካ ኢሰታኮ ዛሪዴሰ። ሄሲካ አብራሃሜራ፥ ዪሳቃራኔ ያቆቤራ ካሴ ጌሊዳ ጫቆ ቃላ ጊሻሳ። ሃቾ ጋካናሰ ኢዚ ኢሰታ ዳይሳናሰ ኮዪቤና፤ ኢዚ ኢሰታ ባ ሲንላፌ ዲጊቤና።

24 አራሜ ካዎ አዛሄሌይ ሃይቂዴሰ፤ ኢዚ ሃይቂን ኢዛ ናዚ ቤኒ-ሃዳዴይ ኢዛሶሆን ካዎቲዴሰ።

25 ሄሳፌ ጉዬ ኢዮአካዜ ና ዮአሲ፥ ኢዛ አዎ ኩሼፔ አዛሄሌይ ኦሊ ኤኪዳ ካታማታ አዛሄሌ ና ቤኒ-ሃዳዴፔ ዛሪ ኤኪዴሰ፤ ኢዮአሲ ሄሹቶ ኢዛ ጸኒዴሰ፤ ኢሰራኤሌ ካታማታ ሄሳ ማላን ዛሪ ኦይኪዴሰ።

14

የሁዳ ካዎ አማሲያሳ

(2ታሪ 25:1-24)

1 ኢሰራኤሌ ካዎ ኢዮአካዜ ና ዮአሲ ካዎቲዳ ናሞአንሶ ላይላን የሁዳ ካዎ ኢዮአሳ ና አማሲያሲ ካዎቲዴሰ።

2 ኢዚ ካዎቲዛ ዎዴ ኢዛሰ ላይላይ 25፤ ኢዚ ዬሩሳላሜን ኡቲዲ 29 ላይላ ሃሪዴሰ፤ ኢዛ አያ ዮሃአዳዮ ጌቲቲዛ ዬሩሳላሜ ማጫሳ።

3 አማሲያሲ ጎዳ ሲንላን ሎኦ ሚሽ ኦሊዴሰ፤ ጊዴ አቲን ካሴ ኢዛ አዎ ዳዋቲ ኦሶይሳ ማላ ኦሊቤና፤ ኡባ ሚሺካ ባ አዎ ኢዮአሲ ኦሶይሳ ኦሊዴሰ።

4 ዙሞቡላታ ቦላ ዲዛ ጎይኒዛሶቲ ከቺቤቲና፤ አሳይ ዙሞቡላታ ቦላ ያርሾ ሺሾኔ ኤጻኔ ጨዋሴላ ኤሲቤና።

5 አማሲያሲ ባ ካዎቴላ ሚንሊ ኦይኪዳፔ ጉዬ ባ አዋ ዋዲዳ ሹሜታ ዋዲዳስ።

6 ጊዶ አቲን ሙሴ ዋጋ ማጻፋን ጎዳይ፥ «አሲ ባ ኦሊዳ ናጋራን ሃይቆ አቲን አዋቲ ባንታ ናይታ ናጋራን፥ ናይቲ ባንታ አዋታ ናጋራን ሃይቆፊቶ» ጊዱ አዛዚዳ ገሻሰ ካሴ ሼምፖ ዋዲዳይታ ናይታ ዋዲቤና።

7 አማሲያሲ፥ «ማጺኔ ሾባ» ጌቲቲዛሶን ኤዶሜ አሳፔ 10,000 ወርሲዳስ፤ ሴላ ኦሊ ኦይኪዱ ሃች ጋካናሰ ዮቂቲኤሌ ጌቲቲዛ ሱንላ አሚዳስ።

8 ሄሳፌ ጉዬ አማሲያሲ አዩሰ ናዛ ና ኢዮኣካዜ ና ኢሰራኤሌ ካዋ ዮኣሳኮ፥ «ሃ ያ፤ አኔ ኦላዛ ቲራን ጋይቶስ» ጊዱ ቃስታኔ ዬዲዳስ።

9 ኢሰራኤሌ ካዋ ዮኣሲ ዩሁዳ ካዋ አማሲያሴስ፥ «ኢሲ ሊባኖሴ ኪንዲቾይ ኢሲ ሊባኖሴ ዚጋ፥ ሩኔ ናዮ ታ ናዛሰ ማቾ አማ» ጊዳስ። ሄሳፌ ጉዬ ኢሲ ሊባኖሴፔ ዋራ ዶኣይ ዪዲ ኪንዲቾዛ ባ ቶሆን ዬዲዳስ።

10 ቱማካ ኔ ኤዶሜ ጸናዳሳ፤ ጊዲኮካ ኔ ዋዚናይ ዋጋይ ባይንዳ ኦቶሬቶፎ፤ ኔ ኢዛ ጸኒዳ ገሻሰ ዛራጴቶፋ፤ ሼምፓ ኡታ! ኔኒ ኔ ኩንዴሊኔ ዩሁዳ ኩንዴላ ኣይሰ ኮያይ?» ጊ ከቲዳስ።

11 ጊዶ አቲን አማሲያሲ ኢዚ ገዛይሳ ሲዮንታ ኢጺዳስ፤ ሄሳ ገሻሰ ኢሰራኤሌ ካዋ ዮኣሲ ኦላሰ ኬዚዳስ፤ ኢዚኔ ዩሁዳ ካዋ አማሲያሲካ ዩሁዳ ዳሬን ቤቲ-ሼሚሼፔ ሲንላ ባጋን ኦላ ዳንጺዳ።

12 ዩሁዳይ ኢሰራኤሌን ጸኔቲዳስ፤ አሳይ ኢሶይ ኢሶይ ባሶ ባሶ ባቃቲዳስ።

13 ኢሰራኤሌ ካዋይ ዮኣሲ ኣካዚያሳሰ ናዛ ና ኢዮኣሳ ናዛ ዩሁዳ ካዋ አማሲያሳ ቤቲ-ሼሚሼን ዲኢዳስ። ሄሳፌ ጉዬ ዮኣሲ ዬሩሳላሚ ቢዳስ፤ ኤፍሬሚ ጊምቤ ፔንጌፌ ዶሚዲ ጉላ ፔንጌ ጌቲቲዛሶ ጋካናሰ ኣዱሳቴላይ 400 ዋቆ ጊዲዳ ጊምቤዛ ላሊዳስ።

14 ጎዳ ኬላኒኔ ካዋ ሚንጃ ኬላን ዲዛ ዋርቃ፥ ቢራኔ ሄን ቤቲዳ ሚሽ ኡባ ኤኪዲ ዲኤቲዳ አሳካ ኦይኪ ኤኪዲ ሳማሪያ ሲሚዳስ።

15 ዮኣሳ ካዎቴላ ላይላታን ኦሴቲዳዚ፥ ፖሌቲዳዚኔ ሃኒዳ ሃኖቲ ኡባይ ዩሁዳ ካዋ አማሲያሳራ ኦሌቲዳ ኦላይ ኡባይ ኢሰራኤሌ ካዎታ ታሪኬ ማጻፋን ጸፊቲ ዳስ ጊዳኔ?

16 ዮአሲ ሃይቂዲ ባ አዋታን ጋይቲደስ፤ ካሴ ኢሰራኤል ካዋቲ ሞጌቲዛ ሳማሪያን ካዋታ ዱፎን ሞጌቲደስ፤ ኢዛ ና ኢዮርባኣሜይ ኢዛሶሆን ካዋቲደስ።

17 ዮአሳ ናዚ ዩሁዳ ካዋ አማሲያሲካ ኢሰራኤል ካዋ ኢዮአካዜ ና ኢዮአሲ ሃይቂዳ፤ ጉዬ 15 ላይላ ዳኢደስ።

18 አማሲያሳ ካዋቲላ ላይላታን ሃኒዳ ሃኖቲ ዩሁዳ ካዋታ ታሪኬ ማጻፋን ጸፊቲ ደስ ጊዳኔ?

19 ዬሩሳላሜ አሳይ አማሲያሳ ቦላ ሴሪ ዳንዲዳ ጊሻስ ኢዚ ጌዴ ላኪሽ ባቃቲ ቢደስ፤ ጊዶ ኦቲን ኢስቲ ባ ባጋራ ኢዛ ካሌቲዛ አስ ከቲዲ ዎፂሲዳ።

20 ኢዛ አሃዚካ ፓራን ጫኔቲ ዩዲ ዳዊቲ ካታማን ካሴ ኢዛ አዋቲ ሞጌቲዛሶን ዬሩሳላሜን ሞጌቲደስ።

21 ሄሳፌ ጉዬ ዩሁዳ ዴሬ ኡባይ 16 ላይላ ና አዛሪያሳ ኤኪዲ ኢዛ አዋ አማሲያሳ ሶሆን ካዋሊዳ።

22 አማሲያሲ ሃይቂዲ ባ አዋታን ጋይቲዳ፤ ጉዬ አዛሪያሲ ኤላቲ ዛሪ ኦሊዲ ዩሁዳን ጋጊደስ።

ኢሰራኤልን ካዋቲዳ ናምአንሉ ኢዮርባኣሜ

23 ኢዮሲያሳ ና አማሲያሲ ዩሁዳን ካዋቲዳ ታማኔ ኢቻሻንሉ ላይላን ኢሰራኤል ካዋ ዮአሳ ና ኢዮርባኣሜይ ሳማሪያን ካዋቲደስ፤ 41 ላይላ ጋካናስ ሃሪደስ።

24 ኢዚ ጎዳ ሲንላን ኢታ ሚሽ ኦሊደስ፤ ናባጼ ና ኢዮርባኣሜይ ካሴ ኢሰራኤል አሳ ኦሲሲዳ ናጋራ፤ ጉዬ ሲሚቤና።

25 ጎዳ ኢሰራኤል ጸሳይ ጌት-ሄፌሬ ናቤ አማቲ ና ባ አይሌ ዮናሳ ባጋራ ዮቲዳ ማላ ሃማቲ አፂዛ ፑርዴፌ ቢዲ ሃይቆ አባ ጋካናስ ዲዛ ኢሰራኤል ዛዋ ዛሪሲዳይ ኢዮርባኣሜ።

26 አይሌ ጊዲን ዎይኮ ጎቃ ጊዲን ኢሰራኤልን ዲዛይ ኡባይካ ኬሂ ዋዬቲዛይሳ ጎዳይ ቤኢደስ፤ ኢስታ ማዲዛይካ ዴና።

27 ጊዶ ኦቲን ጎዳይ ኢሰራኤል ሱንላ ቢታ ቦላፌ ጳይሳና ጊዲ ካሴ ዮቲቤና ጊሻስ ዮአሳ ና ኢዮርባኣሜን ኤቂዲ ኢስታ አሺደስ።

28 ኢዮርባኣሜ ካዋቲላ ላይላታን ኢዚ ኦሊዳዚ፤ ሃኒዳ ሃኖቲኔ ኦሌቲዳ ኦላቲ ሄሳሉካ ካሴ ዩሁዳይ ሃሪዛሶታ ዳማስቆኔ ሃማቲ ኢዚ ኢሰራኤልስ ዎስቲ ዛሪዳኮ ኢሰራኤል ካዋታ ታሪኬ ማጻፋን ጸፊቲ ደስ ጊዳኔ?

29 ኢዮርባኣሜይ ሃይቂዲ ባ አዋታን ጋይቲደስ፤ ኢዛ ና ዛካራሲ ኢዛሶሆን ካዋቲደስ።

15

የሁዳ ካዎ አዛርያሳ

(2ታሪ 26:1-23)

¹ እስራኤል ካዎ እየርባኣሜይ ካዎቲዳ ናሞኡ ታማኔ ላቸንላ ላይላን የሁዳ ካዎ አማሲያሴ ና አዛሪያሲ ካዎቲዳሰ።

² ኢዚ ካዎቲዛ ዋዴ ኢዛሰ ላይላይ 16፤ ኢዚ ዬሩሳላሜ ኢቻሽ ታማኔ ናሞኡ ላይላ ሃሪዳሰ፤ ኢዛ ኣያ ዪኮልያይ ዬሩሳላሜ ማጫሳ።

³ ካሴ ኢዛ ኣዋ አማሲያሲ ኦሶይሳሶ አዛሪያሲካ ጎዳ ሲንላን ሎኦ ኦሶ ኦሊዳሰ።

⁴ ገዴ ኣቲን ዙምቡላታ ቦላ ጎይኒዛሳሆቲ ዳይቤቴና፤ ኣሳይካ ሄን ያርሾ ሽሾኔ ኤጻኔ ጨዋሴላ ኣጊቤና።

⁵ ጎዳይ ካዎዛ ኢዚ ሃይቃና ጋካናሰ ኢዛ ቦላ ኢንቺራቻ ሃርጌ ዬጊዳሰ፤ ኢዚካ ኣሳፔ ሻኬቲዲ ዱማ ኬላን ኡቲዳሰ፤ ሄ ዋዴ ኢዛ ካዎቲላ ኬላ ኣላፊቲላን ዴራ ኣይሲዛይ ካዎዛ ና ኢዮኣታሜ።

⁶ አዛሪያሳ ካዎቲላ ላይላን ኦሴቲዳዚኔ ሃኒዳ ሃኖቲ ኡባይ የሁዳ ካዎታ ታሪኬ ማጻፋን ጸፊቲ ዳሰ ጊዳኔ?

⁷ አዛሪያሲ ሃይቂዲ ባ ኣዋታን ጋይቲዳሰ፤ ዳዊቲ ካታማን ኢዛ ኣዋታ ዱፎ ማታን ኢዛ ሞጊዳ፤ ኢዛ ና ኢዮኣታሜይ ኢዛሶሆን ካዎቲዳሰ።

እስራኤል ካዎ ዛካራሳ

⁸ የሁዳ ካዎ አዛሪያሲ ካዎቲዳ ሄቹ ታማኔ ኦሰቸንላ ላይላን እየርባኣሜ ና ዛካራሲ ሳማሪያ ካታማን እስራኤልን ካዎቲዳሰ፤ 6 ኣጊናካ ሃሪዳሰ።

⁹ ካሴ ኢዛ ኣዋይ ኦሶይሳሶ ኢዚካ ጎዳ ሲንላን ኢታ ሚሽ ኦሊዳሰ፤ ናባጼ ና እየርባኣሜይ እስራኤል ኣሳ ኦሲሲዳ ናጋራፔ ኢዚ ሲሚቤና።

¹⁰ ያቡሴ ና ሻሎሜይ ዛካራሳ ቦላ ዴንዲዲ ዴራ ሲንላን ኢዛ ቦላ ሜቶ ጋሊ ዋዲዳሰ፤ ኢዛ ሶሆንካ ካዎቲዳሰ።

¹¹ ዛካራሳ ካዎቲላ ላይላታን ኦሴቲዳ ሃራ ሚሻቲካ እስራኤል ካዎታ ታሪኬ ማጻፋን ጸፊቲዳ።

¹² ካሴ ጎዳይ እዩሰ፤ «ኔ ናይቲ ኦይዳንላ ዬሌታ ጋካናሰ እስራኤል ካዎቲላ ኣራታን ኡታና» ጊዲ ዮቲዳ ቃላይ ፖሌቲዳሰ።

ኢስራኤል ካዎ ሻሎሜ

13 ዩሁዳ ካዎ ኦዚያይ ካዎቲዳ ሄሹ ታማኔ ኡዲፋንሶ ላይላን ያቡሴ ና ሻሎሜይ ኢስራኤል ቦላ ካዎቲዳስ። ሳማሪያን ኡቲዲ ኢሲ ኣገና ዳራ ሃሪዳስ። *

14 ጋዴ ና ሚናሄሚ ቲርጸፌ ኬዚ ሳማሪያ ቢዲ ሜቶ ጋሊዳስ፤ ያቡሴ ና ሻሎሜ ዎዲዲ ኢዛሶሆን ካዎቲዳስ።

15 ሻሎሜ ካዎቲላ ላይላታን ኦሴቲዳ ሃራ ኦሶቲኔ ኢዚ ዴንጡሊዳ ዮኦቲ ኢስራኤል ካዎታ ታሪኬ ማጻፋን ጸፊቲዳ።

ኢስራኤል ካዎ ሚናሄሚ

16 ሄ ዎዴ ሚናሄሚ ቲርጸፌ ኬዚዲ ቲፊሳ ካታማ ኣሳኔ ሄ ሄራን ዲዛ ኣሳ ኡባ ቦላ ሜቶ ጋሊዳስ፤ ኢዚ ሄሳሶ ኦሊዳይ ኢስቲ ሄ ካታማይ ፔንጌታ ዶዮንታ ኢዲዳ ገሻሳ፤ ቲፊሳ ኣሳ ዎዲዳሲኔ ሻራ ዲዛ ማጫሳታ ኡባታ ኡሎ ዳኪዳስ።

17 ዩሁዳ ካዎ ኣዛሪያሲ ካዎቲዳ ሄሹ ታማኔ ኡዲፋንሶ ላይላን ጋዴ ና ሚናሄሚ ኢስራኤል ቦላ ካዎቲዳስ፤ ኢዚ ሳማሪያን ኡቲዲ 10 ላይላ ሃሪዳስ።

18 ኢዚ ጎዳ ሲንላን ኢታ ሚሽ ኦሊዳስ፤ ኢዚ ባ ዲዛ ላይላ ኡባን ናባጼ ና ኢዮርባኣሜይ ኢስራኤል ኣሳ ኦሲሲዳ ናጋራፔ ሲሚቤና።

19 ሄሳፌ ጉዬ ኣሶሬ ካዎ ቲሊጌሊቲሊፌሊሶሬይ ቢታዮ ኦሊ ኦይኪዳስ፤ ሚናሄሚካ ባስ ማዶ ዴማናሲኔ ባ ካዎቲላን ዲዛ ባ ዛዎ ሚንላናስ ጊዲ 1,000 ሳቂሌ ቢራ ኢዛስ ኢሚዳስ።

20 ሚናሄሚ ሄ ሚሻ ኢስራኤል ኣሳይ ኬሴቲ ሺሻና ማላ ኦሊዳስ፤ ኢዚ ሄሳሶ ኦሊዳይ ሚሻዛ ኣሶሬ ካዎስ ኢማና ማላ ዱሬ ኣሳይ ኢሶይ ኢሶይ 50 ሳቂሌ ቢራ ኬሳና ማላ ዎልቃሊዳስ፤ ሄሳ ገሻስ ኣሶሬ ካዎይ ሄ ዴሬን ጋዎኦንታ ባ ዴሬ ሲሚ ቢዳስ።

21 ሚናሄሚ ካዎቲላ ላይላን ኦሴቲዳ ሃራ ኦሶቲኔ ሃኒዳ ሃኖቲ ኡባይ ኢስራኤል ካዎታ ታሪኬ ማጻፋን ጸፊቲ ዳስ ጊዴን?

22 ሚናሄሚ ሃይቂዲ ባ ኣዎታን ጋይቲዳስ፤ ኢዛ ና ፊቃሴያሲ ኢዛሶሆን ካዎቲዳስ።

23 ዩሁዳ ካዎ ኣዛሪያሲ ካዎቲዳ ኢቻሽ ታማንላ ላይላን ሚናሄሚ ና ፊቃሴያሲ ሳማሪያ ካታማን ኢስራኤል ቦላ ካዎቲዲ 2 ላይላ ሃሪዳስ።

24 ፊቃሴያሲ ጎዳ ሲንላን ኢታ ኦሊዳስ፤ ናባጼ ና ኢዮርባኣሜይ ኢስራኤል ኣሳ ኦሲሲዳ ናጋራፔ ሲሚቤና።

* 15:13 ኦዚያስ ሃራ ሰንሊ ኣዛሪያሲ ጌቲቲስ።

25 እዚ ኦላ ኣሳ ሃላቃታፔ ኢሶይ ኤሮሜሊዮ ና ፋቁሄይ እዚ ቦላ ዴንዲዴስ፤ ጋላኣዴፔ 50 ኣሰ ባ ቦላ ኤኪ ቢዲ ሳማሪያን ካዎ ኬላን ዲዛ ሚጸን ፊቃሴያሴ፥ ኣርጎባኔ ኣራያራ ኢሲፊ ዎጲዲ እዚሶሆን ካዎቲዴስ።

26 ፊቃሴያሳ ካዎቲላ ላይላን ኦሴቲዳ ሃራ ኦሶቲኔ ሃኒዳ ሃኖቲ ኡባይ ኢሰራኤል ካዎታ ታሪኬ ማጻፋን ጸፊቲዴስ።

ኢሰራኤል ካዎ ፋቁሄ

27 ዩሁዳ ካዎ ኣዛሪያሲ ካዎቲዳ ኢቻሽ ታማኔ ናምኣንሶ ላይላን ኤሮሜሊዮ ና ፋቁሄይ ሳማሪያ ካታማን ኢሰራኤል ኣሳ ቦላ ካዎቲዴስ፤ 20 ላይላ ካዎቲዴስ።

28 እዚካ ጎዳ ሲንላን ኢታ ሚሽ ኦሊዴስ፤ ናባጼ ና ኢዮርባኣሚይ ኢሰራኤል ኣሳ ኦሲሲዳ ናጋራፔ ሰሚቤና።

29 ኢሰራኤል ካዎ ፋቁሄይ ካዎቲ ዲዛ ላይላታን ኣሶሬ ካዎ ቱለጌሊቱሊፊሊሶሬይ ዩዲ ኢዮኔ፥ ኣቤሊ-ቤቲ-ማኢካ፥ ያኖኬ፥ ቃዴሴ፥ ሃጾሬ፥ ጋላኣዴ፥ ጋለላኔ ኒፍታሌሚ ዴራካ ኢሲፊ ጋሊ ኦይኪዴስ። ኣሳካ ዲኢ ኤኪዲ ኣሶሬ ዴሬ ኤፊዴስ።

30 ሄሳፊ ጉዬ ኤላ ና ሆሴኤይ ኤሮሜሊዮ ና ፋቁሄ ቦላ ዴሬዛ ዴንላዴስ፤ እዚ ቦላ ሚቶ ጋሊዲ ዎጲዴስ፤ ኦዚያ ና ኢዮኣታሚይ ካዎቲዳ ናምኡ ታማንላ ላይላን ሆሴኤይ ፋቁሄ ሶሆን ካዎቲዴስ።

31 ፋቁሄ ካዎቲላ ላይላታን ኦሴቲዳ ሃራ ኦሶቲኔ ሃኒዳ ሃኖቲ ኡባይ ኢሰራኤል ካዎታ ታሪኬ ማጻፋን ጸፊቲ ዴስ ጌዴኔ?

ዩሁዳ ካዎ ኢዮኣታሚ

(2ታሪ 27:1-9)

32 ኢሰራኤል ካዎ ኤሮሜሊዮ ና ፋቁሄይ ካዎቲዳ ናምኣንሶ ላይላን ዩሁዳ ካዎ ኦዚያ ና ኢዮኣታሚይ ካዎቲዴስ።

33 እዚ ካዎቲዛ ዎዴ እዛሰ ላይላይ 25፤ እዚ ዬሩሳላሚን ኡቲዳ 16 ላይላ ሃሪዴስ። እዚ ኣያ ሳዶቄ ና ኢዬሩሶ ጌቲታዉስ።

34 እዚ ካሴ ባ ኣዎ ኦዚያይ ኦሊዳ ማላ ጎዳ ሲንላን ሎኦ ኦሶ ኦሊዴስ።

35 ጊዶ ኣቲን ዙምቡላታ ቦላን ጎይኒዛሶሆቲ ኪቺቤቲና፤ ኣሳይ ሄን ያርሾ ሺሾኔ ኤጾኔ ጨዋሴላ ኣጊቤና። ኢዮኣታሚይ ጎዳ ኬላሰ ፑዴ ባጋ ፔንጌዛ ዛሪ ጊግሲዴስ።

36 ኢዮኣታሚ ካዎቲላ ላይላታን ኦሴቲዳ ሃራ ኦሶቲኔ ሃኒዳ ሃኖቲ ኡባይ ዩሁዳ ካዎታ ታሪኬ ማጻፋን ጸፊቲ ዴስ ጌዴኔ?

37 ሄ ዎዴ ጎዳይ ኣራሚ ካዎ ኤራሶኔይኔ ኤሮሜሊዮ ና ፋቁሄይ ዩሁዳ ኦላና ማላ ኦሊዴስ።

³⁸ እያታመነ ሃይቂዱ ባ አዋታን ገይቲደሰ፤ ካሴ እዛ አዋቲ ሞጌቲዳ ዱፎን ባ አዋ ዳዊቱ ካታማን ሞጌቲደሰ። እዛ ና እካዜይ እዛሰሆን ካዋቲደሰ።

16

የሁዳ ካዎ ኦካዜ
(2ታሪ 28:1-27)

¹ ኤሮሚሊዮ ና ፋቄሄይ ካዋቲዳ ታማኔ ለፑንላ ላይላን ዩሁዳ ካዋ ኢዮኣታሜ ና ኣካዜይ ካዋቲዳሰ።

2 አካዜይ ካዎተዝ ዋጅ ኢዛስ ላይላይ 20፤ ኢዜ ዩሩሳሌምን ኡተዱ 16 ላይላ ሃሪዴስ። ኢዛ አዋ ዳዊቲ ሎኑ ኮሊዳ ማላ ጎዳ ሲጎሳን ሎኑ ኮሊቤና።

³ እዚ ካሴ አሰራኤል ካዎታ ካሊደስ፤ ሄሳፊካ ቦላራ ጎዳይ አሰራኤል ኣሳ ሲገላፌ ጎዲ ኬሲዳ ካዎቴላታ ቴናቴላ ካሊዲ ባ ና ታማን ጹጌቲዛ ያርሾስ ሺሺደስ።

4 ሄሳቱን ዘመቡለታ ቦላን ጎይነዛሶታን፡ ፖላኖታ ሁኔኔ ሃገይ ዳዩዳ ሚላታ ጋርሳን ያርሾ ያርሹዴሴኔ ኤጳኔ ጩዋሶዴሶ።

5 እራሜ ካዎ እራሲይኔ እሰራኤል ካዎ ኤርምያስ ና
ፋቄሄይ ዩሩሳላሜ ኦላናሲኔ እካዜ ጊዶላናስ ኬዚዳ፤ ጊዶ አትን
እሰቲ እዛ ጸናናሰ ዳንደይቤቱና።

6 ሄ ዋዴ አራሜ ካዋ ኤራሲይ ዩሁዳ አሳ ጎዲ ዬዲዲ ኤላቴ ቢታ አራሜስ ዛሪዳስ፤ ሄሳፌ ጉዬ ኤዶሜ አሳይ ኤላቴ ዪዲ ሃቕ ጋካናሰ ሄን ዳሰ።

7 ሄሳ ጋሶን አካዜይ አሶሬ ካዎ ቴሊጌሊቴሊፌሊሶሬስ፡ «ታጊ ኔስ ሃጋዚዛዴኔ ኔ ና፤ ሄሳ ጊሻስ ኔጊ ሃ ያዳ ታና ኦሊዛ አራማ ካዎፔኔ ኢሰራኤል ካዎ ኩሼፔ አሻ» ገዲ ቃሰታኔ ከቲዳስ።

8 እካዜይ ጎዳ ኬላኒኔ ባ ካዎቴላ ኬላን ዲዛ ቢራኔ ዎርቃ አሶሬ ካዎሰ ኪያቴላ ዬዲዴሰ።

⁹ አሰራሩ ካዋዘነ ኣካዚይ ኢዛ ዋሲዳ ዋሳ ኤሮ ጊ ኤኪዲ ዳማበቆ ጸኒ ኦይኪዳስ። ኣሳካ ዲኢ ኤኪዲ ቂሬ ጌቴተዛሰሆ ኤፊዳስኔ ኤራሰኒካ ዋዲዳስ።

10 ሄሳፌ ጉዬ ካዎ እካዜይ አሶሬ ካዋዛ
ቴሊጌሊቴሊፌሊሶሬራ ጋይታናሰ ዳማሰቆ ቢደሰ፤ ሄን ዳማሰቆን
ዲዛ ያርሾ ያርሼዛሶሆዛ ቤኢዲ ኢዛሰ ኣይፌ ዮኦዛ ፓቴላ
ቆፋሩ ጋላ ፒላጊዲ ቄሴ ኦሪያሰ ዩዲዳሰ።

11 ቄሴ ኦሪያይ ካዎ አካዜይ ዳማስቆፌ ኢዛስ ዩዲዳ ፓቴላ ቆፋ ፒልጊ ዩዲዳይሳ ማላ ያርሾ ያርሺዛሶዛ ኦሊዴስ፤ ካዎ አካዜይ ሲሚ ያናፔ ካሴቲዲ ኦሶዛ ጊጊዴስ።

12 ካዎዚ ዳማስቆፌ ሲሚ ዩዲ ሄ ያርሾሶዎዛ ቤኢዴስ። ኢዚ ሺቂዲ ያርሾ ሺሻናስ ያርሾሶዛ ቦላ ኬዚዴስ።

13 ሄሳፌ ጉዬ ጸጌቲዛ ያርሾኔ ካላ ያርሾ ያርሺዛሶዎዛ ቦላ ሺሺዴስ፤ ኡሻ ያርሾካ ኢዛ ቦላ ጉሲዴስ፤ ኢሲፊቴላ ያርሾ ሱላካ ኢዛ ቦላ ወጺዴስ።

14 ያርሾ ያርሻናስ ኦራላ ኦሴቲዳሶዛፔኔ ጸሳ ኬላፌ ጊዶን ጎዳ ሲጎላን ኤቂ ዲዛ ጸርቂማላፔ ኦሴቲዳ ያርሾሶዛ ካዎ አካዜይ ኢዚ ዲዛሶፔ ዴንሊዲ ኦራላ ኦሴቲዳ ያርሾሶዎዛፔ ፑዴሃ ባጋራ ዎሊዴስ።

15 ሄሳፌ ጉዬ ካዎ አካዜይ ቄሴ ኦሪያ፡ «ሃይሳ ጊታ ኦራላ ያርሾሶዎዛ ቦላ ጸጌቲ ያርሼቲዛ ማላዶ ያርሾዛኔ ኦማርሳን ያርሼቲዛ ካላ ያርሾዛ፡ ቃሴ ጸጌቲ ያርሼቲዛ ካዎዛ ያርሾዛኔ ካላ ያርሾዛ፡ ሄሳላካ ኩሜላ ዴሬዛ ጊሻስ ጸጌቲዛ ያርሾ፡ ካላ ያርሾኔ ኡሻ ያርሾ ሺሻ፤ ጸጌቲዛ ያርሾ ሱላታኔ ሃራ ያርሾ ሱላታ ያርሾ ያርሺዛይሳ ቦላ ወጸ፤ ጊዶ ኣቲን ጸርቂማላፔ ኦሴቲዳ ያርሾሶዎዚ ታኒ ዎጋ ኦይቻናስ ጎኤቲዛሶ ጊዶ» ጊ አዛዚዴስ፤

16 ቄሴ ኦሪያይ ካዎ አካዜይ ኢዛ አዛዚዳ ማላ ኦሊዴስ።

17 ካዎ አካዜይካ ሄ ሚሌራኔ ሃ ሚሌራ ዲዛ ሳንቃታ ሾዲ ኤኪዴስ፤ ሚሽ ኢዛ ቦላ ዎሊ ዩሺዛ ጋሬዛ ቦላፌ ሜቻ ሳኔታ ዲጊዴስ። ጊታ ጎንጌዛ ጋርሳ ባጋራ ቶኪ ኦይኪዳ ጸርቂማላፔ ኦሴቲዳ 12 ኮርማ ሚሰሌታ ቦላፌ ሎቻ ሹቻ ቦላ ዎሊዴስ።

18 አሶሬ ካዎ ኡፋይሳናስ ጊዲ ሳምባታ ጋላስ ካዎ አራታይ ሚጩታና ማላ ጸሳ ኬላን ጶቂ ጊ ኦሴቲዳሶዛኔ ካዎቲ ጎዳ ኬላ ጌሊዛሶፔ ካሬ ባጋራ ዲዛ ፔንጌዛ ዴንሊዴስ።

19 አካዜ ካዎቲላ ላይላን ኦሴቲዳ ሃራ ኦሶቲኔ ሃኒዳ ሃኖቲ ኡባይ ዩሁዳ ካዎታ ታሪኬ ማጻፋን ጸፊቲ ዴስ ጊዴኔ?

20 አካዜይ ሃይቂዲ ባ አዎታን ጋይቲዴስ፤ ኢስቲ ሞጌቲዛሶን ዳዊቲ ካታማን ሞጌቲዴስ፤ ኢዛ ና ሂዘቂያሲ ኢዛሶዎን ካዎቲዴስ።

17

ኢስራኤሌን ወርሴላን ካዎቲዳ ካዎ ሆሴኤ

16:14 ኬሳ 27:1-2፤ 2ታሪ 4:1

16:17 1ካዎ 7:23-39፤ 2ታሪ 4:2-6

16:20 ኢሳ 14:28

1 የሁዳ ካዎ አካዜይ ካዎቲዳ ታማኔ ናምአንሶ ላይላን ኤላ ና ሆሴኤይ ሳማሪያ ካታማን ኢስራኤል ቦላ ካዎቲዳስ፤ 9 ላይሊካ ዴሬዛ ሃሪዴስ።

2 ኢዚካ ጎዳ ሲንላን ኢታ ሚሽ ኦሊዴስ፤ ጊዶ አቲን ኢዛፔ ሲንላን ኢስራኤልን ካዎቲዳይቲ ኦሊዳይሳ ኬና ጊዴና።

3 አሶሬ ካዎ ሳሊሚናሶሬይ ኢዛራ ኦሌታናስ ዪዴስ፤ ሆሴኤይ ኢዛስ ሃሪቲዴሲኔ ጊሪዴስ።

4 ሆሴኤይ ጊብጼ ካዎ ሲጎሬኮ ከታ ዬዲዳ ጊሻሲኔ ካሴ ኢዚ አሶሬ ካዎስ ላይላን ላይላን ጊራ ጊሪዛይሳ ዲጊዳ ጊሻስ አሶሬ ካዎይ ሆሴኤይ ኢዛ ካዲዳይሳ ኤሪዴስ፤ ሄሳ ጊሻስ ሳሊሚናሶሬይ ኢዛ ያይኪ ቃሾ ኬላን ዩጊዴስ። *

5 አሶሬ ካዎይ ዴሬዛ ሙሌራ ዎራጂዴስ። ሳማሪያ ዛሪ ዛሪ ሄሹ ላይሳ ጊዳሊዴስ።

6 ሆሴኤይ ካዎቲዳ ኡዱፋንሶ ላይላን አሶሬ ካዎይ ሳማሪያ ያይኪዴስ። ኢስራኤል አሳ ዲኢ ኤኪዲ አሶሬ ዴሬ ዴንሊ ኤፊዴስ። ሄይታካ አላሄን፣ ጎዛን ሃቦሬ ሻፋ ማታኒኔ ሜዶኔ ካታማታን ኤፊ ዎሊዴስ።

ኢስራኤል ዲኤቴላ

7 ሃይሲ ኡባይ ኢስታ ቦላ ጋኪዳይ ጊብጼ ካዎ ፓሮኔስ ሃሪቲላፊ ኬሲዳ ጎዳ ባንታ ጾሳ ኢስቲ ቆሂዳ ጊሻሲኔ ሃራ ኤቃ ጾሳታስ ጎይኒዳ ጊሻሳ።

8 ጎዳይ ኢስታ ሲንላፊ ጎዲ ኬሲዳ ካዎቲላቲኔ ኢስራኤል ካዎቲ ሄ ቢታዮ ጌልሊዳ ኢታ ሎሴታ ኢስቲ ካሊዳ።

9 ኢስራኤል አሳይ ጎዳ ባንታ ጾሳ ቦላ ኢታ ሚሽ ጌማራ ኦሊዳ፤ ናጊዛሶሆታፔ ዶሚዲ ሚጸራ ጊጊ ዲዛ ካታማ ጋካናስ አሳይ ዲዛ ሶሆን ኡባን ዙምቡላታ ቦላ ባንታስ ጎይናናሶሆ ኦሊዳ።

10 ዙምቡላቲኔ ዳሻ ሚላቲ ዲዛሶን ዲዛሶን ኤቃ ጾሳታ ቱሲኔ አሽሪ ሚሰሌ ቱስ ኤሲዳ።

11 ጎዳይ ኢስታ ሲንላፊ ጎዲ ኬሲዳ ካዎቲላቲ ኦሊዛይሳ ዙምቡላታ ቦላ ኤጸኔ ጩዋሲዳ፤ ጎዳ ሃንቄልዛ ኢታ ኦሶ ኦሊዳ።

12 ጎዳይ ኢስታስ፡ «ሃይሳ ኢንቴ ኦላናስ ቤሴና» ጊዲ ዮቲንካ ኢስቲ ኤቃ ጾሳታስ ጎይኒዳ።

13 ጊዲኮካ ጎዳይ ኢስታስ፡ «ኢንቴ ቢዛ ኢታ ኦፔፔ ሲሚቲ! ካሴ ኢንቴ አዎቲ ኦላናስ ታኒ አዛዚዳ ዎጋ ማላኔ ታ ኦሳንቻ ናቤታ

* 17:4 ሲጎሬ ጊዛይሳ ኢሲ ኢሲ ጌሻ ማጽፋቲ ሶ ጌቲስ።

ባጋራ ታ ኢንቴስ ዮቲዳ ዎጋ ማላ ታ አዛዞታኔ ታ ማራታ ናጊቴ»
ጊዲ ናቤታ ባጋራኔ አጁታ ቤኢዛ አሳታ ባጋራ ኢሰራኤሌሲኔ
ዩሁዳስ ሚንሏ ዮቲ ዎሏዴስ።

14 ጊዳ አቲን ኢስቲ ሲዬቤቴና፤ ኢስቲ ጎዳ ባንታ ጸሳን
አማኔቶንታ ኢዲዳ ባንታ አዋታ ማላ ባ ዎዚና ሙሚሲዳ።

15 ኢዛ ማራ፤ ኢዚ ኢስታ አዋታራ ጌሊዳ ጫቆ ቃላኔ ኢዚ
ኢስታስ ሚንሏ ዮቲዳ ቃላ ካዲዳ፤ ሃዳ ጊዲዳ ኤቃ ጸሳታ
ካሊዳ፤ ባንታስካ ሃዳ ጊዲዳ፤ ጎዳይ ኢስታስ፤ «ኢስቲ ኦሊዛይሳ
ኢንቴ ኦሶፍቴ» ጊዲ አዛዚንካ ኢስቲ ባንታ ዩሾን ዲዛ ካዎቲላታ
ካሊዳ፤ ኢስቲ ኦሶንታ ማላ ጎዳይ ዲጊዳይሳ ፖሊዳ አቲን
አጊቤቴና።

16 ጎዳይ ኢስታ ጸሳይ ኢስታ አዛዚዳይሳ ኡባ ፖሊቤቴና፤
ማራ ሚስሌ ናሞኦታኔ አሼሪ ሚስሌ ኦሊዳ። ሳሎ ጸለንቴሲኔ
ባኦሌስ ጎይኒዳ።

17 ሄሳቶካ ባ አቱማ ናይታኔ ባ ማጫ ናይታ ታማን ጸጊዛ
ያርሾስ ሺሺዳ፤ ማርሊዳኔ ሙሬኒዳ፤ ጎዳ ሲንሳን ኢታ ኦሶ ኦላናስ
ባንታናቴላ ባይዚዳ፤ ኢዛካ ሃንቆስ ዴንሌሊዳ።

18 ሄሳ ጊሻስ ጎዳይ ኢስታ ቦላ ኬሂ ሃንቁቲዴስ፤ ዩሁዳ ቆሞቲ
ጸላ አታፌ ሃንቦ ኢሰራኤሌ ዴራ ባ ሲንሳፌ ሃሲዴስ።

19 ዩሁዳ ቆሞቲ ጊዲኮካ ካሴ ኢሰራኤሌ፤ ኤኪዳ ሎሴታ
ካሊዳ አቲን ጎዳ ባንታ ጸሳ አዛዞታ ናጊቤቴና።

20 ሄሳ ጊሻስ ጎዳይ ኢሰራኤሌ አሳ ኡባካ አጊዴስ፤
ኡንኤሊዴሲኔ ባ ሲንሳፌ ዲጋናሼ ጋካናስ ዲኢዛይታ ኩሼን አሊ
ኢሚዴስ።

21 ኢዚ ኢሰራኤሌ አሳ ዳዊቲ ኬላፌ ሻኪዳ፤ ጉዬ ኢስቲ
ናባጼ ና ኢዮርባኦሜ ካዎሊዳ፤ ኢዮርባኦሜይካ ኢሰራኤሌይ ጎዳ
ካሎንታ ማላ ባሌሊዲ ጊታ ናጋራ ኦሲሲዴስ።

22 ኢሰራኤሌ አሳይካ ኢዮርባኦሜ ናጋራን ሚኒ ኤቂዴስ፤ ሄሳፌ
ሲሚቤና።

23 ጎዳይ ባ አይሌታ ናቤታ ባጋራ ኢስታስ ካሴ ሚንሏ ዮቲዳ
ማላ ባ ሲንሳፌ ኢስታ ዲጋና ጋካናስ ኢስቲ ናጋራ ኦሶ ጉጂ
ጉጂ ቢዳ፤ ሄሳ ጊሻስ ኢሰራኤሌ ዴሬይ ባ ዴሬ፤ ዲኤቲ አሶሬ
ዴሬ ቢዴስ፤ ሃኢካ ሄን ዴስ።

ሳማሪያን ዲንካኒዳ አሶሬ አሳ

24 አሶሬ ካዎይ ዴሬዛ ባቢሎኔ፤ ኩታ፤ አዋ፤ ሃማቴ፤
ሴፋርዎይሜ ካታማ፤ ሺሺ ኤሂዲ ካሴ ኢሰራኤሌ አሳይ ዲዛሶን

ዳና ማላ ሳማሪያ ካታማታን ዋሊደስ። ኢስቲካ ሳማሪያ ባስ ላቲዲ ሄ ካታማታን ደስ ኦይኪዳ።

25 ኢስቲ ሄን ደስ ደሚዳ ማላ ጎዳስ ጎይኖ ኣገገዳ፤ ሄሳ ገሻስ ጎዳይ ጋሞታ ኢስታ ቦላ ዩዲደስ፤ ጋሞቲ ኢስታፊ ኣማርዳይታ ማንፎሬላ ዋዲዳ።

26 ኣሶሬ ካዎስ፡ «ኔኒ ሳማሪያ ካታማታን ኤፋ ዋሊዳ ኣሳይ ሄ ካዎቲፋ ጸሳይ ኣይ ኮይዛኮ ኤሪቤና፤ ሄሳ ገሻስ ጸሲ ኣሳ ማንፎሬላ ዋዲዳ ጋሞታ ዩዲደስ» ገዛ ዋሬይ ጋኪደስ።

27 ሄሳፊ ጉዬ ኣሶሬ ካዎዚ፡ «ኢንቴ ሳማሪያፔ ዲኢ ኤሂዳ ቄሴታፔ ኢሳ ጉዬ ሄ ዳሬ ዛሪ ኤፊዲ ሄ ዳሬ ጸሳይ ኣይ ኮይዛኮ ዳሬዛ ኢዚ ታማርሶ» ገዲ ኣዛዚደስ።

28 ሄሳ ገሻስ ሳማሪያፔ ኢስቲ ዲኢ ኤፊዳ ቄሴታፔ ኢሶይ ቤቴሌ ሲሚዲ ኣሳይ ጎዳስ ዋስቲ ጎይናኮ ታማርሲደስ።

29 ገዲኮካ ኣሳይ ባ ዛርኬን ዛርኬን ባ ዲዛ ካታማን ካታማን ባስ ጸስ ሜዲደስ፤ ሄሳካ ካሴ ሳማሪያ ዳሬ ኣሳይ ዙሞቡላታ ቦላ ጎይኒዛሶቻታን ኤፊ ኤፊ ኤሲደስ።

30 ባቢሎኔፔ ዩዳይቲ ሱኮቴ-ቤኖቴ ኦሊዳ፤ ኩታፔ ዩዳይቲ ኔሪጋሌ ኦሊዳ፤ ሃማቴፔ ዩዳይቲ ኣሽማቴ ኦሊዳ፤

31 ኣዌቲ ኤሊባዛሬኔ ታሪታቄ ጌቴቲዛ ኤቃ ጸሳታ ኦሊዳ። ሴፋርዋይማፔ ዩዳይቲ ኣዲራሜሌኬኔ ኣናሜሌኬ ጌቴቲዛ ኤቃ ጸሳታስ ባንታ ናይታ ጸጌቲዛ ያርሾስ ሺሺዳ።

32 ጎዳስ ጎይኒዳ፤ ገዶ ኣቲን ኢሲ ኢሲ ቆሞቲ ካሴ ባ ዩዳ ዳራ ሎሴ ካሊዳ፤ ዙሞቡላታ ቦላ ዲዛ ኤቃ ጸሳታ ሃጋዚዛ ቄሴታ ሹሚዳ።

33 ኢስቲ ኢሲ ባጋራ ጎዳስ ጎይኒሼ ሃራ ባጋራ ቃሴ ካሴ ባንታ ካዎቲፋ ሎሴ ማላ ባንታ ኤቃ ጸሳታስ ጎይኔቲስ።

34 ሄ ሎሴዛ ሃቕ ጋካናስ ኣገቤቴና፤ ጎዳስ ቤሲዛ ማላ ጎይኔቴና፤ ኢስራኤሌ ገ ደይገዳ ያቆቤ ቆሞታስ ኢዚ ኢሚዳ ማራታኔ ዙሬታ፡ ዋጋታኔ ኣዛዘታ ካሌቴና።

35 ጎዳይ ካሴ ኢስራኤሌ ኣሳታራ ጫቆ ቃላ ጌሊዛ ዋዳ፡ «ኢንቴ ሃራ ጸሳታስ ጎይኖፍቴ፡ ኢስታስ ያይኖፍቴ፤ ኢስታስ ሃጋዘፒቴኔ ኢስታስ ያርሾፍቴ።

36 ገዶ ኣቲን ኢንቴ ጎይናናስ ቤሲዛይ ባ ገታ ዋልቃኒኔ ሚጮቲዳ ባ ኩሼን ኢንቴና ገብጹ ቢታፊ ኬሲዳ ጎዳስ ጸላ ገዶ። ኢንቴ ኢዛስ ጸላ ጎይኒቴኔ ኢዛስ ያርሺቴ።

37 ኢዚ ኢንቴስ ጸፊዳ ማራታኔ ዘፊታ፥ ዋጋታኔ ኣዛዘታ ኣይ ዋዳካ ሎኤሊ ናጊቴ። ሃራ ኤቃ ጸሳታስ ጎይኖፍቴ።

38 ታኒ ኢንቴናራ ጫቄቲዳ ጫቆዛ ባሎፒቴ፤ ኤቃ ጸሳስ ጎይኖፍቴ።

39 ኢንቴ ዋርኬታ ኡባ ኩሼፔ ኢንቴና ኣሺዛይ ኢዛ ጊዲዳ ጊሻስ ጎዳ ኢንቴ ጸሳስ ጎይኒቴ» ጊ ኣዛዚ ዋሊደስ።

40 ጊዶ ኣቲን ኢስቲ ካሴ ባንታ ሎሴን ሚኒ ኤቂዳ ኣቲን ሲሚቤቴና።

41 ሃይቲ ሃ ዴሬቲ ኢሲ ባጋራ ጎዳስ ጎይኒኮካ ሃራ ባጋራ ቃሴ ባ ጊግሲዳ ኤቃ ጸሳታስ ሃጋዜቴስ። ኢስታ ናይቲኔ ኢስታስ ናይታ ናይቲካ ካሴ ኢስታ ኣዋቲ ኦሊዳ ማላ ሃኢካ ኢዛሶ ኦሌቴስ።

18

ዩሁዳ ካዎ ሂዝቂያሳ

(2ታሪ 29:1-2፤ 31:1)

1 ኢስራኤሌ ካዎ ኤላ ና ሆሴኤይ ካዎቲዳ ሂቫንሶ ላይላን ዩሁዳ ካዎ ኣካዜ ና ሂዝቂያሲ ካዎቲደስ።

2 ኢዚ ካዎቲዛ ዋዴ ኢዛስ ላይላይ 25፤ ኢዚ ዬሩሳላሚን ኡቲዲ 29 ላይላ ሃሪደስ። ኢዛ ኣዬያ ዛካራሳ ና ኣቢዮ ጌቲታዉስ።

3 ኢዛ ኣዋ ዳዊቲ ጎዳ ሲንላን ኦሊዳ ማላ ኢዚካ ሎኦ ኦሊደስ።

4 ዙዋቡላታ ቦላ ዲዛ ኤቃ ጸሳታ ሚንፊሬሊ ዩጊደስ፤ ኣሼሪ ሚስሌ ቱሳታካ ቃንጾሬሊ ዩጊደስ፤ ቃሴ ሙሴይ ጳርቂማላፔ ኦሊዳ ሾሻካ ሚንፊሬሊደስ፤ ጋሶይካ ሄ ዋዴይ ጋካናሰካ ኢስራኤሌ ኣሳይ ኢዛስ ኤጻኔ ጩዋሲሼ ጋምኢዳ ጊሻሳ፤ ሄ ሾሻ ሱንላይ ናሁሽታን ጌቲቴስ።

5 ሂዝቂያሲካ ጎዳ ኢስራኤሌ ጸሳን ኣማኔቲደስ፤ ኢዛፔ ካሴ ጊዲን ዋይኮ ጉዬፔ ካዎቲዳ ዩሁዳ ካዎታ ኡባታን ኢዛ ማላይ ዴና።

6 ኢዚ ጎዳራ ኦይኬቲ ኡቲደስ፤ ኢዚ ጎዳ ካሎፔ ጉዬ ጊቤና፤ ጎዳይ ሙሴስ ኢሚዳ ኣዛዘታካ ናጊደስ።

7 ጎዳይ ኢዛራ ዲዛ ጊሻስ ኢዚ ኦሊዛ ሚሽ ኡባይ ኢዛስ ፖሊቲደስ፤ ኢዚ ኣሶሬ ካዎራ ኤቂቲዲ ኢዛስ ጊራ ጊርንታ ኢጲደስ።

8 ቢዲ ጋዛ ዛዋ ጋካናሲኔ ፊሊሰጾሜ አሳይ ናጊዛ ሻኮይ ዲዛሶ ጋካናሰ ገምቤቲ ኡቲዳ ካታማዮ ጸኒ ኦይኪዴሰ።

9 ሂዝቂያሲ ባ ካዋቲዳ ኦይዳንላ ላይላን፣ ኢሰራኤል ካዋ ኤላ ና ሆሴኤይ ካዋቲዳ ላፑንላ ላይላን አሶሬ ካዋ ሳሊሚናሶሬይ ሳማሪያ ቢዲ ካታማዮ ገደሏዴሰ።

10 ሄዠንላ ላይላ ዉርሴላን ኦይኪዴሰ፤ ሳማሪያይ ኦይኬቲዳይ ሂዝቂያሲ ካዋቲዳ ኡሱፑንላ ላይላን ሆሴኤይ ኢሰራኤል ቦላ ካዋቲዳ ኡዲፋንላ ላይላና።

11 አሶሬ ካዋይ ኢሰራኤል አሳ ዲኢ አሶሬ ኤፊዲ አላሂን፣ ጎዛኔ ገደን፣ ሃሶሬ ሻፋ አቻኒኔ ሜዶኔ ካታማታን ዋሊዴሰ።

12 ሄሲ ኢሰታ ቦላ ጋኪዳ ጋሶይካ ካሴ ጎዳ አይሊ ሙሴይ ኢሰታሰ ዮቲዳ ቃላ ኡባ ኢሰቲ ሲዮንታ ኢጺዲ ጫቆ ቃላ ላሊዳ ገሻሳ፤ ኢዛ አዛዘታካ ዋዚናን ዋሊ ሲዩቤቴናኔ ፖሊቤቴና።

13 ሂዝቂያሳይ ካዋቲዳ ታማኔ ኦይዳንላ ላይላን አሶሬ ካዋ ሴናኪሬሜይ ገምቤቲ ዲዛ ዩሁዳ ካታማታ ኡባ ቦላ ሜቶ ጋሊ ኦይኪዴሰ።

14 ሄሳ ገሻሰ ዩሁዳ ካዋ ሂዝቂያሲ፣ «ቆሂዳይ ታና፤ ኔ ታፔ ሲማርኪ! ታ ኔሰ ኔ ኦይቹዳ ሚሺ ኡባካ ቃንጸና» ገዲ ላኪሼን ዲዛ አሶሬ ካዋዛሰ ሄ ኪታ ዩዲዴሰ። አሶሬ ካዋዚ ዩሁዳ ካዋ ሂዝቂያሳሰ፣ «ኔ ታሰ 10,000 ኪሎ ቢራኔ 1,000 ኪሎ ዋርቃ ዩዳ» ገ ዛሪዴሰ።

15 ሄሳ ገሻሰ ሂዝቂያሲ ጸሳ ኬላኒኔ ባ ካዋቲላ ኬላን ዲዛ ቢራ ኡባ ኢዛሰ አሚዴሰ።

16 ሄ ዋዴ ዩሁዳ ካዋ ሂዝቂያሲ ጸሳ ኬላ ሳንቃታ ቦላኔ ቆሲላታ ቦላ ሜሼቲዳ ዋርቃታ አሶሬ ካዋሰ ሾዲ ሾዲ አሚዴሰ።

ሴናኪሬሜ ማንዴላ

17 አሶሬ ካዋይ ላኪሼፔ ባ ኦላንቻታ አዛዚዛይታሰ ዋና ጋዳዋዛ፣ ኢዛፔ ካሊ ዲዛ ጋዳዋዛኔ ኦላንቻታ ካሌሊዛ ጋዳዋዛ ዳሮ ኦላንቻታራ ዩሁዳ ካዋይ ዲዛሶ ዩሩሳላሜ ከቲ ዩዲዴሰ። ኢሰቲካ ዩሩሳላሜ ቢዲ ማይኦ ሜጪዛይሳ ጋዴ ገደ ኤፊዛ ኦፔ ቦላ ጋና ባጋን ዲዛ ኤሌ ሃሊ ዩዛ ዛራ ገደሏዴ።

18 ካዋዛኮ ዩዲዳ፤ ሄሳፌ ጉዬ ካዋቲላ ኬላን ዋና አዛዚዛ ኪልቂያሳ ና ኤልያቂሜይ፣ ጸፊዚ ሼቢናይ፣ ሄሳኦካ ታሪኬ ጸፊዛ አሳፌ ና ዮኣሂ ኢዛኮ ቢዳ።

19 ኦላንቻታ ካሌሊዛ ጋዳዋዚ ኢሰታሰ፣ «ኢንቴ ሂዝቂያሳሰ፣ ረገታ አሶሬ ካዋይ ኔና፣ ሃይሳ ማላ ኔ ዋዚና ሚንሊዳይ አኬ?»

20 ኔኒ ታሰ ኦላ ኤራቲሊኔ ዋልቃይ ዴሰ ጋሳ፤ ገደ አቲን ሄሲ ዋሬ ጸላ፤ ኔኒ ታ ቦላ ማካሊዳይ ኦናን አማኔታዳ?

21 ኔኒ ኢዚን አማኔቲዛ ገብጾይ ኢዚን ዜምፒሺን ሜቂ ዋጂዲ ኩሼን ኤቂዛ ዲንጨቲዳ ማቃ ማላ፤ ገብጾ ካዎ ፓርኔይካ ባናን አማኔቲዛ አሳ ኡባሲካ ሄሳ ማላ፤ ገዲ ዮቲቲ።

22 ቃሴካ ኔኒ፡ ሓ አማኔቲዛይ ጎዳ ኑ ጸሳና፤ ጋዳ ታሰ ዮታናሰ ኮይኮ ሂዝቂያሲ ዩሁዳኔ ዩሩሳላሜ፡ ሓንቲ ጎይናናሰ ቤሲዛይ ሃይሳ ዩሩሳላሜን ዲዛ ያርሾሶዛ ሲንፋና፤ ገዲ ዙምቡላታ ቦላ ዲዛ ጎይኒዛሶሆታኔ ያርሺዛሶሆታ ላሊዳይ ኢዛ ገዴኔ?

23 «ኢዚ ኔሰ ሃንኮ ታ ጎዳዛ አሶሬ ካዎራ ማንዴታ፤ ኔኒ ቶጋንቻታ ዴማና ዳንዳይኮ ታ ኔሰ 2,000 ቶጋ ፓራታ አማና።

24 ኔኒ ጨቁቲዛይ ገብጾ ፓራ-ጋሬታኒኔ ገብጾ ፓራታን ገዲኮካ ታ ጎዳዛ፤ ጋርሳራ ዲዛ ኦላንቻታ ሹሜታ፤ ሃራይ አቶሺን ኢሳ ኔ ዋሰታ ዛራና ዳንዳይ?

25 ሄሳፌ ቦላራ ታኒ ሜቶ ኔ ቦላ ጋላዳ ሃኖ ሶሆዮ ጳይሳናሰ ጎዳ ሼኔይ ባይንዳ ዪዳ ሚሳቲዜ? ታኒ ሃኖ ዴሬዮ ዋራጃ ጳይሳና ማላ ታሰ ዮቲዳይ ጎዳ» ገዴሰ።

26 ሄሳፌ ጉዬ ከልቂያሳ ና ኤልያቁሜይ፡ ሼቢናይኔ ዮኣሂ ኦላንቻታ ካሌሊዛይሳሰ፡ «ኑኒ ኤሪዛ ገሻሰ ኔ ኑሰ አራሜ ቃላራ ዮታ፤ ገምቤዛ ቦላ ዲዛ አሳቲ ሲዪዛ ገሻሰ ኢብራዊታ ቃላራ ኑሰ ዮቶፓ» ገዴ።

27 ኦላንቻታ ጋዳዋዚ ዛሪዲ፡ «ታ ጎዳይ ታና ከቲዳይ ኢንቲሲኔ ኢንቲ ጎዳሰ ጸላ ዮታናሴ? ሃንኮ አሳይካ ኢንቲይሳላ ቡሮ ባርካ ባ ሺ ማና ማላኔ ባርካ ባ ሼሽ ኡያናሰ ገምቤዛ ቦላ ዲዛይታራ ዮታናሰ ገዴኔ?» ገዴሰ።

28 ሄሳፌ ጉዬ ኦላንቻታ ጋዳዋዚ ኤቂዲ ባ ቃላ ጶቁ ሂሰቲዲ ኢብራዊታ ቃላራ፡ «ኢንቲ ሃኢ ገታ አሶሬ ካዎ ቃላ ሲዪቲ!

29 ካዎይ፡ ሂዝቂያሲ ኢንቲና ታ ኩሼ፤ አሻናሰ ዳንዳዮንታ ገሻሰ ኢዚ ኢንቲና ባሌል፤ ጌሰ።

30 ቃሴካ ሂዝቂያሲ ኢሰታሰ፡ ሓዳይ ኑና አሻናይሳሰ ሲዴይ ዴና፤ ሃና ካታማያ አሶሬ ካዎሰ አቆ አሜቲኩ፤ ገዲ ኢንቲ ጎዳን አማኔታና ማላ ኢዚ ኢንቲሰ ዮቲዳይሳ አማኒ ኤኮፍቲ።

31 «ሂዝቂያሲ ኢንቲና ገዛይሳ ሲዮፒቲ፤ አሶሬ ካዎይ፡ ሓናራ ኢንቲሰ ሳርቲል ሜጂቲ፤ ኢንቲ ታሰ ኩሼ አሜቲ፤ ሄሳፌ ጉዬ ኢንቲፌ ኢሶይ ኢሶይ ባ ባላሴ ሚላ ኣይፌኔ ባ ዎይኔ ሚላ ኣይፌ ማና፤ ባ ሃላ ላላፌ ሃል ኡያና።

32 ሄሲካ ሃናናይ ታኒ ኢንቲና ጌዴ ኢንቲ ቢታዮ ሚሳቲዛ ሶሆ ካሊኔ ዎይኔ ኡሺ፡ ዳቦይኔ ዎይኔ ኣታኪልቲይ፡ ዎጋራ ሚሊኔ ኤሲ ዲዛሶታ ኢንቲና ጌልፋና ጋካናሳ፤ ኢንቲ ሃይቆ ኣገዲ ዴኦ ዶሪቲ።

ጌሰ። ሂዘቂያሲ ኑና ጎዳይ አሻና ጊዲ አንቴና ባሌሊዛ ጊሻሰ
አንቴ አዚ ጊዛይሳ ሲኖፒቴ።

33 አሶሬ ካዎ ኩሼፔ ቢታ ቦላ ዲዛ ጸሳታፔ ባ ካዎቴል
አሺዳይ ኦኔ?

34 ሃማቴ ኤቃ ጸሳቲኔ አርፋዴ ኤቃ ጸሳቲ ኦኔ አዋን ዲዞ?
ሴፋርዎይሜ፤ ሄና ኤቃ ጸሳቲኔ አዋ ኤቃ ጸሳቲ ሂሰቲን አዋ
ጋኪዶ? ኢሰቲ ሳማሪያ ታ ኩሼፔ አሺዶ?

35 ሃይታ ሃ ዴሬታ ኤቃ ጸሳታፔ ባ ዴሬ ታ ኩሼፔ አሻና
ዳንዳይዳይ ኦኔ? ሂሰቲን ጎዳይ ዩሩሳላሜ ታ ኩሼፔ ዋሰቲ
ዋሊ ኤካና ዳንዳይዜ?» ጊዴሰ።

36 ጊዶ ኦቲን ዴሬዚ ጮኡ ጊዴሰ፤ ኢዛሰ አይኮካ ዛሪቤና፤
ካዎዚ፤ «አንቴ ኢዛሰ ዛር አዋንታ ማላ» ጊ ካሴ አዛዚ
ዋሊዴሰ።

37 ሄሳፌ ጉዬ ካዎቴላ ኩላ አዛዚዛ ከልቂያሳ ና ኤልያቄሜይ፤
ጻፌ ሼቢናይኔ ታሪኬ ጻፌ አሳፌ ና ዮኦሂ ባንታ ማይኦ ዳኪ
ዩጊዳ፤ ሂዘቂያሳኮ ቢዲ ኦላንቻታ ጋዳዋዚ ኢሰቲ ጊዳይሳ ኢዛሰ
ዮቲዳ።

19

ካዎ ሂዘቂያሲ ናቤ አሳያሳ ኦይቺዳ ዞሬ

(ኢሳ 37:1-7)

1 ካዎ ሂዘቂያሲ ሄሳ ሲዬዲ ባ ማይኦ ዳኪዴሰ፤ ማቃ
ማይኢዲ ጸሳ ኬል ጌሊዴሰ።

2 ሄሳፌካ ካዎቴላ ኩላን አዛዚዛ ኤልያቄሜይ፤ ጻፌ ሼቢናይኔ
ዋና ቄሴቲ ማቃ ማይኢዲ አዋጾ ና ናቤ አሳያሳኮ ባና ማላ ኡባ
ኪቲ ዩዲዴሰ።

3 ኢሰቲካ ኢዛሰ፤ «ሂዘቂያሲ፤ ሃና ጋላሳያ ሜቶ፤ ሚሬኔ
ካወሻቴላ ጋላሰ፤ ሃና ጋላሳያ ናይ ዩሌታናሰ ኦያ ኬሃ ሚጸታሼ
ዩላ ዩጋናሰ ዋልቃ ቆይዳ ጋላሳ።

4 ዴኦ ጸሳ ካወሻናሰ ባ ጎዳ አሶሬ ካዎይ ዩዲዳ ጋዳዋ ቃላ
ኡባካ ጎዳ ኔ ጸሳይ ሲዬዳ ጊዳና፤ ኢዚ ሲዬዳ ቃላ ጊሻሰ ጎዳ
ኔ ጸሳይ ኢዛ ሃንቃና ማላ ኔኒ ሼምፖራ ፓጻ ዲዛ አሳሰ ጸሳ
ዋሳርከ!» ጊዴሰ» ጊዳ።

5 ካዎ ሂዘቂያሳ ሹሜቲ አሳያሳኮ ዬዳ ዋዴ፤

6 አሳያሲ ኢሰታሰ፤ «አንቴ አንቴ ጎዳሰ፤ ሳዳይ ኔሰ አሶሬ
ካዎ ኦላንቻቲ ታ ቦላ ጫሻ ቃላ ሃሳይዳይሳ ሲያዳ ባቦፋ፤

7 ታኒ ኢዛ ቦላ ሃሳ ማላ አያና ዬዳና፤ ኢዚካ ዋሬ ሲዬዲ ጉዬ ባ ዳሬ ሲሚ ባና፤ ኢዚ ሃን ማሻን ሃይቃና ማላ ታ ኢዛ ኦፋና፤ ጊ ዮተቴ» ጊደስ።

8 ኦላንቻታ ጋዳዋዚካ አሶሬ ካዋይ ላኪሼፔ ዳንዲ ቢዳይሳ ሲዬዲ ጉዬ ሲሚደስ፤ ካዋዚ ሊቢናራ ኦሌተሺን ዳሚደስ።

9 ሄ ዋዴ ቶጽያ ዳሬ ዬሌታ ጊዲዳ ጊብጾ ካዋ ቲራቄይ ኢዛ ኦላናስ ዩሳ ቦላ ዲዛይሳ ሴናኪሬሚይ ሲዬደስ፤ ሃሳ ጊሻስ ዛሬሊዲ ሂዝቂያሳኮ ቃስታኔታ ቦላ ዲብዳቤ።

10 «እንቴ ቢዲ ዩሁዳ ካዋ ሂዝቂያሳስ፤ ሓ ኢዛን አማኔተዛ ጸሳይ ዬሩሳላሚይ አሶሬ ኩሼን ኩንዱኩ፤ ጊዲ ኔና ባሌሶፎ።

11 ሃይሳፌ ካሴ አይዴካ አሶሬ ካዋቲ ዳሬ ኡባ ቦላ አይ ኦሊዳኮ ኔ ሲያዳሳ፤ ኢዚ ኢስታ ሙሌራ ቆይሲደስ፤ ሂስቲን ኔኒ ኬሳ ኤካዳ አታናዝ ኔስ ሚሳቲዜ?

12 ካሴ ታ አዋቲ ቆይሲዳ ካዋቴላታ ገዛኔን፤ ካራኔን፤ ኤራፋሴን ሃሳሶካ ታላሳሬን ዲዛ ኤዴኔ አሳታ ኢስታ ኤቃ ጸሳቲ ኢስታ አሺዶ?

13 ሃማቲ ካዋቲኔ አርፋዴ ካዋቲ ሃኢ አዋን ዲዛ? ሴፋርዋይሚ ካታማ ካዋዚ አዋን ዲዜ? ቃሴካ ሄና ካዋይኔ ኢዋ ካዋቲ ሃኢ አዋን ዲዛ?» ጊ ከቲደስ።

ሂዝቂያሳ ዋሳ

14 ሂዝቂያሲ ዲብዳቤዛ ቃስታኔታ ኩሼፔ ኤኪ ናባቢደስ፤ ሃሳፌ ጉዬ ፑዴ ጎዳ ኬሳ ኬዚዲ ዲብዳቤዛ ጎዳ ሲንፋን ሚጪደስ።

15 ሃሳፌ ጉዬ ሂዝቂያሲ ጎዳኮ፤ «ኪሩቤ ቦላ ኔ አራታን ኡቲዳ ጎዳ ኢስራኤል ጸሶ! ቢታ ቦላ ዲዛ ኡባ ቦላ ጸሲ ኔና፤ ሳሎኔ ሳኦ ሚቂዳይ ኔና።

16 ጎዳዉ! ሃኢ ኔኒ ኔ ሃይሳ ዬጋዳ ሃይሳ ሲያ፤ ኔኒ ኔ አይፌታካ ዶያዳ ጸላ፤ ሴናኪሬሚይ ዴኦ ጸሳ ጫያናስ ከቲዳ ቃላ ኤዝጋ።

17 «አቤት ጎዳዉ፤ አሶሬ ካዋቲ ሃይታ ካዋቴላታኔ ኢስቲ ቢታ ቱሙካ ቆይሲዳ፤

18 ኢስታ ኤቃ ጸሳታካ ታማን ዩጊ ጸጊ ቆይሲዳ፤ ኢስቲካ አሳ ኩሼን ሚሳፌኔ ሹቻፌ ኦሴቲዳይታ ኣቲን ጸስ ጊዴቴና።

19 ሃኢካ ጎዳዉ ኦ ጸሳዉ! ኔኒ ጸላ ጸሳ ጊዲዳይሳ ሃ ቢታ ቦላ ዲዛ ካዋቴላቲ ኤራና ማላ ኢዛ ኩሼፔ ኦና አሻ» ጊ ዋሲደስ።

ኢሳያሲ ሴናኪሬሜ ጊሻስ ዮቲዳ ቲንቢቲ

(ኢሳ 37:21-38)

20 ሃሳፌ ጉዬ አሞጾ ና ኢሳያሲ ካዎ ሂዝቂያሳስ ሃይሳፌ ካሊ ዲዛ ከታ ዩዲዴስ። «ጎዳ ኢስራኤል ጸሳይ፥ ላሶሬ ካዎ ሴናኪሬሜ ቦላ ኔ ዋሲዳ ዋሳ ታኒ ሲያዲስ» ጊዴስ።

21 ሃሳ ጊሻስ ጎዳይ ኢዛ ቦላ ዮቲዳ ቃላይ ሃይሳ።
«ጌላኦ ጸዮኔ ናያ

ኔና ካቆዲሲኔ

ካዉሻዲስ፤

ዩሩሳላሜ ናያ ኔ ኢዚ ቦላራ

ፒራቆ ቢሺን

ባ ቆጂ ኔ ቦላ ቃላዉስ።

22 ሂስቲን ኔ ጫዴዲኔ

ካዉሺዳይ ኦኔ?

ኔኒ ኔ ቃላ ቆቁ ሂስቲዳይ

ኦና ቦላ?

ኔ ኦቶሬቴላን ዴሬቃ ጸሊዛይ

ኦና ቦላ?

ኢስራኤል ጊሻዛ ቦላዬ!

23 ኔኒ ቃስታኒዳይታ ባጋራ

ጎዳ ቦላ ጫሽ ኮራዳሳ።

ኔኒ፥ ሩታኒ ታስ ዲዛ ዳሮ

ፓራ-ጋሬታን

ፑዴ ቆቃ

ዙማታ ቦላ ኬዛዲስ፤

ለባኖሴ ዙማስ ጸራ ጋካዲስ፤

ሄፔ አዲሳ ዚጋ ሚላታኔ

ዶሬቲዳ ጸዲ

ሚላታካ ቃንጸዳሳ፤

ታኒ ኢዛስ ዉርሴላ ዛዋኔ

ጂፒ ጊዳ ዋራን ጋካዲስ።

24 « ሩታኒ ሃራ ዴሬታንካ

ሃላ ኦላ ቦካዲስ፤

ኢስታፌ ሃላ ኡያዲስ፤

ታኒ ታ ቶሆ

ጫማታን ዩቆዳ

ጌብጾ ቢታ ፑልቶታ

ሜሊሳዲስ» ጋዳሳ።

- 25 «ዳር ዋዴፔ ሲንላን
 ኔኒ ገምቤቲዳ
 ካታማታ ቆቆፋዳ፥
 ሹቻ ኬላ ኬሳና ማላ፥
 ታኒ ቆፋ ቃቻ
 ዋሊዳይሳ ሲያቤኪ?
 ቤኒ ሃልቻ
 ዋሊዳይሳ ሃኢ ፖላይሰ።
- 26 ሄን ዲዛ እሳ ዋልቃይካ
 ጨንገ ዉሪዴሰ፤
 ኢስቲ ዳጋሚዲ ዬላ ማይኢዳ፤
 ጮ ማላ ዴምባን ሞኪዳ
 እታኪልቲ ማላ፥
 ቡር ጸጸ ዬደንታ
 ጫሬቻ ማላ፥
 ኬላ ቦላ ሞኪዲ
 ቡር ዲጮንታ ሹሊዳ
 ማታ ማላ ገዲዳ።
- 27 «ኔ አዋን ኡቲዛኮ፥
 ኔ አይዴ ያዳ አይዴ ቢዛኮ
 ኔ ታ ቦላ ሃንቄቲዳይሳ
 ታ ኤራይሰ።
- 28 ኔ ታ ቦላ ሃንቄቲዳ ገሻሰኔ
 ኔ ካዴይ ታ ሃይላን
 ዋዲዳ ገሻሰ
 ታኒ ኔ ሲዴን ዳፎ ዬጋና፤
 ታኒ ኔና ቢጸላ ባርሳና፤
 ኔ ዬዳ ኦጌራ ኔና ጉዬ ዛራና።
- 29 «ሂዝቂያሳ! ሄሳሰ ማላታይ ሃይሳፌ ካሊዛይሳ፤
 « ሂ ላይሰ ዋዲ
 ማዲዳይሳ፤
 ዬዛ ላይሰ አዛባ ማንዴታ፤
 ሄቫንላ ላይላን
 ዜሪዳይሳ ማጸንዴታ፤
 ዋይኔ ቲራ ቶኪዲ
 ኢዛ አይፌ ማንዴታ።
- 30 ሃኢካ ዳዊቲ ኬላፌ

- ጫሻ አቲዳይቲ
ባንታ ጸጸ ዱጌ ዬዳና፤
ቦላራካ አይፌ አማና።
- 31 ዬሩሳላሜን ሸምፖራ
ፓጻ አቲዳይቲ፥
ጸዮኔ ዙማን ሃይቆፔ
አቲዳይቲ አሰቲ ኬዛና።
- ጎዳ ኡባፌ ዋልቃማ
ጸሳ ዚልኤቲሉ
ሄሳ አላና።)
- 32 «ጎዳይ አሶሬ ካዎ ጊሻሰ፥
« ሳኢ ዐሮ ሃ ካታማዮ
ሙሌካ ጌሌና፤
አሲ ቶራካ ጸንጌና፤
ጎንዳሌ ኦይኪዱ አዚኮ ሸቄና፤
አዞ ቢታ ዶሬን ጊዶሌና።
- 33 አዚ ባ ዪዳ ኦጌራ ሲሚ ባና፤
ሃ ካታማዮ ሙሌራ
ሲሚ ጌሌና።
- 34 ታ ጊሻሰኔ ታ አይሌ
ዳዊቱ ጊሻሰ ጋዳ
ሃሮ ካታማዮ
ታኒ ጎንዳላ አሻና ጌሰ።»
- 35 ሄ ጋላሳ አማርሰ ጎዳ ኪታንቻይ ኬዚዱ አሶሬ አሳይ
ዱንካኒ ኡቲዳሶሆን 185,000 እሰ ዋጁዳሰ፤ ዋንቴላ ጋላሰ
አሳይ ዳንዲሺን ሄራ ኡባን አሃይ ኩሚዳሰ።
- 36 አሶሬ ካዎ ሴናኪሬሜይ ሄፔ ዳንዲ ቢዳሰ፤ ጉዬ ናናዌ
ሲሚ ቢዱ ሄን ኡቲዳሰ።
- 37 አሲ ጋላሰ ኒሰራኬ ጌቲቲዛ ባ ኤቃ ጸሳ ኬሐ ጌሊዱ አዚ
ሄን ጎይኒሺን አዛ ናይቲ አዲራሜሌኬይኔ ሳርሳሬይ አዛ ማሻን
ሲፊ ዋጁዳ፤ ሄፔ ኬሲ ኤኪዱ አራራቱ ጋካናሰ ባቃቲዳ፤ አዛ
ና አሴራዶኔይ አዛሶሆን ካዋቲዳሰ።

20

ካዎ ሂዘቂያሳ ፓጻ
(2ታሪ 32:24-26፤ አሳ 38:1-8፥21-22)

1 ሄ ዎዴ ሂዝቂያሲ ዳር ሳኬቲዲ ሸምፖ ቦላ ዲሺን አሞጾ ና ናቤ ኢሳያሲ ኢዛኮ ቢዲ፡ «ጎዳይ ኔና፡ ሳኔ ሃይቃና፤ ኔ ሃይሳፌ ጉዬ ሸምፖ፡ ፓጾ ዴኣካ፡ ሄሳ ጊሻሰ ኔሶ ጊጊሳ፡ ጌሰ» ጊዴሰ፡

2 ሂዝቂያሲካ ጌዴ ጎዳ ባጋ ሲሚዲ ጎዳኮ ዎሲሸ፡

3 «እቤት ጎዳዉ! ታኒ ኔ ሲንላን አማኔቲላን፡ ኩሜላ ዎዚናፔ ሄሜቲዳይሳኔ ኔና ኡፋይሲዛዝ ኦሊዳይሳ ታሰ ቆፓ» ጊዲ ጫሞ ዬሆ ዬኪዴሰ፡

4 ኢሳያሲ ቡር ካዎ ኬላ ዛጎ ካንሊ ቢሸን ጎዳ አቻፌ ኢዛሰ፡

5 «ኔኒ ጉዬ ሲማዳ ታ ዴሬዛ ሃላቃ ሂዝቂያሰ፡ ሳኔ ጎዳይ ኔ አዎ ዳዊቲ ጸሳይ ታ ኔ ዎሳ ሲያዲሰ፤ ኔ አፋንላካ ቤያዲሰ፤ ታኒ ኔና ፓላና፡ ሃቺፌ ዶሚን ሄሹ ጋላሳታፌ ጉዬ ኔኒ ፑዴ ጎዳ ኬላ ኬዛና፡

6 ታ ኔ ላይላ ቦላ 15 ላይላ ጉጃና፤ ኔናኔ ሃኖ ካታማዮ አሶሬ ካዎ ኩሸፔ አሻና፤ ታኒ ታ ጊሻሲኔ ታ አይሌ ዳዊቲ ጊሻሰ ጋዳ ሃኖ ሃ ካታማዮ ናገና፡ ጋ» ጊዛ ቃላይ ዪዴሰ፡

7 ሄሳፌ ጉዬ ኢሳያሲ፡ «ታሰ ባላሴ ሚላ ቲራ ኤኪ ዪቲ» ጊዴሰ፤ ሂሰቲን ኢሰቲ ቂናኢዲ ኢዛሰ ኪጸ ቦላ ዎሊን ኢዚ ፓጺዴሰ፡

8 ሂዝቂያሲ፡ «ጎዳይ ታና ፓላናይሳሲኔ ሄሹ ጋላሳፌ ጉዬ ታኒ ጎዳ ኬላ ኬዛናይሳሰ ማላታይ ኣዜ?» ጊዲ ኢሳያሳ ኦይቺዴሰ፡

9 ኢሳያሲካ ኢዛሰ ዛሪዲ፡ «ጎዳይ ባ ጊዳ ቃላ ፖላናይሳሰ ማላታይ ሃይታፔ አሳ፤ ሃይሲ ኩዋዚ 10 ኬች ሲንላ ቦ ጋይ? ዎይኮ ታሙ ኬች ጉዬ ቦ ጋይ?» ጊ ኦይቺዴሰ፡

10 ሂዝቂያሲ ኢዛሰ፡ «ኩዋይ 10 ኬች ሲንላ ቡሲ ሜቲና፤ ሄሳፌ ኩዋይ ጉዬ ሲማና ማላ ኦላ» ጊ ዮቲዴሰ፡

11 ናቤ ኢሳያሲ ሄሳፌ ጉዬ ፑዴ ጎዳሰ ዋሲዴሰ፤ ጎዳይካ አካዜይ ኦሊዳ ኬቻ ቦላ ዎዲዳ ኩዋዛ 10 ኬች ጉዬ ሲማና ማላ ኦሊዴሰ፡

ባቢሎኔፔ ኪቲቲ ዪዳ ቃሰታኔታ

(ኢሳ 39:1-8)

12 ሄ ዎዴ ባቢሎኔ ካዎ ባልዳኔ ና ማርዶኬ-ባልዳኔይ ሂዝቂያሲ ሳኬቲዳይሳ ሲዪዳ ጊሻሰ ሂዝቂያሳሰ ዳብዳቤኔ ኢሞታ ዬዲዴሰ፡

13 ሂዝቂያሲካ ቃሰታኔታ ሞኪ ኤኪዲ ባ ሚሽ ኡባ ዎሊዛ ኬላን ዲዛ ቢራ፡ ዋርቃ፡ ዲማ ቆሞ ሳዎታ፡ ኣልኦ ዛይቲ፡ ኦላ ማሳራታ ኢዛን ዎሊዛ ሚንጃ ኬላታኔ ሃራ አቲዳ ሚንጃ ኬላን

ዲዛይታ ኡባ ኢስታ ቤሲዴስ። ባ ካዎቴላ ኩላኒኔ ባ ካዎቴላን ዲዛ ሚሽ ኡባፌ ሂዝቂያሲ ቤሶንታ ኣጊዳዚ ዴና።

¹⁴ ሄሳፌ ጉዬ ኢሳያሲ ሂዝቂያሳኮ ቢዲ፡ «ሃይቲ ኣሳቲ ኣዋፔ ዪዶ? ኔስ ኣይ ዮቲዶ?» ጊ ኦይቹዴስ። ሂዝቂያሲ፡ «ሃይቲ ሃሆ ዴሬ ባቢሎኔፔ ዪዳ» ጊዴስ።

¹⁵ ናቤዚካ ኢዛ፡ «ኔ ካዎቴላ ኩላፌ ኣይ ቤይዶ?» ጊ ኦይቹዴስ፤ ሂዝቂያሲካ ኢዛስ፡ «ኢስቲ ታ ካዎቴላ ኩላን ዲዛ ሚሽ ኡባ ቤይዳ፤ ታኒ ሚሽ ኢስታን ዋሒዛ ኩላታፔ ታ ቤሶንታ ኣሺዳሶይ ሙሌካ ዴና» ጊዴስ።

¹⁶ ሄሳፌ ጉዬ ኢሳያሲ ሂዝቂያሳስ፡ «ኔኒ ጎዳ ቃላ ሲያ፤

¹⁷ ጎዳይ፡ ኒኔ ካዎቴላ ኩላን ዲዛይ ኡባይ ካሴ ኔ ኣዋቲ ሃና ጋካናስ ሺሺዳይ ኡባይካ ባቢሎኔ ዲኤቲ ባና ዋዴይ ያናይሲ ኣቴና፤ ኢሲ ሚሽካ ኣቴና» ጊሰ።

¹⁸ ኔፔ ዬሌቲዳ ኔ ናይታፔ ባጋቲ ዲኤቲዲ ባናኔ ባቢሎኔ ዴሬን ኢስቲ ካዎ ኩላን ፑንዱላታ ጊዲ ዴና» ጊዴስ።

¹⁹ ሂዝቂያሲካ፡ «ኔ ዮቲዳ ጎዳ ቃላይ ሎኦ» ጊዴስ። ኢዚ ሄሳፌ ጊዳይ፡ «ታ ፓጻ ዲዛ ዋዴ ታስ ሳፒቴሌኔ ዋፓይ ዲኮ ሄሳፌ ጉዬ ባ ዶሳ ሃና» ጊ ቆፒዳ ጊሻሳ።

²⁰ ሂዝቂያሳ ካዎቴላ ላይላታን ሃኒዳ ሃራ ሚሻቲ፡ ኢዚ ኦሒዳ ኦሶ ኡባይ፡ ሃላ ካታማ ጌልላናስ ኢዚ ዛሪሲዳ ዛሪይ ዩሁዳ ካዎታ ታሪኬ ማጻፋን ጳፌቲ ዴስ ጊዴኔ?

²¹ ሂዝቂያሲ ሃይቂዲ ባ ኣዎታን ጋይቲዴስ፤ ኢዛ ና ሚናሴይ ኢዛሶሆን ካዎቲዴስ።

21

ዩሁዳ ካዎ ሚናሴ

(2ታሪ 33:1-20)

¹ ሚናሴይ ካዎቲዛ ዋዴ ኢዛስ ላይላይ 12፤ ኢዚ ዬሩሳላሜን ኡቲዲ 55 ላይላ ሃሪዴስ፤ ኢዛ ኣያ ሃፌሴቦ ጌቲታዉስ።

² ሚናሴይ ጎዳይ ኢስራኤሌ ሲንላፌ ጎዲ ኬሲዳ ሃራሲዛ ካዎቴላታ ሎሴ ካሊዲ ጎዳ ሲንላን ኢታ ኦሶ ኦሒዴስ።

³ ካሴ ኢዛ ኣዋ ሂዝቂያሲ ዙምቡላታ ቦላ ዲዛ ኤቃ ጸሳታ ኬላ ላሊዳይሳ ዛሪ ኬጸዴስ፤ ኢስራኤሌ ካዎ ኣካቤይ ኦሶይሳላ ኢዚካ ባኣሌስ ያርሾ ያርሺዛሶ ጊግሲዴስ። ኣሼሪ ሚሰሌ ቱስ ኤሲዴስ፤ ሄሳካ ሳሎ ጸሊንቲታስካ ጎይኒዴስ።

4 ጎዳይ፥ «ታኒ ታ ሱንሳ ዩሩሳላሜን ዋላና» ጌዳ ጸሳ ኬላን ያርሾታ ያርሺዛሶሆታ ኦሊዴስ።

5 ጸሳ ኬላ ዛጎ ናሞኦታን ሳሎ ጸሊንቴታሰ ጎይናናሶሆታ ገግሲዴስ።

6 ባ ናዛ ጹጌቲዛ ያርሾ ሂሰቲ ሺሺዴስ፤ ሂሰቲዲ ሙሬኒዛይታ፥ ማርታ፥ ሞይቲሌ ሃሳይሲዛይታኔ ኢያና ካዪዛይታ ዙሬ ኦይቺዴስ፤ ጎዳ ሃንቄሊዛ ኢታ ሃኖታ ኢዛ ሲንሳን ኦሊዴስ።

7 ኢዚ ባ ማሲ ገግሲዳ ኣሽሪ ሚሰሌዛ ጸሳ ኬላ ጌደን ዋሊዴስ። ሂሰካ ጎዳይ ካሴ ዳዊቲ ና ሶሎሞኔስ፥ «ታኒ ሃይሳ ጸሳ ኬላኒኔ ኢስራኤሌ ቆሞታ ኡባታ ጋርሳፌ ዶሪዳ ዩሩሳላሜን ታ ሱንሳ ሚርናስ ሄን ዋላና።

8 ጌዲኮካ ታኒ ኢስታ ኣዛዚዳይሳ ኡባካ ኢስቲ ሚኒ ፖሌቶኔ ታ ኣይሌ ሙሴይ ካሴ ኢስታስ ኢሚዳ ዋጋዛ ኢስቲ ፖሊ ናጌቶ ኣቲን ሃይሳፌ ጌዬ ኢስራኤሌ ኣሳ ካሴ ኢስታ ኣዋታስ ኢሚዳ ቢታፌ ኢስቲ ኬዚዲ ዋዬታና ማላ ታ ኦሊኬ» ጌዳ ቃላይ ሃይሳ ሃ ሶሆዛ ገሻሳ።

9 ዴሬዚ ጌዲኮ ሄሳ ሲዪቤና፤ ካሴ ጎዳይ ጳይሲዳ ካዋቲላታፔካ ቦላራ ኢስቲ ኢታ ኦላና ማላ ሚናሴይ ኣሳ ባሌሊዴስ።

10 ጎዳይ ባ ኣይሌ ናቤታ ባጋራ ሂዝጊ ዮቲዴስ፤

11 «ዩሁዳ ካዋ ሚናሴይ ሃይሳ ሹኒዛ ኢታ ናጋራ ኦሊዴስ፤ ኢዚ ካሴ ባፔ ካሴ ዲዛ ኣሞሬ ዴሬ ኣሳፔካ ቦላራ ኢታ ኦሊዴስ። ዩሁዳ ኣሳካ ኤቃታን ባሌሊዴስ።

12 ሄሳ ገሻሰ ጎዳ ኢስራኤሌ ጸሳይ ሲዪዳዴ ሃይሳስ ኢቲዛ ሜቶ ታኒ ዩሩሳላሜ ቦላኔ ዩሁዳ ቦላ ዩዳና።

13 ታኒ ሳማሪያስ ገግሲዳ ዋቋ ዋዶር፥ ታኒ ኣካቤሶ ኢዛራ ጌናሳ ጴሊዳ ቱሞቤዛካ ዩሩሳላሜ ቦላ ዩዳና፤ ኣሲ ሳኔ ሜጪ ጉፋንሊዛ ማላ ታኒካ ዩሩሳላሜ ሜጪ ጳይሳና።

14 ጫሻ ኣቲዳ ታ ጸንጾታ ታኒ ኣጋና፤ ታኒ ኢስታ ኢስታ ሞርኬታስ ኣሳ ኢማና፤ ኢስቲ ባ ሞርኬታስ ዲኦ ሚሽ ጌዳና።

15 ታኒ ሄሳሶ ኦሊዛ ጋሶይካ ኢስቲ ካሴ ባ ኣዋቲ ጊብጾፔ ኬዞሶፌ ሃኖ ጋካናስ ኢስቲ ታ ሲንሳን ኢታ ኦሶ ኦሊዲ ታና ሃንቆስ ዴንፊሊዳ ገሻሳ» ጌዴስ።

16 ሃራፔካ ሚናሴይ ዩሁዳ ኣሳይ ጸሳ ሲንሳን ኢታ ኦላና ማላ ኢስቲ ናጋራ ኦሲሲዳ ናጋራፔ ሃራካ ዩሩሳላሜስ ሃ ጋጾፔ ሄ ጋጾ ጋካናስ ጸሎ ጌዲዳ ዳሮ ኣሳ ሱሐ ጉሲዴስ።

17 ሚናሴ ካዎቱላ ዋዴ ሃኒዳ ሃራ ሚሽ ባ ኦሊዳ ናጋራ ቦላ ጉጂዲ ኢዚ ኦሊዳይ ኡባይ ዩሁዳ ካዎታ ታሪኬ ማጻፋን ጸፊቲ ዴሰ ጊዴኔ?

18 ሚናሴይ ካሴ ባ ኣዎታ ማላ ሃይቂዴሰ፤ ኢዚ ኦዛ ኣታኪልቲ ጊዶን ዲዛ ዱፎን ሞጌቲዴሰ፤ ኢዛ ናዚ ኣሞኔይካ ኢዛሶሆን ካዎቲዴሰ።

የሁዳ ካዎ ኣሞኔ
(2ታሪ 33:21-25)

19 ኣሞኔይ ካዎቲሺን ኢዛሰ ላይላይ 22፤ ኢዚ ዬሩሳላሚን ኡቲዲ 2 ላይላ ሃሪዴሰ። ኢዛ ኣያ ሚሶላሞ ጌቲታዉሰ፤ ኢዛ ያጸባ ዴሬ ኣሰ ሃሩሴ ና።

20 ኢዛ ኣዎ ሚናሴይ ኦላይሳሶ ኢዚካ ጎዳ ሲንላን ኢታ ሚሽ ኦሊዴሰ።

21 ካሴ ባ ኣዎይ ቢዳ ኦጌዛራ ኢዚካ ቢዴሰ፤ ካሴ ባ ኣዎይ ጎይኒዳ ኤቃ ጸሳታሰ ጎይኒዴሲኔ ኢሰታሰ ሆኪ ጉልባቲዴሰ።

22 ካሴ ባ ጎዳ ጸሳ ኣጋጊዴሰ፤ ኢዚ ጎዳ ኦጌን ቢቤና።

23 ኣሞኔ ዴሬ ሹሜቲ ማካሊዳ፤ ካዎዛካ ካዎቱላ ኬላ ጊዶን ዋጲዴ።

24 ሂሳፌ ጉዬ ሄ ዴሬ ኣሳይ ካዎ ኣሞኔ ቦላ ዴንዲዲ ኢዛ ዋጲዴሰ፤ ኢዛ ናዛ ኢዮሲያሳካ ኢዛሶሆን ካዎሊዳ።

25 ኣሞኔይ ካዎቲ ዲዛ ዋዴ ሃኒዳ ሃራ ኦሶይ ኢዚ ፖሊዳይ ኡባይካ ዩሁዳ ካዎታ ታሪኬ ማጻፋታን ጸፊቲ ዴሰ ጊዴኔ?

26 ኢዚ ኦዛ ኣታኪልቲ ጊዶን ዲዛ ዱፎን ሞጌቲዴሰ፤ ኢዛ ናዚ ኢዮሲያሲ ኢዛሶሆን ካዎቲዴሰ።

22

የሁዳ ካዎ ኢዮሲያሳ
(2ታሪ 34:1-2)

1 ኢዮሲያሲ ካዎቲዛ ዋዴ ኢዛሰ ላይላይ 8። ኢዚ ዬሩሳላሚን ኡቲዲ 31 ላይላ ሃሪዴሰ፤ ኢዛ ኣያ ሰጺቃቲ፣ ዴሬ ኣሰ ኣዳያ ና ዩዲዲ ጌቲታዉሰ።

2 ኢዮሲያሲ ጎዳ ሲንላን ሎኦ ኦሊዴሰ፤ ካሴ ኢዛ ኣዎ ዳዊቲ ቢዳ ኦጌራ ቢዴሰ፤ ሃዲርሲካ ኡሻቺካ ጊቤና።

3 ኢዚ ካዎቲዳ ታማኔ ኦሰፑንላ ላይላን ኢዮሲያሲ ማሹላሚ ናዛ ና ኣጸሊያ ናዛ ጸፊዛ ሳፋኔ ጎዳ ኬላ ከቲዲ።

4 «ኔኒ ቄሴታ ሃላቃ ኪልቂያሳኮ ባ፤ ባዳ ፔንጌ ናጊዛይቲ ዴራፔ ጎዳ ኬላሰ ሺሺዲ ጌልሊዳ ሚሻይ ኣይ ኬናኮ ኪልቂያሲ ቆዳና ማላ ኦላ።

5 ሄሲካ ጎዳ ኬላ ኦሶዛ ካሊ ኦሲሳና ማላ ሹሜቲዳ ኣሳታሰ ኢሜቶ፤ ኢሰቲካ ጎዳ ኬላ ኦራሊዛ ኦሳንቻታሰ ኢሜቶ።

6 ኢሰቲ ሚሻ ኣናጼታሰ፤ ጊምቤ ጊምቤዛይታሲኔ ሹቶ ማሲዛይታሰ ቃንጾቶ። ሄሲካ ጸሳ ኬላ ኢዛራ ኦራዲሳና ሳንቃታኔ ማሴቲዳ ሹቻታካ ሻሚቶ።

7 ኣሳቲ ኣማኔቲዳይታ ጊዲዳ ጊሻሰ ኢሰታሰ ኢሜቲዳ ሚሻ ካላናሰ ኮሼና» ጊዴሰ።

8 ቄሴታ ሃላቃ ኪልቂያሲ ጸፌ ሳፋኔሰ፤ «ታኒ ዎጋ ማጻፋ ጎዳ ኬላ ጊዶን ዴማዲሰ» ጊዲ ኢዛሰ ኢሚዴሰ፤ ኢዚካ ማጻፋዛ ኤኪዲ ናባቢዴሰ።

9 ሄሳፌ ጉዬ ጸፌዚ ሳፋኔይ ካዎዛኮ ቢዲ፤ «ኔ ሹሜቲ ጎዳ ኬላ ጊዶን ዲዛ ሚሻዛ ኬሲዲ ጎዳ ኬላ ናጌቲ ኬጸሲዛ ኣሳታሰ ኢሚዳ» ጊዴሰ።

10 ሄሳፌ ጉዬ ጸፌዚ ሳፋኔይ ካዎዛሰ፤ «ቄሴታ ሃላቃ ኪልቂያሲ ታሰ ማጻፋ ኢሚዴሰ» ጊ ዮቲዴሰ። ሳፋኔይካ ሄ ማጻፋዛፔ ካዎዛሰ ናባቢዴሰ።

11 ካዎዚካ ዎጋ ማጻፋዛ ቃላ ሲዬዲ ባ ማይኦ ዳኪዴሰ።

12 ሄሳፌ ጉዬ ቄሴ ሃላቃ ኪልቂያሳ፤ ሳፋኔ ና ኣኪቃሜ፤ ሚካያ ና ኣኪቦሬ፤ ጸፌ ሳፋኔኔ ካዎዛሰ ማታ ኦሳንቻ ኣሳያ፤

13 «ኢንቴ ቢዲ ታ ጊሻሰ፤ ዴራ ጊሻሲኔ ዩሁዳ ኣሳ ጊሻሰ ሃይሳ ማጻፋን ጸፌቲዳይሲ ኣይ ጊዛኮ ጎዳ ኦይቺቲ፤ ጋሶይካ ኦ ኣዋቲ ሃይሳ ማጻፋዛ ቃላሰ ኣዛዜቶንታ ኢጲዳ ጊሻሰ፤ ኦ ጊሻሰ ኢዛን ጸፌቲዳይሳ ኡባካ ኢሰቲ ፖሎንታ ኣጊዳ ጊሻሰ ሃኢ ኦ ቦላ ጎዳ ሃንቆይ ዎልቃማ» ጊ ኣዛዚዴሰ።

14 ቄሴ ኪልቂያሲ፤ ኣኪቃሜይ፤ ኣኪቦሬይ፤ ሳፋኔይኔ ኣሳያይ ናቤ ሁልዳና ኦይቻና ቢዳ፤ ሁልዳና ሃራሴ ናዛ ቴቁዌ ና ማይኦ ናጊዛ ሻሎሜ ማቻ፤ ኢዛ ዬሩሳላሜ ጊዶን ናምኣንሉ ጉታን ዳጪሰ።

15 ናቤያካ፤ «ጎዳ ኢሰራኤሌ ጸሳይ ኢንቴና ታኮ ኪቲዳ ኣዴዛሰ፤

16 ሳዳይ ዩሁዳ ካዎዚ ናባቢዳ ማጻፋን ጸፌቲዳ ባሻ ኡባ ታኒ ሃይሳ ሃ ሶሆዛ ቦላኔ ዴራ ቦላ ኤሃና።

17 አሳይ ታና አጊዲ ሃራ ኤቃ ጸሳታስ ኤጻኔ ጨዋሲዳ ገሻሰ፤ ኢስቲ ባ ኩሼን ኦሊዳ ኤቃ ጸሳታን ታና ሃንቄሊዳ ገሻሰ ታ ሃንቆይ ሃይሳ ሃ ሶሆዛን ታማ ማላ ኤጲሼ ዴኣና ኣቲን ቶኤና ጌሰ ገዲ ዮቲቲ።

18 ጎዳ ኦይቻናስ ኢንቴና ሃ ኪቲ ዩዲዳ ዩሁዳ ካዎዛስ ሃይሳፊ ካሊዛይሳ ዮቲቲ፤ ሳኒ ሲዱዳ ዮኦዛ ገሻሰ ጎዳ ኢሰራኤሌ ጸሳይ።

19 ኢስቲ ቃንጌታናይሳኔ ቆያናይሳ ታኒ ሃይሳ ሃ ሶሆዛ ቦላኔ ዴሬዛ ቦላ ካሴ ዮቲዳይሳ ኔኒ ሲያዳ ኔ ዎዚናይ ሜቂን ኔናቴላ ጎዳ ሲንላን ካዉሻዳኔ ኔ ማይኦካ ዳካዳ ታ ሲንላን ኔ ዩኪዳ ገሻሰ ጎዳይ ኔና ሲያዲሰ።

20 ሄሳ ገሻሰ ታኒ ኔና ኔ ኣዋታን ጋላና፤ ኔኒ ሳሮን ዱፎን ጌላና፤ ታኒ ሃይሳ ሃ ዴራ ቦላ ኤሃና ሜቶዛ ኔ ኣይፊይ ቤኤና ጌሰ ገ ዮቲቲ» ጋዲሰ።

ሄ ቢዳ ቃስታኔቲ ዛርዛ ካዎዛስ ኤኪ ቢዳ።

23

ጫቆ ቃላ ኦራሶ

(2ታሪ 34:3-7፡29-33)

1 ሄሳፊ ጉዬ ካዎዚ ዩሁዳኒኔ ዩራሳላሜን ዲዛ ጨማ ኣስ ኡባ ጸይጊዴሰ፤

2 ዩሁዳ ኣሳይኔ ዩራሳላሜን ዲዛ ኣሳይ ኡባይ ቄሴቲኔ ናቤቲ ኡባፊ ናፔ ጨማ ጋካናስ ኡባ ጎዳ ኬላ ኤኪ ዩዴሰ፤ ጎዳ ኬላፊ ቤቲዳ ጫቆ ቃላ ማጻፋ ኢስቲ ባንታ ሃይላን ሲያና ማላ ኡባ ናባቢዴሰ።

3 ካዎዚ ዎርቃ ቱሳ ኣቻን ጎዳ ሲንላን ኤቂዲ ጎዳ ካላናስ ኢዛ ኣዛዘታ፡ ማራታኔ ዎጋታ ባ ኩሜላ ዎዚናፔ ኩሜላ ሽምፖፊ ናጋናስ ሃይሳ ማጻፋዛን ጸፊቲዳ ጫቆዛ ሚንላናስ ጎዳ ሲንላን ኦራዲሲዴሰ። ሄሳፊ ጉዬ ዴሬዚ ኡባይካ ጫቆ ቃላዛስ ባንታ ኣማኔቴላ ቆንጨሲዳ።

4 ካዎዚ ባኣሌስ፡ ኣሽርሲኔ ሳሎ ጸሊንቴታስ ኡባስ ኦሴቲዳ ሚሻታ ጎዳ ኬላፊ ኬሳና ማላ ቄሴታ ሃላቃ ኪልቂያሳስ፡ ኢዛፔ ካሊ ናምኣንሶ ማራን ዲዛ ቄሴታኔ ጸሳ ኬላ ፔንጌ ናጊዛ ዛቤታ ኣዛዚዴሰ። ሄ ሚሻታካ ዩራሳላሜፔ ካሬ ኬሲዲ ዱጌ ቄዲሮኔ ሾባን ዲዛ ዴምባን ጽጊዴሰ፤ ቢዲንላካ ቤቴሌ ኤፊዴሰ።

5 ዩሁዳ ካታማታኒኔ ዩራሳላሜ ዩሾን ዲዛ ዙምቡላታ ቦላ ኤጻኔ ጨዋሳና ማላ ካሴ ዩሁዳ ካዎቲ ኤቃ ጸሳታስ

ሹሚዳ ቄሴታካ ጎዲዳስ፤ ሄሳቶካ ባኣሌስ፤ ኣዋ ኣርሼስ፤ ኣገናስ፤ ኡጩቲ ዲዛ ጸሊንቴታሲኔ ሳሎ ጸሊንቴ ኡባስ ኤጸኔ ጩዋሲዛይታ ዲጊዳስ።

⁶ ኣሼሪ ሚሰሌ ጎዳ ኬላፌ ኬሲዲ ዬሩሳላሚፔ ካሬራ ዲዛ ጌዴ ቄዲሮኔ ሾባ ኤፊዲ ሄን ጸጊዳስ፤ ጋጪ ሊቂሲዲ ዴራ ዱፎን ላሊዳስ።

⁷ ጎዳ ኬላ ጊዶን ጎይኖ ዋጋ ኦሊዲ ኣዳይ ኣዴራ ፓራቲዛ ኪፊሌታኔ ማጫሳቲ ኣሼርሲ ማይኦስ ሱቂዛ ኪፊሌታ ላሊዳስ።

⁸ ኢዮሲያሲ ቄሴታ ኡባ ዩሁዳ ካታማ ጋርሳፌ ዬሩሳላሚ ኬሲዳስ። ጌባፔ ደሚዲ ቤርሳቤሄ ጋካናስ ቄሴቲ ኢስታ ቦላ ኤጸኔ ጩዋሲዛ ዙዋቡላታ ቱኒሲዳስ። ካታማይስ ሃዲርሳ ባጋራ ዲዛ ካታማኖ ሃሪዛ ኢያሶ ፔንጌ ኣቻራ ዲዛ ፔንጌታን ጎይኒዛሶሆታ ላሊዳስ።

⁹ ዙዋቡላታ ቦላ ጎይኒዛሶታ ዬሩሳላሚን ጎዳስ ያርሾሶሆታ ሃጋዘንታ ኣጊኮካ ቄሴ ጊዲዳ ባ ኣሻታራ ኢርሾይ ቦቾንታ ኡኬላ ሜቲስ።

¹⁰ ሄኖሚ ና ሾባን ዲዛ ቶፊቴ ጌቲቲዛ ጎይኒዛሶሆዛ ቱኒሲዳስ፤ ኣይ ኣሲካ ኣቱማ ና ጊዲን ዋይኮ ማጫ ና ሞሎኬስ ታማን ጸጊ ያርሾንታ ማላሳ።

¹¹ ዩሁዳ ካዋቲ ጎዳ ኬላ ጌሊዛ ሶሆን ኣዋ ኣርሼስ ጎይናናስ ኢሚዳ ፓራታ ሄፔ ዲጊዳስ። ሄይቲካ ናታን-ሜሌኬ ጌቲቲዛ ኢሲ ሹሚዛ ኬላ ማታን ዲዛ ዱቡሻን ዴቲስ። ኢዮሲያሲካ ኣዋ ኣርሼስ ጎይናና ማላ ኢሜቲዳ ፓራ-ጋሬታ ታማን ጸጊዳስ።

¹² ዩሁዳ ካዋቲ ፑዴ ኣካዜ ኢልፒኔ ኣቻን ፖቄ ቦላ ኦሊዳ ያርሾሶሆታ፡ ሚናሴይ ጎዳ ኬላ ዛጎ ናሞኣታን ኦሲሲዳ ያርሾሶሆታ ዲጊዳስ፤ ቲንቼሬላ ዩጊዳስ፤ ሄ ቲንቼላካ ዴንላ ኤፊዲ ቄዲሮኔ ሾባን ዩጊዳስ።

¹³ ሄሳቶካ ዬሩሳላሚፔ ኣርሼይ ሞኪዛ ባጋራ ቱናቲላ ዙማፔ ዲጌሃ ባጋን ኢሰራኤሌ ካዋ ሶሎሞኔይ ሲዶናታ ቱናቲላ ጸስ ኣስታሮቲስ፡ ሞኣቤታ ቱናቲላ ጸስ ካሞሼስ፡ ኣሞኔታ ቱናቲላ ጸስ ሞሎኬስ ዙዋቡላታ ቦላ ኦሲሲዳ ጎይኒዛሶሆታ ካዋዚ ቱኒሲዳስ።

¹⁴ ሃኢካ ኢዮሲያሲ ኣሳይ ኢስታስ ጎይኒዛ ሹቻ ሃወልቲታ ሜንሌሬላ ዩጊዳስ፤ ኣሼሪ ሚሰሌ ቱሳታካ ቃንጾሬላ ዩጊዳስ፤ ሄ ሶሆታካ ኣሳ ሜቄላ ኩንላዳስ።

15 ኢስራኤል አሳ ናጋራ ኦሲሲዳ ናባጼ ና ኢዮርባኣሜይ ኦሊዳ ያርሾሶሆዛ፤ ቤቴሌን ዙምቡላ ቦላ ጎይኒዛሶሆዛ፤ ያርሾ ያርሺዛሶሆዛ ኢዛ ቦላ ዲዛ ዙምቡላ ሄሳፉካ ላሊዳስ፤ ሹቻታካ ሜንፊሬሊ ዩጊዳስ፤ ጳሌ ማላካ ሊቂሲዳስ፤ ኣሼሪ ሚስሌ ቱሳካ ጹጊዳስ።

16 ኢዮሲያሲ ዩሺ ጸሊዛ ዎዴ ዙምቡላ ቦላ ዲዛ ዲፎታ ቤኢዳስ፤ ሜቄሳታ ዲፎታፔ ኬሲዲ ጸሳ ኣሲ ካሴ ዮቲዳ ማላ ጎዳ ቃላይ ፖሌታና ማላ ያርሾ ያርሺዛሶሆዛ ቱኒሳናሰ ኢዛ ቦላ ጹጊዳስ።

17 ካዎዚካ፡ «ሴኪ ዲፎ ቦላ ታ ቤኢዛ ሃወልቴዚ ኦና ሃወልቴ?» ጊ ኦይቹዳስ። ሄ ካታማይን ዲዛ አሳይ፡ «ዩሁዳፔ ዩዲ ሃኢ ኔ ኦሊዳይሲ ኡባይ ቤቴሌን ያርሾ ያርሺዛሶሆዛ ቦላ ጋካናይሳ ዮቲዳ ጸሳ አሳ ዲፎ» ጊዳ።

18 ኢዮሲያሲካ፡ «ኣኔ ሄሳ ቦቾፍቴ፤ ሄ ኣዴዛ ሜቄሳ ኢዚ ዲዛሶሆፔ ኦኒካ ቃላፎ» ጊዳስ። ሄሳ ጊሻሰ ኢዛ ሜቄሳኔ ሳማሪያፔ ዩዳ ናቤዛ ሜቄሳ ካሴ ዲዛ ማላ ቦቾንታ ኣጋጊዳ።

19 ኢዮሲያሲ ቤቴሌን ኦሊዳ ማላ ሳማሪያ ካታማን ዙምቡላታ ቦላ ኢስራኤል ካዎቲ ካሴ ኦሲሲዳይታኔ ጎዳ ሃንቄሊዳ ኤቃ ጸሳ ኬሳታ ኡባ ጳይሲዳሲኔ ቱኒሲዳስ።

20 ኢዮሲያሲ ሄይታ ዙምቡላታ ቦላ ጎይኒዛሶሆታን ኦሊዛ ቄሴታ ኡባ ያርሾ ያርሺዛሶሆታ ቦላ ሹኪዳስ፤ ሄ ያርሾሶሆታ ቦላካ አሳ ሜቄሳ ጹጊዳስ፤ ሄሳፌ ጉዬ ዬሩሳላሜ ሲሚዳስ።

21 ካዎዚ ኩሜሳ ዴራስ፡ «ሃይሳ ኢዛ ጫቆ ማጻፋን ጸፊቲዳ ማላ ጎዳ ኢንቴ ጸሳ ፓዚጋ ባኣሌ ቦንቹቲ» ጊዲ ኣዛዚዳስ።

22 ካሴ ኢስራኤል ካሌሊዳ ዳናታ ዎዴፔ ዶሚዲ ኢስራኤል ካዎታኔ ዩሁዳ ካዎታ ዎዴ ኡባን ሄሳ ማላ ፓዚጋ ባኣሌይ ቦንቹቲ ኤሬና።

23 ኢዮሲያሲ ካዎቲዲ ታማን ኦሰፑንፋ ላይላን ሃይሲ ሃ ፓዚጋዚ ዬሩሳላሜን ጎዳሰ ቦንቹቲዳስ።

24 ሄሳፌ ቦላራ ኢዮሲያሲ ሞይቲሌ ሃሳይሲዛይታ፡ ኣያናታ ጸይጊዛይታ፡ ኣሲ ባ ሁኤን ሁኤን ጎይኒዛ ጸሳታ፡ ኤቃ ጸሳታ፡ ዩሁዳኒኔ ዬሩሳላሜን ቤቲዳ ሃራ ሻቲዛ ሚሽ ኡባ ጳይሲዳስ፤ ኢዚ ሄሳፉ ኦሊዳይካ ቄሴ ኪልቄያሲ ጎዳ ኬላ ጊዶፌ ዶሚዳ ማጻፋን ጸፊቲ ዲዛ ዎጋይ ፖሌታና ማላሳ።

25 ካሴ ሙሴ ወጋን ጸፊቲዳ ማላ ባ ኩሜላ ወዚና፤ ባ ኩሜላ ሽምገሬ፤ ባ ኩሜላ ወልቃፊ ጎዳኮ ሲሚዳ ኢየሱያሳ ማላ ካዎይ ኢዛፔ ሲንላን ጊዲን ወይኮ ኢዛፔ ጉዬን ሙሉካ ዴንዲቤና።

26 ጊዶ ኣቲን ሃይሲ ኡባይ ሃኒንካ ሚናሴይ ጎዳ ሃንቄላናስ ኦሊዳ ኢታ ኦሶ ኡባ ጋሶን ጎዳይ ዩሁዳ ቦላ ሃንቄቲዳ ታማ ማላ ባቢሲዛ ሃንቆዛፔ ኢርጺቤና።

27 ሄሳ ጊሻሰ ጎዳይ፤ «ታኒ ኢሰራኤሌ ታ ሲንላፊ ዲጎይሳሶ ዩሁዳካ ታ ሲንላፊ ዲጋና፤ ታኒ ዶሪዳ ዩሩሳላሜ ካታማዮ፤ ታ ሱንሊ ሄን ዴኣና፤ ጋዳ ታኒ ካሴ ዮቲዳ ጸሳ ኬሊዮ ታ ዬጋ ኣጋና» ጊዴሰ።

28 ኢየሱያሳ ካዎቲላ ላይላን ኦሴቲዳ ኦሶቲ፤ ሃኒዳ ሃኖቲኔ ኦሴቲዳ ሃራ ኦሶቲ ኡባይ ዩሁዳ ካዎታ ታሪኬ ማጻፋን ጸፊቲ ዴሰ ጊዴኔ?

29 ኢየሱያሲ ካዎቲላን ዲዛ ወዴ ጊብጼ ካዎ ፋርን-ኒካይ ኣሶሬ ካዎ ማዳናስ ጌዴ ኤፊራዲሴ ሻፋ ቢዴሰ፤ ካዎ ኢየሱያሲካ ኢዛራ ኦሌታናስ ኬዚዴሰ፤ ጊዶ ኣቲን ፋርን-ኒካይ ኢዛራ ቲራን ጋይቲዲ ኢዛ ማጊዶን ወዲዴሰ።

30 ኢየሱያሳ ኦሳንቻቲ ኢዛ ኣሃዛ ማጊዶፊ ፓራ-ጋሬን ዩሩሳላሜ ኤኪ ኤሂዲ ኢዛ ዱፎን ሞጊዳ። ኢዛ ዴሬ ኣሳይ ኢየሱያሳ ና ኢዮኣካዜ ኤፊዴሰ፤ ቲይዲ ኢዛ ኣዎ ሶሆን ኢዛ ካዎሊዳ።

የሁዳ ካዎ ኢዮኣካዜ

(2ታሪ 36:2-4)

31 ኢዮኣካዚ ካዎቲዛ ወዴ ኢዛሰ ላይላይ 23፤ ኢዚ ዩሩሳላሜን ኡቲዲ 3 ኣገና ሃሪዴሰ፤ ኢዛ ኣያ ኣምጸሎ ጌቲታዉሰ። ኢዛ ሊቢና ዴሬ ኣሰ ኤርማሳ ና።

32 ካሴ ኢዛ ኣዎቲ ኦሶይሳሶ ኢዚካ ጎዳ ሲንላን ኢታ ሚሽ ኦሊዴሰ።

33 ኢዚ ዩሩሳላሜን ኡቲዲ ካዎቶንታ ማላ ፋርን-ኒካይ ሃማቲ ዴሬን ኤሬቢላ ጌቲቲዛሶን ኢዛ ሳንሳላታን ቃቺዴሰ። ዩሁዳ ቦላ 3,400 ኪሎ ቢራኔ 34 ኪሎ ወርቃ ጊራ ዩጊዴሰ።

34 ካዎ ፋርን-ኒካይ ኢየሱያሳ ና ኤልያቄሜ ኢዛ ኣዎ ሶሆን ካዎሊዴሰ፤ ኢዛ ሱንላካ ላሚዲ ኢዮኣቄሜ ጊ ሱንሊዴሰ። ጊዶ ኣቲን ኢዮኣካዜ ዲኢ ጊብጼ ኤፊዴሰ፤ ሂሰቲን ኢዚ ሄን ሃይቂዴሰ።

³⁵ ኢዮአቄሜይካ ፓርን-ኒካይ ኢዛ ኦይቺዳ ቢራኔ ዋርቃ ኢዛስ ቃንጺዴስ፤ ኢዚ ሄሳ ኦላናስ ቢታ ቦላ ጊራ ዩጊዴስ፤ ሄ ዴሬ ኣሳይ ባ ዋልቃ ዋልቃ ማላ ቢራኔ ዋርቃ ጊራና ማላ ኦሊዴስ።

የሁዳ ካዎ ኢዮአቄሜ
(2ታሪ 36:5-8)

³⁶ ኢዮአቄሜይ ካዎቲዛ ዋዴ ኢዛስ ላይላይ 25፤ ኢዚ ዩሩሳላሜን ኡቲዲ 11 ላይላ ሃሪዴስ። ኢዛ ኣያ ዜቢዶ ጌቲታዉስ፤ ኢዛ ኡሩሜ ዴሬ ኣስ ፓዳያ ና።

³⁷ ኢዮአቄሜይ ካሴ ኢዛ ኣዋቲ ኦሊዳ ማላ ጎዳ ሲንላን ኢታ ሚሽ ኦሊዴስ።

24

¹ ኢዮአቄሜይ ካዎቲዛ ዋዴ ባቢሎኔ ካዎ ናቡካዳናጾሬይ የሁዳ ቦላ ዋራጂዴስ፤ ኢዮአቄሜይካ ኢዛስ 3 ላይላ ጊሪዴስ። ሄሳፌ ጉዬ ኢዚ ባ ቆፋ ላሚዲ ናቡካዳናጾሬ ቦላ ማካሊዴስ።

² ጎዳይ ባቢሎኔ፤ ኣራሜ፤ ሞኣቤ፤ ኣሞኔ፤ ፓንጋታ ኢዮአቄሜ ቦላ ዩዲዴስ። ጎዳይ ባ ኦሳንቻታ ናቤታ ባጋራ ካሴ ዮቲዳ ቃላ ማላ ኢስቲ የሁዳ ቆይሳና ማላ ሃይታ ዩዲዴስ።

³ ኢዚ ኢስታ ባ ሲንላፌ ሃሳና ማላ ሃይቲ ሃ ዮኦቲ ኡባይ ጎዳይ ኣዛዚዳ ማላ የሁዳ ቦላ ፖሌታና ዳንዳይዳ፤ ሄሲካ ሚናሴይ ኦሊዳ ናጋራ ጊሻሲኔ ኢዚ ፖሊዳ ሃኖ ኡባ ጊሻሳ፤

⁴ ቃሴካ ኢዚ ጸሎ ሱላ ጉሲዳ ጊሻሳ። ዩሩሳላሜይካ ጸሎ ሱላን ኩማና ማላ ኢዚ ኦሊዳ ጊሻሰ ጎዳይ ኢዛ ማራናስ ኮዪቤና።

⁵ ኢዮአቄሜ ካዎቲላ ላይላን ሃኒዳ ሃኖቲኔ ኦሴቲዳ ሃራ ኦሶቲ ኡባይ የሁዳ ካዎታ ታሪኬ ማጻፋን ጳፌቲ ዴስ ጊዴኔ?

⁶ ኢዮአቄሜይካ ሃይቂዲ ባ ኣዋታን ጋይቲዴስ፤ ኢዛ ና ኢዮኣኪኔይ ኢዛሰሆን ካዎቲዴስ።

⁷ ባቢሎኔ ካዎይ ሃሊ ባይንዳ ጊብጼ ሻፋታ፤ ቢዲ ኤፊራጺሴ ሻፋ ጋካናስ ኢዚ ሃሪዛ ዴሬታ ኡባ ኢዛ ኩሼ፤ ዋሊ ኤኪዳ ጊሻሰ ጊብጼ ካዎዚ ባ ዴሬ፤ ዛሪ ኦላ ኦሊታናስ ኬዚቤና።

የሁዳ ካዎ ኢዮኣኪኔ
(2ታሪ 36:9-10)

8 ኢዮአከኔይ ካዎቲዛ ዎዴ ኢዛሰ ላይላይ 18፤ ኢዚ ዩሩሳላሜን ኡቲዲ 3 አገና ሃሪዴሰ፤ ኢዛ እያ ኔሂሺቶ ጌቲታዉሰ፤ ኢዛ ዩሩሳላሜ እሰ ኤልናታኔ ና።

9 ካሴ ኢዛ አዋይ ኦሶይሳሶካ ኢዮአከኔይ ጎዳ ሲንላን ኢታ ኦሶ ኦሊዴሰ።

10 ሄ ዎዴ ባቢሎኔ ካዎ ናቡካዳናጾሬ ኦላ ጋዳዋቲ ዩሩሳላሜ ዪዲ ካታማዮ ጊዶሊዳ።

11 ኦላ ጋዳዋቲ ካታማዮ ጊዶሊዛ ዎዴ ናቡካዳናጾሬይ ባ ሁኤራ ሄ ካታማዮ ዪዴሰ።

12 ዩሁዳ ካዎ ኢዮአከኔ እያ፤ ኢዛ አዛባቲ፤ ዳናቲኔ ሹሜቲ ኡባይ ባንታ ኩሼ ባቢሎኔ ካዎሰ አሚዳ፤ ባቢሎኔ ካዎይ ካዎቲዳ ኦሰፑንላ ላይላን ኢዮአከኔ ዲኢ ኤኪ ቢዴሰ።

13 ጎዳይ ካሴቲ ዮቲዳ ማላ ናቡካዳናጾሬይ ጾሳ ኬላኒኔ ካዎ ኬላን ዲዛ አቆታ ኡባ ዴንሊ ኤፊዴሰ። ኢሰራኤሌ ካዎ ሶሎሞኔይ ጎዳ ኬላሰ ዎርቃፊ ኦሲሲዳ ሚሽ ኡባ ኤኪ ቢዴሰ።

14 ቃሴካ ዩሩሳላሜ አሳ ኡባ፤ ኦላ ጋዳዋታኔ ኦላንቻታ ኡባ፤ ሂላንቻታኔ ዎጋጨታ ኡባ ኢሲ ቦላ 10,000 አሰ ዲኢ ኤኪ ባ ዴሬ ኤፊዴሰ፤ ሄን ዴሬዛን አቲዳይቲ ፑላ ማንቆታ ጸላ።

15 ናቡካዳናጾሬይ ኢዮአከኔ ዲኢ ኤኪዲ ባቢሎኔ ኤፊዴሰ፤ ሄሳሶካ ካዎዛ አዬዮ፤ ኢዛ ማቹታ፤ ኢዛ ሹሜታኔ ዴሬን ኤሬቲዳ ጌታ አሳታ ዩሩሳላሜ፤ ባቢሎኔ ኤፊዴሰ።

16 ቃሴካ ባቢሎኔ ካዎይ ሚኖኔ ኦላሰ ጋኪዳ 7,000 ኦላንቻታ፤ 1,000 ሂላንቻታኔ ዎጋጨታ ኢሲ ቦላ ዲኢ ኤኪዲ ባቢሎኔ ኤፊዴሰ።

17 ሄሳፌ ጉዬ ኢዮአከኔ አዋ ኢሻ ማታኒያ ኢዛሶሆን ካዎሊዴሰ፤ ኢዛ ሱንላ ላሚዲ ሴዴቂያሳ ጌ ሱንሊዴሰ።

ዩሁዳ ካዎ ሴዴቂያሳ

(2ታሪ 36:11-12፤ ኤር 52:1-3)

18 ሴዴቂያሲ ካዎቲዛ ዎዴ ኢዛሰ ላይላይ 21፤ ኢዚ ዩሩሳላሜን ኡቲዲ 11 ላይላ ሃሪዴሰ፤ ኢዛ እያ አምጸሎ ጌቲታዉሰ፤ ኢዛ ሊቢና እሰ ኤርማሳ ቢዮ።

19 ኢዮአቄሜይ ኦሊዳ ማላ ኢዚካ ጎዳ ሲንላን ኢታ ሚሽ ኦሊዴሰ።

20 ሃይሲ ኡባይ ዩሩሳላሜ ቦላኔ ዩሁዳ ቦላ ጋካናስ ዳንዳይዳይ ጎዳ ሃንቆ ጋሶና፤ ወርሴላን ኢዚ ኢስታ ባ ሲንሳፌ ሃሲዴስ።

ሴዴቂያሲ ባቢሎኔ ካዎ ቦላ ማካሊዴስ።

25

ዩሩሳላሜ ኩንዴል

(2ታሪ 36:13-21፤ ኤር 52:3-11)

1 ዩሁዳ ካዎ ሴዴቂያሲ ካዎቲዳ ኡዱፋንላ ላይላን ታማንላ አገናን ታማንላ ጋላስ ባቢሎኔ ካዎ ናቡካዳናጾሬይ ባ ኦላንቻታ ኡባ ኤኪዲ ዩሩሳላሜ ቦላ ዎራጂዴስ፤ ካታማይ ገምቤፌ ካሬ ባጋራ ዩዩ እጂ ጊዶሊ ኡቲዳ።

2 ካታማያካ ሴዴቂያሲ ካዎቲ ዲዛ ታማኔ ኢሲንላ ላይል ጋካናስ ሄሳላ ጊዶልታ ኡታዲስ።

3 ኦይዳንላ አገናን ኡዱፋንላ ጋላስ ካታማይ ጊዶን ዴንዲዳ ኮሻይ ዳሮ ሚኒዳ ገሻስ አሳስ ዶናን ባጂዛዚ ጳይዴስ።

4 ባቢሎኔ ኦላንቻቲ ካታማዮ ጊዶሊ ኡቲዳ ኢሲ ባጋራ ካታማይ ገምቤ ሜንሊ ጌሊዳ፤ ዩሁዳ ኦላንቻቲ ኡባይካ ካዎ አታኪልቲ አቻን ዲዛ ናምኡ ገምቤታ ጊዶራ ዲዛ ፔንጌዛራ ካንሊዲ ኦማርሳራ ዱጌ ዮርዳኖሴ ሾባ ጋካናስ ባቃቲዳ።

5 ጊዶ አቲን ባቢሎኔ ኦላንቻቲ ካዎዛ ካሌቲዲ ኢያርኮ ዴምባን ጋኪዳ። ኦላንቻቲ ኡባይ ካዎዛ አጋጊ ላሌቲዳ።

6 ካዎዚካ ሄን ኦይኬቲዴስ፤ ሄ ዎዴ ኢዛ ኤሬቢላን ዲዛ ባቢሎኔ ካዎዛኮ ኤሂዳ፤ ኢዛ ቦላ ፒርዳይ ፒርዴቲዴስ።

7 ሴዴቂያሲ ባ አይፌን ቤኢሺን ኢዛ ናይታ ዎጂዳ፤ ሄሳፌ ጉዬ ኢዛ አይፌ ናምኦታ ዎጪ ኬሲዲ ጸርቂማላ ሳንሳላታራ ቃቺ ባቢሎኔ ዴሬ ኤፌዳ።

8 ባቢሎኔ ካዎ ናቡካዳናጾሬይ ካዎቲዳ ታማኔ ኡዱፋንላ ላይላን ኢቻሻንላ አገናን ላፑንላ ጋላሳን ኢዛስ ቦንቾ ዛቤታ አዛዚዛይሲኔ ባቢሎኔ ካዎዛስ ዳሮ ጾቃ ሹሜ ጊዲዳ ናቡዛራዲኔይ ዩሩሳላሜ ዩዴስ።

9 ጎዳ ኬል፤ ካዎቲላ ኬላኔ ዩሩሳላሜን ዲዛ ኬላታ ኡባ ጸጊዴስ፤ ኤሬቲዳ ጊታ ኬላታካ ታማን ጸጊዴስ።

10 ካዎ ቦንቾ ናጊዛይታ አዛዚዛይሳ ካሊዳ ኩሜላ ባቢሎኔ ኦላንቻቲ ዬሩሳላሜ ዩሾን ዲዛ ጊምቤዛ ላሊ ዩጊዳ።

11 ካዎ ቦንቾ ናጊዛይታ አዛዚዛይሲ ሄ ካታማይን ጫሻ አቲዳይታ፡ ባ ኩሼ ባቢሎኔ ካዎስ አሚዳይታ ኡባ ዲኢ ኤኪዲ ባቢሎኔ ኤፊዴስ።

12 ጊዲኮካ ናቡዛራዳኔይ አሳ ጋርሳፌ ፑቴሳ ማንቆታፔ አማርዳይታ ዋይኔ ቶካና ማላኔ ጋዴ ጎያና ማላ ሄን አጊዴስ።

13 ባቢሎኔ ዴሬ አሳይ ጸርቂማላፔ ኦሴቲዳ ቱሳታ፡ ጎዳ ኬላ ጊዶን ዲዛ ሚሻታ ኢስታ ቦላ ዋሊዲ ያኔ ሃ ዩሺዛ ጋሬታኔ ሃላ ኢዛን ዋሊዛ ጸርቂማላፔ ኦሴቲዳ ጋባቴዛ ሜንፊሬሊ ዩጊዲ ባቢሎኔ ኤኪ ቢዳ።

14 ሄሳሶካ ቂሬ ጸርታ፡ ታማ ኦይሴሊዛ ሚሻታ፡ ቢዲንላ ካሺዛ ሚሻታ፡ ጨልፋታ፡ ጸሳ ኬላ ጊዶን ጎኤቲዛ ጸርቂማላፔ ኦሴቲዳ ሚሻታ ኡባ ኤኪ ቢዳ።

15 ካዎ ቦንቾ ናጊዛ ዛቤታ አዛዚዛይሲ ሙሩታ ዋርቃፌኔ ቢራፔ ኦሴቲዳ ጽኦታኔ ዉጺዛ ሚሻስ ጎኤቲዛ ሽልኤታ ኤኪ ቢዴስ።

16 ሶሎሞኔይ ጸሳ ኬላን ጎኤታናስ ጊዲ ጸርቂማላፔ ኦሲሲዳ ናሞኡ ቱሳቲ፡ ሃላ ኦይኪዛ ጊታ ጋባቴኔ ሚሽ ኢስታ ቦላ ዋሊ ዩሺዛ ጋሬቲ ኬሂ ዴጺዛይታ።

17 ቱሳቲ ኢሶይ ኢሶይ 18 ዋቆ ጊዲሺን ጸርቂማላፔ ኦሴቲዳ ቁስቴይ ዴስ፤ ሄ ቁስቴዛ አዲሳቴላይ ሄቩ ዋቆ ጊዲሺን ዩዩ አቆናስ ጸርቂማላፔ ኦሴቲዳ ሳንሳላታኔ ኦሮማኔ ሚላ አይፌ ሚሳቴቴስ፤ ሃንኮ አቲዳ ቱሳዚካ ኮይሮይሳ ማላ።

18 ካዎ ቦንቾ ናጊዛይታ አዛዚዛይሲ ቁሴታ ሃላቃ ሳራያ፡ ኢዛፔ ካሊ ዲዛ ቁሴ ሶፎናሳኔ ፔንጌ ናጊዛ 3 ዛቤታ ቃቺ ኤኪ ቢዴስ።

19 ሄ ዋዴ ጋካናስ ካታማይ ጊዶን አቲዳይታፔ ኦላንቻታ ሃላቃኔ ካዎ ዞሪዛ 5 አሳታ ኤኪ ቢዴስ፤ ቃሴ ዴራ ጊዶፌ ኦላስ አሳ ዶሪዛ ኦላ ጋዳዋ ጸፊዛ፡ ጸፊዛስ ካታማይ ጊዶን ዲዛ 60 አሳታ ኤኪ ቢዴስ።

20 ካዎ ቦንቾ ናጊዛይታ አዛዚዛ ናቡዛራዳኔይ ሄይታ ኡባ ኤሬቢላን ዲዛ ባቢሎኔ ካዎዛኮ ኤፊዴስ።

21 ካዎዚካ ሄ አሳ ሃማቴ ቢታን ሄን ኤሬቢላን ዋሊሲዴስ። ዩሁዳይ ባ ቢታፌ ሄሳ ማላን ዲኤቲ ቢዴስ።

ጎደሊያሳ ሹሜቲል

(ኤር 40:7-9፤ 41:1-3)

22 ባቢሎን ካዎ ናቡካደናፆሬይ ሳፋኔስ ናዛ ና ኣኪቃሜ ና ጎደሊያሳ ጫሻ ኣቲዳ ዩሁዳ ኣሳ ቦላ ሹሚዴስ።

23 ኩሜላ ኦላንቻታ ጋዳዋቲኔ ኢስታ ኣሳቲ ባቢሎን ካዎይ ጎደሊያሳ ዴራ ኣይሳናስ ሹሚዳይሳ ሲዩዲ ኢዚ ዲዛሶ ሚጺጸ ጋካናስ ዩዳ፤ ኢስቲካ ናታኒያ ና ኢስማኤሌ፥ ቃሬሃ ና ዮሃናኔ፥ ናጾፌ ዴሬ ኣስ ታኒሁሜታ ና ሳራያ፥ ማኢካቲ ዴሬ ኣስ ያኢዛኔያኔ ኢስታ ኣሳታ።

24 ጎደሊያሳኪካ፥ «ኢንቲ ባቢሎን ዴሬ ሹሜታስ ባቦፍቲ፤ ኢንቲ ሃይሳ ሃ ዴሬዛን ዲቲ፤ ባቢሎን ካዎስ ሃጋዚቲ፤ ሂስቲኮ ኢንቲስ ሃኒዛ ሚሺ ኡባይካ ጊጋ ጊዳና» ጊ ሄ ቃላን ኢስታራ ጫቄቲዴስ።

25 ጊዶ ኣቲን ላፑንላ ኣጊናን ካዎ ዜሬል ጊዲዳ ኤልሻማስ ናዛ ና ናታኒያ ና ኢስማኤሌይ ባናራ ታሙ ኣሳታ ኤኪ ዩዲ ጎደሊያሳ፥ ኢዛራ ሚጺጸን ኢሲፌ ዲዛ ዩሁዳ ኣሳታኔ ባቢሎን ዴሬ ኣሳታ ዎጂዴስ።

26 ባቢሎን ኣሳስ ባቢዳ ጊሻስ ጋሼይ፥ ጊታይ ኣቶንታ ኡባይካ ኦላ ጋዳዋታራ ቤቲ ጊብጾ ቢዳ።

ቃሾፔ ኢዮኣኪኔ ቢርሼቲል

(ኤር 52:31-34)

27 ዩሁዳ ካዎ ኢዮኣኪኔይ ዲኤቲዳ ሄዙ ታማኔ ላፑንላ ላይላን ታማኔ ናምኣንላ ኣጊናን ናምኡ ታማኔ ላፑንላ ጋላስ ዮራማርዴቄይ ባቢሎንን ካዎቲዳ ላይል ኢዮኣኪኔ ቃሾፔ ቢርሺ ዩዲዴስ።

28 ሎኦ ቃላን ኢዛ ሃሳይሲዴስ፤ ካሴ ኢዛራ ኢሲፌ ባቢሎንን ዲዛ ካዎታፔ ቦላራ ኢዛስ ቦንቾ ሶሆ ኢሚዴስ።

29 ኢዮኣኪኔይካ ቃሾ ኬላን ዲሺ ማይኢዛ ማይኦ ቃሪ ዩጊዴስ፤ ሃይቃና ጋካናስ ኡባ ዎዴ ካዎዛ ማዳፌ ሚሺ ጋምኢዴስ።

30 ካዎዚ ኢዮኣኪኔስ ኢዚ ሃይቃና ጋካናስ ሃቺስ ሃቺስ ጊዲዛ ቃላባ ኢዛስ ኢሚዴስ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b